

MACOSOHUA ESOHUI QUEA PAME NEE TEHUE CANAJE JESOSA QUITOJA MARCOS

Huaniya, ma ona besameeji poaniya esohui huohui canaje Jesosa Quitoja
(Mateo 3.1-12; Noca 3.1-9,15-17; Huani 1.19-28)

1 ¹Eyaya, Macoso bajjaniya esohui quea pame nee tehueña Jesosa Quitoja, Eyacuiñajjija Bacua Ejjaja, ojjañaja ebajji. Jamaya poanaje ba'a:

²Yahuajo nei nei ecuanaja etiiquiana Isaia bajjani Eyacuiñajjija esohui huohuijji poa. Eyacuiñajjija Bacua Ejja Jesosa Quitoja Isaiaa tehue ca poa Eyacuiñajjija esohui. E'e, Eyacuiñajjiya oja Bacua Ejja jama aca poa ba'a:

“¡Shajja'ajjacue! Eyaya ecuea esohui huohuijji huoojeaje mi huoojea jjimahuajo. Ohuaya miquea ejiojji shabojea caje. ³E'e, oya quimajo, meshi jabojo nequi taaanequije. Jama poaje ba'a: —¡Jiquio ecua emeshi cuiñajji nei neija ejiojji shabojea cani jama, quea pojje nee nee acani jayojja jamaya miquea ejjashahuabaquijji tai quea boejea nee nee a'yocue! Emeshi Mese nei poeje. ¡Jamajjeya oe apoa pocuajicue!”

Jamaya Isaiaa yahuajo nei nei tehue ca poa Jesusajo.

⁴Jamajjeya Isaiaja esohui jayojjaya Huaniya, ma ona besameeji poaniya, meshi quimajo aniya esohui quea bihui nee Jesusajo huohui canaje. Jama acanaje ba'a: —¡Miquea mimishijo quea yeno pocue! ¡Mimishi jja oe paje'yocue! E'e, jamaya poajo, Eyacuiñajjiya miquea mimishi cuana cuijea caje'yo. Jamajjeya eyaya miya besa meeje ojjañaja ebajji miya Eyacuiñajjija epeeji po'yonaje —acanaje Huaniya.

⁵Quea huiso nee nee cuana Jenosanena cuiñajjijo ba'eca, ojjaña Jodea meshijo ba'eca pea'ai poquinaje Jodana cuei yasijje Huani baa. Huani shajja'ajja majje oya cuana quea yeno nee poanaje ojaya mimishijo.

Miminaje Eyacuiñajji niije. Ojaya mimishi huohui canaje. Majoya Huaniya oya cuana besa mee canaje Jodana enajo, Eyacuiñajjija epeeji epojji.

⁶Huaniya huo ña, cameno ña oja sipi huosho canaje. Ejjayiica'auquijji ejee iya canaje. Shacui ijia canaje, huini pea'ai ishi canaje, Huaniya. ⁷Ohuaya huohui canaje jama ba'a: —Quijje pishana poeje Jesosa Quito. Oya oe nei quea ca'a nee nee nequi. Eya ca ña quea ca'a pishana nequi. Jamajjeya eya ca ña onijje nequi sa po ajja miquiana que cojja. Quea bicho. ⁸Eyaya miquianaya Eyacuiñajjijo besa meeña enajo. Poe majje ohuaya, Jesosa Quitohua miquiana que Eyacuiñajjija Edojjoshahua Pame dobiqúi mee caje'yo. Jamajjeya miquianaya quea pame nee poaje'yo —acanje Huaniya ojjaña.

Huaniya Jesosa besa mee canaje Eyacuiñajjija esohui jayojja jama epo'yojji

(Mateo 3.13-4.11; Noca 3.21-22)

⁹Majoya Huaniya Jodana cuei sahuajo sohuihuohui canijo tii, Jesosa Janinea meshijo ba'enaje, Nasanena cuiñajjijo. Macua huasijje po'oquenaje Huani que. Huani jama acanje ba'a: —Huani, ¡eya besa meecue Eyacuiñajjijo, miyaya! Jamajjeya Huaniya Jesosa besa mee canaje Eyacuiñajjijo Jodana enajo. ¹⁰Huaniya Jesosa besa mee majje, jjequicuaya ca'yajje ba canaje eyatahuatahua ca'apejo caje. Eyacuiñajjija Edojjoshahua Pame huia' jama Jesosa sapa biajje cuabesa ba'enaje. Ecapashi nei ba'eoquenaje. ¹¹Eyacuiñajjiya eyajo aniya oja Bacua Ejja jama acanje ba'a: —Miya ecue Bacua Ejja quea jea nee nee. Eya mijo quea bihui nee nee poani.

Jesosa mimishi po mee sa acanje Edosiquiaa

(Mateo 4.1-11; Noca 4.1-13)

¹²Jjeyahua nei Edojjoshahua Pameya Jesosa quima huasijje, meshi jabo huasijje huoojea canaje. ¹³Jesosa jomajo nequinaje peaja ejiojji huiso cahuime, 40 cahuime. Mahuiso epojja cuana, mecajje cuana pea'ai aninaje. Oe nei nei aninaje. Ijjiacajji quea mase cuana jomajo nequinaje pea'ai. Edosiquiana aje Jesosa que poeyanaje. Quea mimishi epo meeji nisho acanje. Majoya Eyacuiñajjija esohuidojojji cuana quea huiso poeyanaje Jesosa bobiaa.

Jesosaa sohuihuohui canaje Janinea meshijo, Eyacuiñajji ba po jjimaja meshijo

(Mateo 4.12-17; Noca 4.14-15)

¹⁴Majoya pea cuaa Huani, ma ona besameeji poani ña canaje; equi ejjaje nobiaquijji yasijje jeanobiajea canaje. Jamajjeya Jesosa posohuaquinaje Janinea meshi yasijje. Eyacuiñajjija esohui quea pame nee huohui canaje. ¹⁵Jama poanaje ba'a: —Jjeyahua nei Eyacuiñajji miquea Emeshi Mese nei poaje. ¡Jamajjeya miquea mimishijo quea yeno pocue! ¡Mimishi cuana

pajea'yocue miquiaaya! ¡Ecuea esohui quea pame shajja'ajjacue! E'e, enijje jjapeequajao, eyaya miya ba'e tiiti meeje'yo enijje —Jesosaa huohui tiiti canaje.

Jesosaa nahuoo cuiashajajji iyaa canaje onijje epo'yojji

(Mateo 4.18-22; Noca 5.1-11)

¹⁶Majoya Jesosa poquinaje Janinea bae ai sahua huasijje. Jomajo ohuaya Anesi, Anesija o'i Peno bajjani, Simohui pea'ai bajjani ba canaje. Oya cuana nahuoo cuiashajajji nei nei bajio. Nahuoo cuiashaja poequi.

¹⁷Jesosaa oya cuana iyaa canaje: —¡Enijje po'yocue! Eyaya miya dejja cuana jjequi meesahua'yojji aje'yo e que.

¹⁸Jeyahua nei nei oya cuana ojaya eshajajji cuana jeana'yo majje onijje poqui'yonaje.

¹⁹Majoya Jesosaa poqui pishana majje pea cuana ba canaje. Semeneoja bacua ejja Jacobo ba canaje oja chahua mese nijje, Huani nijje bishe aijo eshajajji je'e'yo po'ani oja chii nijje. ²⁰Jeyahua nei Jesosaa oya cuana iyaa canaje. Jamajjeya Jesosaa iyaa cajje oja chii Semeneo bajjani echacojji cuana nijje bishejo ani tii jiña ca'yonaje cuaa, Jesosa nijje epoqui'yojji.

Dejja niñepoqui

(Noca 4.31-37)

²¹Majoya quijje pishana Jesosa o shajja'ajjajji nijje posohuaquinaje Capenaoma cuiñajji yasijje. Epojja ejomishocajji oya cuana poquinaje Jodio cuanaja equi ojee ejjachichajji yasijje. Dobiqui majje Jesosaa ojjaña jomajo ani sohuihuohui canaje. ²²O shajja'ajja majje ojjaña cuana jama poanaje ba'a: —¡De! Ohuaya Jesosaa esohui huohui cani quea ja'a nee. Huohui cani emeshi mese jayojja jamaa quea ja'a nee nee. Moisesija esohui etehue'yo huohuijiya quea ja'a pishana esohui huohui cani, de. ¡Cashajja'ajja'yahua Jesosa! —poanaje ojjaña cuana.

²³Jeyahua nei dejja niñepoqui dobinaje ma equi yasijje. ²⁴Jesosa ba majje eshahua o niñepoqui meeji poani siasianaje jama ba'a: —Jesosa, Nasanenajo ba'e, ¿apiojji miya poeyanaje ecuana que ecuana quea nee nee po meeya? Ecuana eba miya Eyacuiñajji Bacua Ejja quea pame nee. ¡A'a jeyahua nei ecuana cuaqui yasijje jeajeajji! Eyacuiñajjiya eshahua cuana cuaqui yasijje huoojeajea caje'yo quijje, jjeja nei pojjeama, de —taaame poanaje eshahua.

²⁵Jamajjeya Jesosaa eshahua, o niñepoqui meeji poani huoojeacuayajea ca'yonaje: —Eshahua, ¡a'a mimijji! ¡Cuayaqui'yocue oe, jiquio dejjajo nequi! —Jesosaa acanaje.

²⁶Jesosa mimi jeahuajo, eshahuaa o niñepoqui meeji poaniya dejja jjequi'ihui mee majje, siasia mee majje cuayaquinananaje. Dejja jea cana'yonaje. ²⁷Ba majje ojjaña cuana quea mete nee nee poanaje. Ojee miminaje jama ba'a: —¡De! ¿Yajja shai poani? Jamaya yahuajo ecuanaja ba jjima, de. Jesosaa quea ja'a nee huohui cani emeshi mese jamaa, oya

quea sohui poja nee nee. Ojaya esohui shajja'ajja cani eshahuaa. Oja sohui jayojja jama acani, de —poanaje ojjaña.

²⁸Jjeyahua nei ojjaña Janinea meshijo ba'ecaa shajja'ajja canaje Jesosajo. Jama poanaje ba'a: —Jesosaa quea ja'a nee ojjaña acani. Oya Eyacuiñajji huojea'yo ojjaña jaahuanajji e'e jojo nei —ojjaña poanaje.

Jesosaa Simohuija yano mese huaquia mee ca'yonaje

(Mateo 8.14-15; Noca 4.38-41)

²⁹Jesosa Jodio cuanaja equi ojee ejjachichaquijji nequi cuayaqui'yo majje poquinaje Simohuija equi yasijje, Anesija pea'ai equi yasijje. Dobiquinaje Jacobo nijje, Huani pea'ai nijje. ³⁰Simohuija ano quea quiyo nee jaa. Jamajjeya Jesosa huohui canaje jama ba'a: —Jesosa, ecue ano, ecue huanaseja enaese quea quiyo nee nee jaa, quea mano, de —Simohui Peno poanaje.

³¹Jamajjeya Jesosa o que poquinaje. Emanojaa ba canaje. Napa'ajja canaje emeya. Me napa'ajja cajje, boe canana'yonaje. Jamajjeya me iña majje jjequisohua canaje Jesosaa. Majoya ohuaya, Simohuija anohua, bobi ojjaña huasijje jjequi canaje.

Jesosaa quea huiso emanojaaca cuana jjaajaqui mee ca'yonaje

(Mateo 8.16-17; Noca 4.40-41)

³²Majoya sinecua nei, eshequi e'oquequijajo, dejja cuaa quea huiso emanojaa cuana, niñepoqui cuana pea'ai Jesosa que jjequi canaje ejaajaqui mee'yojji. ³³Ojjaña jiquio cuiñajji ba'eca Jesosa que jjachichiquinaje Simohuija equi yasijje. ³⁴Jesosaa ojjaña emanojaa jjaajaqui mee ca'yonaje, huaquia mee ca'yonaje pea'ai. Eshahua cuana huojeacuayajea ca'yonaje pea'ai. Eshahua cuana, o ebajo, jama acanaje Jesosaa ba'a: —Eya miquianajaya ebajo ja'a mimijji! Eya Eyacuiñajji huojea'yo ojjaña jaahuanajji, oja Bacua Ejja ja'a pea cuana huohuijji! —poanaje Jesosa.

Jesosaa esohui huohui ca o'oyanaje Janinea meshijo

(Noca 4.42-44)

³⁵Mecajjeahua nei, eshequi jjaja'a'ajjaqui jjimahuajo, Jesosa shequi majje cuiñajji esecue yasijje poquinaje dejjama huasijje. Jocuama oya miminaje Eyacuiñajji nijje, oja chii nijje. ³⁶Jamajjeya shequi majje pea cuaa Simohui nijjeya oya sa'ajjaqui canaje. ³⁷O ba majje jama poanaje ba'a: —Jesosa, ojjaña miya sa'ajja caqui —poanaje.

³⁸Jamajjeya Jesosaa oya cuana jama acanaje ba'a: —¡Cua'a, enijje poquicue pea cuiñajji cuana huasijje! Eyacuiñajjiya eya huojea canaje pea cuiñajji yasijje ojaya esohui jocuama huohuiya pea'ai.

³⁹Jamajjoya Jesosa Janinea meshijo ojjea poquinaje ojjaña cuiñajji cuana huasijje. Ojjaña Jodioja equi ejjachichaquijji yasijje dobiquinaje; esohui huohui canaje. Eshahua cuana huojeacuayajea ca'yonaje pea'ai.

**Dejja batata epo'yo, ma dejjaa shicui jjima acani jjajea meequi
ca'yonaje Jesusaa**

(Mateo 8.1-4; Noca 5.12-16)

⁴⁰Majoya oe dejja quea mano nee batata epo'yo poeyanaje Jesosa que. Ecuio'shaujajo nequinaje o bihuiajji. Onijje miminaje jama ba'a: —Jesosa, ecuea eba miya jjajea meequi'yoyji nei nei poani. Jamajjeya miyaya jjajeaqui mee'yo sa amajje imo che jjajeaqui mee'yocue! —poanaje.

⁴¹Jesosa ma dejja quea mano ba majje quea yeno poanaje. Oya napa'ajja canaje emeya. Jama poanaje ba'a: —E'e, eyaya miya jjajeaqui meeje'yo. ¡Jjajeaqui'yocue, miya! —Jesusaa acanaje.

⁴²Jjajeaquinana'yonaje jjeya nei. Quea pame nee po'yonaje. ⁴³⁻⁴⁴Jamajjeya Jesusaa oya huohui canaje jama ba'a: —¡Shajja'ajjacue mo! Eyaya miya jjajeaqui mee'yonaje. ¡Jamatii a'a oe jjeya huohuipojji ecue jjajeaqui mee'yo! ¡Poquicuajicue Jenosanena huasijje, Eyacuiñajji equi yasijje, ma onajo Eyacuiñajji nijje mimiani yasijje! Oya huohucue jama ba'a: “Eya jjajeaqui'yonaje” acue. ¡Moisesija sohui jayojja jama oe pocue pea'ai! Miya ehuaquia'yohua jjejojya ¡Eyacuiñajji nijje mimiani yasijje beca hui' quiaquicue Eyacuiñajji bihuiajji! Jamajjeya ojjaña ba caje miya e'e jojo nei ejjajeaqui'yo —oya acanaje Jesusaa. ⁴⁵Jamatii poqui majje huohui canaje ojjaña huasijje jama ba'a: —¡Jesusaa eya jjajeaqui mee ca'yonaje de, huaquia mee ca'yonaje jjeya nei!

Jamajjeya dejja quea huiso nee nee nee o ba sa poanaje, ejaajaqui'yoyji. Quea huiso nee nee jjachichaqui majje Jesosa cuiñajji cuana huasijje dobiqui mee jjima acanaje. Oya quimajo nequinaje. Quea huiso nee nee o que poeyanaje, ojjaña huapajje aequiana poeyanaje o baa.

Quibojjisha quea mano nee nee jaa jeo mee ca'yonaje

(Mateo 9.1-8; Noca 5.17-26)

2 ¹Majoya quijje pishana Jesosa Capenaoma huasijje poe o'yanaje. Jamajjeya pea cuaa jomajo nequiya huohui canaje jama ba'a: —Jesosa poe'yonaje ojaya equi yasijje. ¡Cua'a, ejjabaquiqui! ²Jamajjeya quea huiso nee nee jjachichaquinaje ojaya equi yasijje. Dobiqui mee ajja quea dejja huisojojo. Esecuejo nequinaje; equi shajjaquibojo aequiana nequi canaje pea'ai. Jesosaa oya cuana Eyacuiñajji esohui huohui canaje. ³Majoya pea dejja cuaa, ebeca pee pea'aiya, quibojjisha quea mano nee nee equipajaajji jaa sejjaiña majje Jesosa que dojo canaje. ⁴O que poe meeme ajja, quea huiso equijo ejjachichaqui nequijojo. Jamajjeya oya cuanaa equi biajjeje quibojjisha dojosohuaqui canaje. Equi huejja ca'yonaje. Huejjajje equipajaajji ecapashinei jeaquea ca'yonaje jjoñojo. ⁵Ma ba majje Jesosa jjashahuabaquinaje jama ba'a: —E'e, jiquio dejja cuana jjashahuabaquiani eya ejaajaquimee'yoyji nei nei poani.

Jamajjeya quibojjisha nijje jama poanaje ba'a: —Cha, ¡quea bihui nee pocue! Eyaya miquea mimishi cuana cuijea'yonaje.

⁶Jesosaja esohui shajjaajja majje Moisesija etehue'yo huohuijji poani jomajo ani quenequenenaje. Jesosa Eyacuiñajjija Bacua pojjeama posojo jjashahuaba taiquinaje jama ba'a: ⁷—¡De! Jiquio oya Eyacuiñajji pojjeama. ¿Apiojji Eyacuiñajji jayojja jama nei nei mimiani, de? Jamaya quea mimishi. ¿A'a acuae ohuaya mimishi cuijea mee caje'yo jjabaquiani? Chojja, Eyacuiñajji oe nei mimishi cuijea'yojji poani —poanaje Jodio etii cuana, Jesosa Eyacuiñajjija Bacua Ejja pojjeama poso acanaje.

⁸Jamajjeya Jesosa Jodio etijja ejjashahuaba taiquijji ba majje jama poanaje ba'a: —¿Yajjaje acuae nequiana enijje quea quene poani so'o? ⁹¿Ache shai quibojjishajo quea camaja eyaya aje'yo? ¿A'a ojaya mimishi cuijea'yojji quea camaja? ¿A'a jja eyaya oya nequisohua meeje'yo? Ba'ajja —Jesosa poanaje—. ¹⁰Jamajjeya eyaya ojjañaja Edoe Meseya miquianaya ba meaña eya ca ca ña Emeshi Mese nei quea ca'a nee nee nequi. Jamajjeya eyaya mimishi cuijeaje'yo nequianaja.

¹¹Majoya Jesosaa quibojjisha acanaje: —¡Nequisohuacue! ¡Miquea equipajaajji bebo majje miquea equi yasijje poquicue!

¹²Jjeya nei quibojjisha nequisohua majje jeo'yonaje. Equipajaajji bebo canaje. Jeojeopoqui'yonaje oja equi yasijje. Jamajjeya ba majje ojjaña cuana quea bhui nee nee poanaje. Eyacuiñajji bihuia canaje jama ba'a: —¡E'e nei, joya quibojjisha jeo'yonaje jjeya nei! ¡E'e, e, Eyacuiñajjija Jesosa quea ca'a nee po mee cani; emanoojaa cuana huaquia mee ca'yani! ¡Mimishi cuijea mee ca'yani pea'ai!

Jesosaa Mateo pea bajjani Nemi iyaa canaje onijje epo'yojji
(*Mateo 9.9-13; Noca 5.27-32*)

¹³Majoya Jesosa poqui o'oyanaje meshijaji yasijje, bae sahua huasijje. Quea huiso nee nee o que poeyajo, oya cuana Eyacuiñajjija esohui huohui canaje. ¹⁴Majoya Jesosaa poquijeya Apeoja bacua ejja Mateo ba canaje, ma Nemi pea'ai bajjani. Oya yaninaje equi ejjeshejji jaahuanajjijo, ojjañaja emeshi meseja esohuijjo jjeshe mee cani dejja cuana eba'ejji sosejje. Oya bejjo jjeshejji poani. Ba majje Jesosaa oya iyaa canaje: —Nemi, ¡enijje po'yocue!

Jamajje Nemi nequisohua majje Jesosa nijje poqui'yonaje. ¹⁵Majoya Nemiya Jesosa iyaa canaje ojaya equi yasijje ijia'ijjiaa. Jamajjeya Jesosa o shajja'ajjajji cuana nijje Nemija equi yasijje poquinaje ijia'ijjiaa. Quea huiso dejja cuana Nemi jama bejjo jjeshejji poani, dejja mimishi cuana pea'ai poquinaje. Ojee ijia'ijjia aninaje Jesosa nijje, Jesosa shajja'ajjajji cuana nijje pea'ai. ¹⁶Jesosa ma dejja mimishi cuana nijje ijia'ijjia ani ba majje Jodio esohui huohuijji Paniseo cuana bajjani, Moisesija esohui etehue'yo huohuijji cuana pea'ai quea quene poanaje. Jesosa shajja'ajjajji cuana nijje mimijajinaje jama ba'a: —¿Apiojji miquea esohui huohuijji ijia'ijjiani bejjo jjeshejji cuana nijje, dejja mimishi nijje pea'ai? ¿Apiojji, de?

¹⁷ Jesosaa oya cuana shajja'ajja canaje. Huohui canaje jama ba'a: —¿A'a dejja cuana quea mano pojjeama eshicuijji quia sa poani? Quea mano poanijo ca ca eshicuijji quia cajji. Oya jayojja eya dejja quea mimishi nijje jjapeequiani quea ja'a nee epo mee'yojji. ¡Bacue! Beca cuana jama poani ba'a: “Eya ca ca iña quea pame nee, mimishi'ama nei nei” poso jjabaquiani. Jamajjeya ma dejja cuana ecuea e'iyajji pojjeama enijje ejjapeequi'yojji. Chojja, eya poeyanaje dejja quea mimishi iyaaa, mimishi pajea mee'yojji.

Bobi ijia ajjajo huohui'ajja canaje cuaa
(*Mateo 9.14-17; Noca 5.33-39*)

¹⁸ Majoya Huani, ma ona besameejji poani, jeanobiajea canaje cuaa. Jamajjeya Jodio etiiquianaja esohui jama poanijo o shajja'ajjajji cuanaa bobi ijia jjima aninaje Eyacuiñajjijo ejjashahuabaquijji, onijje emimijji pea'ai. Jamaya Paniseo shajja'ajjajji cuana poa pea'ai. Jamajjeya beca cuana Jesosa que poeyanaje. Jama huohui'ajjame acanaje ba'a: —Jesosa, ecuana, Paniseo cuana pea'ai, Jodio etiiquianaja esohui jama poanijo bobi ijia ajja Eyacuiñajjijo ejjashahuaba neineiquijji. ¿Apiojji acuae mi shajja'ajjajji poani jama po ajja? —poanaje; beshahua nei tecuea canaje.

¹⁹ Jesosaa oya cuana acanaje jama ba'a: —Chojja, ¡eya ecuea epeejji cuana nijje yanijo, ca'ijia cahua! Ma jayojja jama ba'a: Ejjahuanauquijjijo yahueja epeejji cuana onijje yanijo ca'ijia cahua quea bihui nee. ¿A'a yahueja epeejji cuana onijje yanijo quea yeno? Chojja, quea bihui nee. ²⁰ Yahue poqui'yajo ca ca oe ojaya epeejji cuana ijia'ijia sa po ajja poaje. Quea yeno jjejojo jjashahuaba neineiquiani. Eya jiquio ecua yahue jama poani: Quijje eya poqui'yajo, ecuea epeejji cuana ijia'ijia ajja poaje, Eyacuiñajjijo ejjashahuaba neineiquijji, onijje emimi neineijji pea'ai.

²¹ Majoya Jesosaa huohui canaje pea ejjashahuabaquimeejji: —Eseyaya baacojja esee'yohua bishe eyacuajo caca ajja. Cho. Baacojja etii enajo nequi see'yani, ca'a'ama po'yani. Jjasajajeaquiye'yo. Bishe ihuije'yo. Bishe eyacuajo ca ca baacojja eyacuaa cacaña.

²² Pea esohui huohui canaje jama ba'a: —Ena sese cuatatanijo iya ajja meshimisi etiijo. Ena sese cuatata neineianijo, meshimisi ca'a'ama jjaajajeaqui majje ena sese jjashojeaquiye'yo. Cho, ena sese cuatatanijo meshimisi eyacua quea ca'ajo iya cani cuaa —jamaya Jesosaa huohui canaje ejjashahuaba meequijji onijje jjapeequi majje eyacua caba'yahua, yahuajo jama pojjeama, etiiquianaja esohui jama pojjeama.

Esohui epojja ejomishocajjijo
(*Mateo 12.1-8; Noca 6.1-6*)

²³ Majoya Jodioja epojja ejomishocajjijo Jesosa o shajja'ajjajji cuana nijje ejiojjije poquinaje. Que yiyejje poquije quea shoe poanaje. Quejo nequi anoso ai sejjja canana majje oe pojji ijia canaje, o shajja'ajjajjiya.

²⁴ Maya Paniseo cuaa ba canaje. Jamajjeya Jesosa nijje mimijajinaje jama

ba'a: —¡Bacue oe! Mi shajja'ajjajji poani cuaa chaco cani. Anoso ai sejja cani esejaya epojja ejomishocajjijo. Eseyaya etiiquiana Moisesija etehue'yo jama poani ba'a: “¡A'a chacojji epojja ejomishocajjijo!”

²⁵Jesosaa oya cuana acanaje jama ba'a: —¿A'a miquea ba jjima esohui etehue'yo emeshi mese Dabija, ojaya epeeji cuanaja pea'ai? ²⁶Yahuajo nei nei Abiata Eyacuiñajji nijje emimijji etii poanijo, Dabija epeeji cuana quea shoe nee po majje Dabi Eyacuiñajjija equi yasijje dobiquia poa. Ijjia ca poa pahui, maya Eyacuiñajji yasijje quia ca poa cuaa o bihuajji. Ojaya epeeji cuana ijja mee ca poa pea'ai. Jiquio ca oe Eyacuiñajji nijje mimianiya ca'ijjia cahua; pea cuanaja e'ijjiajji pojjeama.

²⁷Majoya Jesosa ojjaña nijje jama poanaje ba'a: —Dejja, epona pea'ai pana majje Eyacuiñajjiya oe epojja ejomishocajji aca'yonaje dejja cuana jomishocajji. A'a jjashahuabaquijji jama ba'a: “Epojja ejomishocajjijo eya jamatii nije”. ¡Cho, quea pame nee acue ma pojja! —Jesosa poanaje—. ²⁸Eya, ma ojjaña Edoe Mese Emeshi Mese nei poani. Jamajjeya eyaya eyave nei huohuije epojja ejomishocajjijo: ¡Quea pame nee nee acue! ¡Pea cuana quea jea nee acue! —Jesosa poanaje.

Meshahuama'yo epo jjameshahuanequi mee ca'yonaje

(Mateo 12.9-14; Noca 6.6-11)

3 ¹Majoya Jesosa Jodioja equi ejjachichaquijji yasijje poqui o'oya majje dobiquinaje. Jomajo dejja meshahuama'yo epo aninaje. ²Jamajjeya Jesosa ba majje Paniseo cuana jama jjashahuabaquinaje ba'a: —Eseyaya etiiquiana jama poani ba'a: “¡A'a chacojji epojja ejomishocajjijo!” poani. E'e pojja'a Jesosa esejaya etiiquianaja esohui jama poaje, chaco ajja pojja'a jjeya. E'e pojja'a oya chaco caje jjeya, epojja ejomishocajjijo; meshahuama'yo epo pojja'a jjameshahuanequi mee caje'yo. ¡Caba'ajja sahua! —poanaje.

Jesosa nijje mimijaji sa poanaje. Jamajjeya oya ba neinei canaje Paniseo cuaa.

³Jamajjeya Jesosaa meshahuama'yo epo iyaa canaje jama ba'a: —¡Poecue e que! ¡Ojjaña cojja nei nequicue, eyiyesama nejjo!

⁴Majoya oya nequisohuajo, Jesosa esohui jaahuanajji nijje, Paniseo cuana nijje jama poanaje ba'a: —¿Yajja poani etiiquiana Moisesija esohui etehue'yo? ¿A'a epojja ejomishocajjijo pea cuana quea pame acajji pojja'a? ¿A'a quea tai acajji pojja'a? Jamajjeya ¿a'a emanojaa huaquia mee ca'yojji epojja ejomishocajjijo? ¿A'a mano mee cajji pojja'a? —poanaje Jesosa.

Jamatii Jesosa Paniseo cuanaja saja'a jjima quea mimishi nejja jjejojo.

⁵Jamajjeya Jesosa ojjaña baja majje quea quene nee nee poanaje. Ojjaña shajjama' poanijo oya quea yeno poanaje. Jamajjeya ohuaya meshahuama'yo epo jama acanaje ba'a: —¡Epeeji, miquea eme jeapisa'ajja'yo socue! —acanaje Jesosaa.

Jamajjeya mejjajjaa eme' jeapisa ca'yonaje; pea mijijje jayojjaya po'yonaje.

⁶Jjeja nei Paniseo cuana esecue yasijje cuayaqui majje pea Jodio etii cuana nijje miminaje, emeshi mese Enodeja epeeji cuana nijje pea'ai. Jama poanaje ba'a: —¿Yajja amajje Jesosa quecua ca'yojji so'o, de? —poanaje Paniseo cuana.

Dejja quea huiso bae sahuajo sohuihuohui canaje Jesusaa
(Mateo 4.24; 12.15-16; Noca 6.17)

⁷Majoya Jesosa o shajja'ajjajji cuana nijje poquinaje. Janinea bae sahua huasijje poe o'oyanaje. Quea huiso nee nee onijje poquinaje Janinea meshijo ba'eca cuana, Jodio meshijo ba'eca cuana, ⁸Jenosanenajo ba'eca cuana, Idomea meshijo ba'eca cuana, Jodana cuei ojje mijijje ba'eca cuana, Tinojo ba'eca, Sinonojo ba'eca cuana pea'ai. Jesusaa jjaajaqui mee ca'yoqui shajja'ajja majje o que poeyanaje quea huiso nee nee, de. ⁹Jamajjeya Jesusaa o shajja'ajjajji cuana huoojea canaje bishe jjequiya. Jama poanaje ba'a: —¡Bishe jjequicue! Quea huiso nee nee nequicaa quishi ca chana' cuaa mo. Jamajjeya eyaya bishejo nequi majje ojjaña cuana sohuihuohuije.

¹⁰E'e, yahuajo pishana Jesusaa quea huiso jjaajaqui mee ca'yonaje. Jamajjeya quea huiso emano cuana Jesosa que jjachichaquinaje; mojoiya ca'yonaje oja daqui napajji. Jama poanaje ba'a: —E'e, Jesosa daqui cuema napa majje jjaajaquiye'yo.

¹¹Jesosa ba majje eshahua cuana siasianaje. Niñepoqui cuana Jesosa cojja nei ecui'oshajajo nequinaje o bihuiajji. Jama poanaje ba'a: —Jesosa Quito, miya Eyacuiñajjija huoojea'yo ojjaña jaahuanajji, oja Bacua Ejja quea pame nee —poanaje eshahua cuana.

¹²Jamajjeya Jesusaa eshahua cuana tecueahuoojeacuayajea ca'yonaje jama ba'a: —¡Eshahua cuana, esohui oe ca'acue! ¡A'a ona huohuijji eya Eyacuiñajjija huoojea'yo ojjaña jaahuanajji! —Jesusaa acanaje.

Jesosaa o shajja'ajjajji cuana iyaa canaje 12 huisome
(Mateo 10.1-4; Noca 6.12-16)

¹³Majoya Jesosa jaasohuaquinaje eyiyo huasijje. Ojjaña ohua sa cani ohuaya iyaa canaje onijje epoqui'yojji. Jiquio dejja cuana o que poeyanaje. ¹⁴Majoya ohuaya ome miji pea beca huisome, 12 huisome dejja babaca ca'yonaje ojaya esohui huohuijji nei epojji. Oya cuana huohui canaje jama ba'a: —Eyaya miquianaya babacanaje enijje e'anijji. Miquianaya huoojeaje ojjaña meshi yasijje ecuea esohui huohuiya.

¹⁵Jesosaa oya cuana quea ca'a po mee canaje eshahua cuana huoojeacuayajea mee'yojji, ojjaña emanojaa cuana huaquia mee'yojji, ejjaajaqui mee'yojji pea'ai.

¹⁶Jesosaja huoojea'yo esohui huohuijji ma bajjani ba'a: Simohui, ma pea bajjani Peno; oja chahua Anesi; ¹⁷Semeneoja bacua ejja Jacobo, oja chahua Huani pea'ai Jesusaa pea bajjani aca'yonaje Cueji bajjani, oja sohuijo ca ca Boaneje bajjani; ¹⁸Penipe; Matonome; Tomasi; Mateo, ma bejjo jjeshejji poani; Apeoja bacua ejja Satiaco; Simoni Senote; Taneo; ¹⁹Jodasa Isicaniote, ma Jesosa iña meesahuajji poanaje dejja mimishija quecua'yojji. Mahuiso Jesusaa babaca canaje ojaya esohui huohuijji epojji.

Jesosa niñeba canaje cuaa

(Mateo 12.22-32; Noca 11.14-23; 12.10)

²⁰Majoya Jesosa eyiyojo ani equi yasijje jaaoque o'oyanaje o shajja'ajjajji nei cuana nijje. Quea huiso nee nee o que jjachichaqui o'oyanaje. Quea huiso nee neejo Jesosa, o shajja'ajjajji cuana pea'ai, ijia'ijia mee jjima acanaje. ²¹Ma shajja'ajja majje ojaya enaese poeyanaje oja chahua cuana nijje Jesosa nahueya, Jesosa dojhua pea'ai. E'e, onaaya Jesosa niñeba canaje jama ba'a: —Oya Jesosa niñe poquinaje —sijje poanaje cuana.

²²Paniseo cuaa pea'ai Jesosa niñeba canaje: —E'e, Jesosa aje oe eyamiquecua pojja'a. Ohuaya aje jja oe eshahua cuana huoojeacuayajea canaje Edosiquiana etii nijjeya, Satanasa bajjani, pea bajjani Meesemo nijjeya —poso acanaje Paniseo cuaa.

²³Paniseo cuanaja ejjashahuabaqui'yojji quea tai Jesosaja eba poanaje. Jamajjeya oya cuana tecuea canaje jama ba'a: —¡Shajja'ajjacue oe! ¿A'a acuae jja Edosiquiaa, Satanasa pea eshahua huoojeacuayajea came? ²⁴Chojja. Joya emeshi mese shajja'ajja sa po ajjajo, jjacuiaquianijo, dejja cuana ma meshijo ba'e chama'yo tii poaje'yo. Cuiñajjijo ba'e cuana jamaya po pea'aije, chama'yo tii poaje'yo pea'ai. ²⁵Huapa pojjeama cuana jjacuiaquianijo chama'yo tii poaje'yo pea'ai. ²⁶Jamaya pea'ai Edosiquianaa, Satanasa pea eshahua ehoojeacuaya'yo jojjemo, chama'yo tii po'yoqueaye —Jesosa poanaje—. ²⁷Cuanaya bacue ba'a: ¿A'a dejja quea ca'a nee jeyo jjima nequijo oja aquiana sii cajji? Chojja, o jeyo majje ojaya aquiana cuana sii caje cuaa. Jiquio ecua e'aquiana mese ebionei jeyo cani jama amajje eyaya eshahua cuana jeacuayajeaña —Jesosa poanaje pea'ai—. ²⁸Jamajjeya eyaya miya e'e jojo nei huohuiaña: Eyacuiñajjiya ojjaña mimishi cuana, sijjepojji cuana pea'ai cuijea caje'yo. E'e, eya ojjañaja Edoe Mese niñeba cajo cuaa, Eyacuiñajjiya ma mimishi cuijea caje'yo pea'ai, ojjaña mimishi cuana ohuaya cuijea caje'yo. ²⁹Jamatii Edojjoshahua Pamejo sijje poajo ca ca, Edojjoshahua Pame niñeba cajo ca ca, Eyacuiñajjiya ma mimishi ecuijea'yojji pojjeama tii tii. Jjeya ecuijea'yojji pojjeama; quijje eya ecue Chii nijje eyajo ojjaña huoojea'yojji poaje ecuijea'yojji pojjeama tii tii poaje pea'ai —Jesosa poanaje.

³⁰Yahuajo Paniseo cuana Edojjoshahua Pamejo sijje poanaje jama ba'a: —Jesosaa Edosiquiana nijjeya aje oe eshahua cuana dejjajo ani huoojeacuayajea cani —jamaya sijje poanijo, Jesosaa oya cuana tecuea canaje.

Jesosaja enaese, echahua mese cuana pea'ai poeyanaje

(Mateo 12.46-50; Noca 8.19-21)

³¹Majoya Jesosa mimianijo tii, ojaya enaese, oja chahua cuana pea'ai poeyanaje. Esecuejo nequinaje. Onaaya Jesosa huohui canaje jama ba'a: ³²—Mique nae poeyanaje; esecuejo nequi, minijje emimijji —o pejjejo e'anioque'aniya huohui canaje.

³³Jesosaa ojjaña ejjachichaqui'yo baja majje jama acanaje ba'a: —¿Ache acuae ecuea huapa pojjeama cuana so'o? ³⁴¡Bacue! Jiquio ecuea epeeji cuana ecuea huapa pojjeama cuana jama ecuea quea jea nee nee, ecuea ecue nae quea jea ña jayojja jama. ³⁵E'e, ecue Chii eyajo ani; ojjaña joya ojaya ejjashahuabaqui'yojji jayojja jama ba'yani, ojaya esohuijo jjashajja'ajjaquiani pea'ai ecuea huapa pojjeama, ecue chahua, ecue jjo'i, ecuea enaese pea'ai —Jesosaa acanaje.

Eso' jeaajaji

(Mateo 13.1-9; Noca 8.4-8)

4 ¹Majoya Jesosa equijo ani cuayaquinaje. Bae sahua huasijje poqui majje anioquenaje. Majoya o que jjachichaquinaje dejja cuana quea huiso nee nee. Jamajjeya bishe yasijje nequisohuaqui majje anioquenaje esohui huohuiya. Dejja cuana ca ca meshijajijo aninaje. ²Jesosaa oya cuana sohuihuohui canaje quea huiso nee nee. Pea esohui ebameesahuajji huohui canaje ona jjashahuabaquijji. Jama acanaje ba'a: ³—¡Bacue! Ebanajji poquinaje banaa. ⁴Eso' jeaaja canijo, oe poji eso' oquequinaje ejiojji yasijje. Poeyanaje cuichojji cuana; ijja canaje eso'. ⁵Pea eso' oquequinaje mei biajje. Meshi chamajo eso' pohua cuaji'ajja'yonaje. ⁶Quijje cuayanaje eshequi. Eshequi quea quiyoo nee poajo, eso' quiyomano'yonaje. Esajja joca'yajo mano'yonaje. ⁷Pea eso' oquequinaje acuisa huasijje. Pohua'yo majje jjonohua bebo ca'yonaje. Tatajo nequi jjajja ajja poanaje; mano'yonaje. ⁸Pea eso' ca ca oquequinaje meshi quea pame yasijje. Pohua'yonaje eso' cuana. Ejjajja quea pame nee nee poanaje. Oe esajo ejjajja iye huiso aninaje; pea esajo ejjajja quea huiso aninaje, pea esajo quea huiso nee nee aninaje. Sejja ca'yonaje quea huiso nee. ⁹¡Jamajjeya ecuea esohui shajja'ajjacue! ¡Jjashahuabaquicue! —Jesosaa acanaje.

Esohui ebameesahuajji Jesosaa sohuihuohui canaje ona jjashahuabaquijji

(Mateo 13.10-17; Noca 8.9-10)

¹⁰Quijje pea cuana o shajja'ajjaji cuana nijje poeyanaje Jesosa que. Huohui'ajja canaje jama ba'a: —Jesosa, ¿apiojji acuae miyaya esohui ebameesahuajji huohuiaña? Maya ecuanaja quea quehua pishana. ¡Ba meesahua socue! —poanaje.

¹¹Oya cuana saja'a canaje Jesosaa: —Miquianaya ca ca oe Eyacuiñajjiya ba meesahua cani eya ojjañaña Emeshi Mese nei poaje'yo. Yahuajo ba mee jjima poa. Pea cuana ca ca ba meesahua ajja. Jamajjeya eyaya esohui ebameesahuajji huohuinaje ona jjashahuabaquijji. ¹²Jamatii ecuea esohui shajja'ajja majje oya cuana jjashahuabaqui ajja, jjashajja'ajjaqui ajja, de. E'e, Eyacuiñajjiya esohui huohuijji Isaia yahuajo nei nei jama poa ba'a:

“Shajja'ajja huicha'a huicha'a majje jamatii jjashajja'ajjaqui ajja poaje. Eyacuiñajjiya acani ba huicha'a huicha'a majje jamatii jjashahuabaqui ajja poaje. Ecuea esohui eba jojjemo, eshajja'ajja

jojjemo jjabahuejjaqui'yome. Pea'ai enijje ejjapeequi'yo jojjemo, eyaya mimishi cuijea'yome".
Jamaya yahuajo nei nei tehue ca poa etiiquiana Isaiaa shajjama' cuanajo —Jesosa poanaje.

Jesosaa esohui ebanajjijo ba mee canaje
(Mateo 13.18-23; Noca 8.11-15)

¹³Majoya Jesosaa oya cuana jama acanaje ba'a: —¿A'a ma esohui ebameesahuajji miquianajaya quea quehua? ¿Jamajjeya achajja acuae oe miquianajaya eba poaje pea esohui ebameesahuajji? ¡Shajja'ajjacue! Eyaya miquianaya ba meesahuaje ecuea ehuohui'yo ebanajjijo: ¹⁴Jiquio ecua ebanajjiya eso' jeaaja cani jayojja jama Eyacuiñajjiya esohui huohuijjiya esohui huohui canaje ojjaña huasijje. Beca cuana ejiojji yasijje oquequi eso' cuana cuichojiya ijjiyajeyo ca'yonaje. ¹⁵Jamaya pea'ai beca cuana ecuea esohui eya ojjaña Emeshi Mese oe nei poaje shajja'ajja majje jamatii jjashahuabaqui ajja. Jamajjeya Edosiquiaa o que poe majje ecuea esohui pajea mee cani. ¹⁶Beca cuana eso' mei biajje oquequinaje jayojja jama ecuea esohui shajja'ajja majje quea bihui nee enijje jjapeecuajji'ajjaquiiani. ¹⁷Jamatii ecuea esohui jayojja jama ba'e tiitii ajja. Eso' mei biajje pohua esajja joca'yajo mano'yani jayojja jama poani; pea cuaa oya napa cajje, Eyacuiñajji nijje jjapeepajeaqui'yani. ¹⁸Beca cuana eso' acuisha nijje pohuani jama poani. Acuishaa bebo cajje jjajja ajja jayojja jamaya ecuea esohui shajja'ajja majje jjapee nishoquiiani. ¹⁹Jamatii oya cuana quea bejjo nahue poanijo aquianajo quea huiso jjashahuabaquianijo, quea mete pea'ai poanijo Eyacuiñajjijo chaco ajja. Esohui pajea cani. ²⁰Eso' meshi quea pame neejo pohua majje quea jjajja huiso poanaje jayojja jama ca ca beca cuana; ecue sohui shajja'ajja majje jjabahuejjaquiiani; ecuea epeejji quea ja'a nee nee poani, pea cuana ejo jjabahuejjaqui meesahua cani; iye huiso pojja'a, quea huiso pojja'a, quea huiso nee nee pojja'a —Jesosaa oya cuana acanaje. Mahuiso.

Esohui ebameesahuajji cuaquijijijo
(Noca 8.16-18)

²¹Majoya Jesosaa pea esohui ebameesahuajji huohui canaje cuaquijijijo jama ba'a: —¡Bacue! Cuaquijiji dedo majje eseyaya nequia ajja tepe quimejjeje. Ejaajji quimejjeje pea'ai nequia ajja. Chojja, de. Acui ecaca biajje nequia'aña equi jeaja'ajji. ²²Jiquio ecua dedo majje cuaquijijiya eyajo nequia ojjaña jeaja'a cani jama jayojja Eyacuiñajjiya ojjaña ecuea esohui onaya ba mee caje'yo quijje. E'e, ojjaña ecuea esohui miquianajaya eba jjeya, Eyacuiñajjiya quijje pea cuana ba mee caje'yo. Quea ja'a nee poaje'yo. ²³¡Jamajjeya miquianaaya quea shajja ja'aa shajja'ajjacue! ¡Ecuea esohuijjo jjashahuabaquicue!

²⁴Majoya Jesosa ojjaña nijje jama poanaje pea'ai ba'a: —¡Ecuea esohui shajja'ajja majje ecuea esohui shahuaba neineicue; jama acue!

E'e jjashahuaba neinei-quianijo, Eyacuiñajjiya mi-quianaya quea huiso nee nee ba meesahua caje. Oe pojji jjashahuaba-quianijo ca ca oe pojji ba meesahua caje. ²⁵Jamajjeya joya Eyacuiñajjiya esohui ba cani quea huiso pishana, quijje quea huiso nee ba mee caje'yo. Joya ojaya esohui ba sa po ajja ca ca pajea caje'yo. Mahuiso —Jesosa poanaje.

Esohui ebameesahuajji eso' pohuanijo

²⁶Majoya Jesosaa oya cuana huohui canaje pea esohui ebameesahuajji. Jama poanaje ba'a: —Eyacuiñajjiya esohui ejo ebanajjiya eso' bana canaje jama. Eso' ache bame nee quecua canaje quejo, anoso pojja'a. ²⁷Majoya ojjaña echacojji cuana ecahuijaajo, epojjajo po'ayequequijo pea'ai eso' pohuani, tiiani pea'ai. Jamatii ojaya ba jjima achajja shai eso' tiiani. ²⁸E'e, meshi quea pame neejo bana eso' jamatii pohuani, tiiani. Tii majje jjajjani. Majoya jamatii jahuani. ²⁹Jahuajo, eque meseya echacojji cuana huoojea cani anoso sejja'yohua. Jiquio ecua eso' tii majje quea jjajja huiso poani jayojja jama ecuea epeeji cuana jjeya oe pojji yani; jamatii quijje quea huiso nee nee poaje'yo. Majoya ojjaña jjachichacui mee caje'yo Eyacuiñajji cojja nei enequijji —jamaya Jesosaa huohui canaje.

Esohui acui so' che biso nee neejo, motasa bajjanijo

(Mateo 13.31-32; Noca 13.18-19)

³⁰Majoya Jesosaa pea esohui eba meesahuajji huohui canaje jama ba'a: ³¹—Eyacuiñajjiya esohui ojaya epeeji cuanajo jama pea'ai ba'a: Motasa bajjani eso' bana cani equi quibojo. Jiquio eso' che biso nee nee. ³²Tii majjeya ca ca quea cui quemo nee poaje, apo'e cui quemajja. Jamajjeya cuichojji cuana poeyani motasa acui biajje cahuiya —jamaya Jesosaa huohui canaje ojjaña ba meejji quijje Eyacuiñajjiya epeeji cuana quea huiso nee, quea ca'a nee nee po mee caje'yo.

³³Quea huiso nee pea esohui ebameejji Jesosaa huohui canaje Eyacuiñajjiya esohui eba meesahuajji. Onaya quea jjashahuabaqui ja'a pishanajo mi huohui tiitii canaje. ³⁴Esohui ebameesahuajjijo ca ca oe ojjaña sohuihuohui canaje Jesosaa. Majoya ona poqui'yajo ohuaya o shajja'ajjajji nei ba meesahua canaje.

Beni quea quemo nee nee

(Mateo 8.23-27; Noca 8.22-25)

³⁵Ma pojjajoya siniajo Jesosaa o shajja'ajjajji cuana iyaa canaje; jama acanaje ba'a: —Cua'a, Janinea bae ojje miji yasijje ebesapoqui —poanaje.

³⁶Jamajjeya ojjaña cuana bae sahuajo ani equi yasijje huoojea majje o shajja'ajjajji cuana bishe ai yasijje nequisohuaquinaje Jesosa ani yasijje, ojje besapoquinaje. Pea cuana ca ca bishe sisi cuanajo besapoquinaje Jesosa quishishi. ³⁷O besapoquianijo beni quea quemo nee nee poeyanaje. Ena shajohua bishe nane canaje. Jeasohuajea canaje. Cuio canaje enaa. ³⁸Bishe ai yiyedojojo Jesosa cahuijaanaje, ehoojjajajji biajje jaa. O shajja'ajjajji cuaa

quea mete po majje Jesosa ishe acanaje. Jama poanaje ba'a: —Emeshi Mese Jesosa, ¡shequicue oe! ¡Coya aje se hui!'ya! —taanaje.

³⁹Shequi'yo majje Jesosa nequisohuanaje. Beni tecuea canaje jama ba'a: —Beni, jamaya, ¡nequioquequicue oe! —majoya bae ena nijje jama poanaje—; ¡a' enashajo pojji!

O jama mimime poajo, enashajo popajea'yonaje. Ena shajoma'yo poanaje. Beni popajea'yonaje. ⁴⁰Majoya Jesosaa o shajja'ajjajji cuana jama acanaje ba'a: —¿Apiojji acuae nequiana quea mete nee nee poani? ¿A'a mi ejo e'e nei pojjeama poani? Jamajjeya meteani.

⁴¹Jamajjeya oya cuana bishe aijo ani Jesusajo quea bihui nee poanaje. Ojee miminaje jama ba'a: —¡Ache dejja shai jiquio quea sohui poja nee nee! Beniya, enashajo cuaa pea'aiya oja sohui shajja'ajja cani —ojjaña poanaje.

Dejja quea mase nee nee Jesusaa niñe poquipajea mee ca'yonaje
(Mateo 8.28-34; Noca 8.26-39)

5 ¹Jesosa o shajja'ajjajji cuana nijje besapoquinaje Janinea bae oje miji yasijje, Jjanana meshi yasijje, Jenesane dejja cuanaja meshi yasijje. Jesosa bishe aijo ani ba'eñaqui majje etaja huasijje nequisohuaquinaje. ²Ma meshijo dejja niñepoqui quea mase nee nequi. Eshahua quea huisohua oja eyami nequijji aca'yajje, ma dejja jjanijjo emano'yo sa' jaajo nequinaje. ³Majo tii oya ba'e'yonaje jjanijjo, ma emano'yo huananobia cajijjo tii. Oya quea mase nee nee jjejojo jeyo'ajja canaje cuaa cadenaa. Jjajeyo meequi ajja, quea ca'a nee nee poanaje. ⁴Yahuajo onaaya ojaya eme', ejiojji pea'ai jeyo'ajja huicha'a huicha'a canaje cadenaa, jjonohua pea'ai. Jamatii ohuaya cadena cuana jjequisejjajjea canaje, sejjauipiquipijjea canaje. Onaaya oya jjabahuone meequi ajja, quea mase, quea ca'a, de. ⁵Mecajje, epojjajo pea'ai oya eyiyo cuanajo, jjeni cuanajo pea'ai siasia'ani'yonaje. Jjajehuijeaqui'arinaje meiya. ⁶Jamajjeya oya niñepoqui Jesosa quea huesha nee ba majje o que jaoquecuajinaje. Quea ajjajja jjejojo ecui'oshajjajo nequinaje Jesosa bihuijji. ⁷⁻⁸Jamajjeya Jesusaa eshahua huoojeacuayajjea ca'yonaje; jama poanaje ba'a: —¡Eshahua dejjajo nequi, cuayaqui'yocue! —Jesosaa acanaje.

Eshahua taaa neineinaje jama ba'a: —Jesosa, miya Eyacuiñajji quea ca'a neeja Bacua Ejja. ¡A'a jjeya eya quea nee nee po meeji! Eyacuiñajji huohuicue jama ba'a: “Jjeya eshahua ecuea enapajji pojjeama” acue —eshahua poanaje.

⁹⁻¹⁰—¿Ae bajjani miya? —Jesosaa oya acanaje.

—Ecuana quea huiso neejo Quea Shahua Huiso bajjani —saja'a canaje niñepoquiya—. Che mo miyaya ecuana dejjajo nequi cuayaqui mee'yo majje ¡a'a quea huesha nee huoojeajji! —poanaje eshahua cuana.

¹¹Quea chipi nee cuichi cuana quea huiso ijji'ijji'ijji nequi. ¹²Jamajjeya eshahua cuaa Jesosa jama huohuime acanaje ba'a: —Che ecuana dejjajo nequi huoojeacuayajjea majje ¡cuichi cuana huasijje ecuana huoojea'yocue!

¹³—E'e, ¡poquicue cuichi cuana huasijje! ¡Dobiquicue! —Jesosa poanaje.

Jamajjeya dejja niñepoqui jeanana'yo majje eshahua cuana cuichi cuana huasijje dobiquinaje, ojjaña. Dobiqui majje cuichi cuana cuajicuaji jaaoquequinananaje. Bae quea sahua doe nee nee yasijje cuichi cuana hui'l'yonaje, ojjaña, beca mil huisome. ¹⁴Ba majje cuichi jaahuanajji cuana jjajjasoquinaje. Cuajicuajipoquinaje cuiñajji yasijje huohui pohua. Ojjaña equi yasijje huohui capoquinaje eshahua cuanajo. Cuichi cuanajo, dejja niñepoqui'yo jjima po mee canajejo pea'ai huohui canaje. Jamajjeya ojjaña cuana ma cuiñajjijo ba'e poeyanaje Jesosa baa; dejja niñepoqui'yo jjima baa pea'ai: —¿Ae shai poanaje, de? —poanaje cuana.

¹⁵Jesosa que poe majje ojjaña dejja niñepoqui'yo jjima ba canaje. Jjeya oya quea bei nequi, daquijji, quea pame nee jjashahuabaquiani. Eshahua cuana chama'yo. Jamajjeya ojjaña cuana quea mete poanaje Jesosajo, ¹⁶eshahua huoojeacuayajea mee ca'yonajejo, cuichi cuana ehui'l'yojojo pea'ai. Jamajjeya cuichi jaahuanajji cuaa pea cuana huohui majamaja canaje niñepoquijo, Jesosaa eshahua huoojeacuayajea canajejo, cuichi ehui'l'yojojo pea'ai. ¹⁷Ojjaña quea mete nee poanaje. Huohui canaje jama ba'a: —¡Jesosa, pea meshi yasijje poqui socue oe! Quea mete ca ñña mijo mi quea sohui poja nee nee jojoya —poanaje ojjaña.

¹⁸Jamajjeya Jesosa bishe ai yasijje nequisohuaquinaje ojje ebesapoqui'yojji. Dejja ma niñepoqui poanaje onijje poqui sa poanaje, onijje e'anijji. ¹⁹Jamatii Jesosaa oya jama acanaje ba'a: —Chojja, ¡miquea equi yasijje poquicue! ¡Miquea huapa pojjeama cuana huohuicue ejo, Emeshi Mese neijo, ma miya ecuea quea boti neejo quea pame nee anaje huohuicue! —Jesosa poanaje.

²⁰Jamajjeya ojaya equi yasijje poqui majje ohuaya Jesosajo huohui canaje. Ome Miji pea'ai Cuiñajji yasijje huohui canaje pea'ai. Ojaya esohui shajja'ajja majje ojjaña quea bihui nee poanaje: —¡Ache dejja quea ca'a nee nee Jesosa! ¡Eshahua cuana huoojeacuayajea ca'yonaje, de. E'e e, dejja niñepoqui quea pame nee jjeya, de! —poanaje ojjaña.

Jainoja ebacua piona emano'yojaa; pea epona najji poani tii tii

(Mateo 9.18-26; Noca 8.40-56)

²¹Majoya Jesosa o shajja'ajjajji cuana nijje bae ojje miji yasijje poqui o'oyanaje bishejje. Quea huiso cuana jjachichaqui o'oyanaje o que, Janinea bae sahuajo. ²²Jesosa ojjaña cuana nijje mimianijo, pea Jodio dejja o que poeyanaje Jaino bajjani, ma Jodioja ejjachichaquijji equi jaahuanajji poani. Ecui'oshajjajo nequiya oya bihuia canaje. ²³Jama poanaje ba'a: —Esohui huohuijji, ecuea ebacua piona quea mano nee nee jaa, beshahua nee poquijeyonaje. ¡Ecuea equi yasijje poecuajicue o napa'ajjaa emeya! Jamajjeya oya huaquijaje'yo. Quea aja nee poaje'yo.

²⁴Nequisohua majje Jesosa o shajja'ajjajji cuana nijje poquinaje Jaino nijje. Quea huiso cuana poquinaje onijje pea'ai, ojjaña Jesosa nijje nequi canaje cuana. ²⁵Poquije, oe eponaa Jesosa ba canaje. Oya quea mano, najji popajea'yo ajja. Ome miji pea beca, 12 shequijame na cuayapajeaqui'yo ajja

poa. ²⁶Quea huiso eshicuijji quiajji cuaa oya na cuayapajeaqui mee'yo jjima acanaje. Jamajjeya eshicuijji sosejje ojjaña ojaya ejjeshejji oe poanaje. Jamatii na' huosa jjima tii, quea nee tii. Yahuajo quea mano pishana poanaje; jjeya ca ca quea mano nee nee. ²⁷Jesosajo shajja'ajja majje, ma Jesosaa ojjaña huaquia mee cani shajja'ajja majje oya poeyanaje o que. Quea huiso nequi dejja tejjee poeyanaje epona. ²⁸Jamaya oya jjashahuabaquinaje ba'a: —Eya Jesosa daqui napa majje na huosaje'yo —jama jjashahuabaquimeya poanaje epona.

²⁹Jamajjeya Jesosaja daqui quehuajje napa canaje. Jjeyahua nei najji po paje'yonaje. Ma epona quea bihui nee jjashahuabaquinaje: —E'e e jjeya nei eya na cuayapajeaqui'yonaje, apoa po'yonaje.

³⁰Jesosa epona nahuosa mee'yo jeahuajo jjashahuabaquinaje jama ba'a: —E'e nei, jjeyahua nei Eyacuiñajjiya a'ya shai huaquia mee ca'yonaje e daqui napa'ajja cajo.

Jjeyahua nei Jesosa jjabajeaquinaje. Ojjaña cuana ejjachichaqui nequi huohui'ajja canaje jama ba'a: —¿Aya acuae ecuea daqui napa'ajja canaje so'o?

³¹O shajja'ajjajji cuana onijje jama poanaje ba'a: —Jesosa, quea huiso nee nee ejjachichaqui nequi minijje. Jamajjeya ¿yajjajje shai miyaya huohui'ajjaña jama ba'a: “¿Aya shai ecue daqui napa'ajja canaje?”

³²Jesosaa ca ca bajea neinei canaje epona ena huosa'yo ebajji.

³³Jamajjeya ma epona ojaya emanomeejji chama'yo ba majje Jesosa que poqui'yonaje; Jesosa yajjajo piopionaje. Ecuio'oshajjajo nequiya Jesosa huohui canaje ohua na' huosa mee ca'yajje. Ojjaña huohui canaje eponaa.

³⁴Majoya Jesosaa oya acanaje jama ba'a: —¡She, quea bihui nee pocue! Miya quea ja'a jjashahuabaquinaje jama ba'a: “E'e jojo nei Jesosaa eya huaquia mee caje'yo”. Jamajjeya eyaya miya huaquia mee'yonaje. ¡Quea quijijji jaji oe po'yocue! ¡A'a manoshishi o'oyajji! —Jesosaa acanaje.

Epona sho'i eshe po mee ca o'oyanaje

(Mateo 9.23-26; Noca 8.49-56)

³⁵Majoya Jesosa epona nijje mimianijo tii, Jainoja epeejji poeyanaje. Jama poanaje ba'a: —Jaino, miquea ebacuase mano'yonaje. Chama'yo tii po'yonaje. ¡Jamajjeya esohui huohuijji a'a iyaajji equi yasijje o baa! —poanaje.

³⁶Jiquio esohui shajja'ajja majje Jesosaa Jaino jama acanaje ba'a: —¡A'a quea yeno pojji! Jamaya jjashahuabaquicue ba'a: “Jesosa quea ca'a nee nee. Ohuaya ecuea ebacuase shequi mee caje'yo e'e jojo nei” acue.

³⁷Majoya Jesosaa pea cuana huoojja canaje jama ba'a: —¡A'a enijje poquijji! —poanaje.

Jamajjeya Jesosa, Peno, Satiaco, oja chahua Huani ca ca oe Jaino nijje poquinaje oja equi yasijje, oja bacua baa. ³⁸Jainoja equi yasijje poqui majje ba cañaquinaje quea huiso dejja cuana, ponaña pea'ai equijo nequi. Epona sho'i emano'yojo ojee pa'ani. Ojjaña quea shajjaquijjo poani. Dehwe mia cani emojea'yojjijo pea'ai. ³⁹Equi yasijje dobiqum majje Jesosa jama

poanaje ba'a: —¿Yajjajje acuae pa neineiani, quea shajjaquijjo nee poani nequiana? Jiquio epona sho'i epoquijeyo'yo pojjeama. Oya cahuijaa.

⁴⁰—Chojja de, oya mano'yonaje, de; shequi'yo ajja —poanaje cuana.

Ojjaña cuana esecue yasijje huoojeacuayajea majje Jesosa o shajja'ajjajji cuana nijje, ejeajji nijje, enaese nijje cuanaya epona sho'i jaa huasijje dobiquinaje pea equacuayijji yasijje. ⁴¹Me' iña majje epona sho'i oja sohuijo huohui canaje: —¡Tanitacomí!

Ese Ejja esohuijo ca jama poanijje ba'a: —¡Epona sho'i, nequisohuacue! —Jesosaa acanaje.

⁴²Me' iña majje epona sho'i shequi mee ca'yonaje. Jjeyahua nei oya nequisohua majje jeo'yonaje. E'e, oya etii pishana, ahuema' ani, 12 shequijame.

Jamajjeya epona sho'i shequi mee ca'yonaje ba majje ojjaña cuana jjajjasoaquinaje; jama poanaje ba'a: —¡E'e jojo nei Jesosa jjashequimeequi'yojji, de! Jiquio epona sho'i emano'yojaa jjeya nei shequi mee ca'yonaje, de —poanaje.

⁴³Jesosaa ojjaña huohui canaje jama ba'a: —E'e, ¡jamatii a'a jjeya pea cuana huohuijji jiquio eya mique bacua shequi mee'yonajejo!

Majoya Jesosa jama poanaje enaese nijje, ejeajji pea'ai nijje ba'a: —¡Miquea ebacua piona bobiacue! —poanaje.

Jesosa Nasanena meshi yasijje poqui'yonaje

(Mateo 13.53-58; Noca 4.16-30)

6 ¹Majoya Jesosa jomajo ani poqui o'oyanaje ojaya cuiñajji yasijje, Nasanena huasijje. O shajja'ajjajji cuana nijje poquinaje. ²Epojja ejomishocajijjo Jodioja equi ejjachichaquijji yasijje poqui majje dobiquinaje. Esohui huohui canaje. Ojaya esohui shajja'ajja majje ojjaña cuana quea tecue nee poanaje, Nasanenajo ba'eca cuana. Oya Jesosa Joseja jea poso acanaje cuaa.

—¡De! ¿Yajjajje shai jiquio dejjaa Jesosaa esohui quea ja'a nee nee huohui cani? ¿Eyacuiñajji jayojjaya jjaajaqui mee ca'yani emanojaa quea huiso nee, de? ³Oya aje oe acui cacajijja bacua ejja pojja'a. Oja nae Mania bajjani, oja chahua cuana Jacobo, Jose, Simohui, Jonasa pea'ai bajjani. Oja jjo'i cuana pea'ai jiquiojo ba'e.

Jamajjeya quea quene poanaje Jesosa nijje; Joseja jea poso cajaa acanaje cuaa. ⁴Jamajjeya Jesosaa oya cuana jama acanaje ba'a: —E'e de, pea cuaa Eyacuiñajjija esohui huohuijji shajja'ajja cani. Jamatii ojaya cuiñajjijo ojaya huapa pojjeama cuana ca ca oe o shajja'ajja sa po'yo ajja. Oya jayojjaya miquianaya e shajja'ajja sa po'yo ajja.

⁵Jamajjeya oya cuana shajja'ajja sa po'yo ajjajo, oya Eyacuiñajjija Bacua pojjeama posojo, Jesosaa oe pojji napa'ajja caje jjaajaqui mee ca'yonaje. Ma dejjaa ajjima acani oe pojji nei acanaje Nasanenajo. ⁶Jamajjeya Jesosa jjashahuabaquinaje jama ba'a: —¿Yajjajje shai Nasanenajo ba'eca cuana quea sapa ca'a poani? Ejo e'e nei jjashahuabaqui ajja —poanaje.

Jamajoya Jesosa o shajja'ajjajji cuana nijje poquinaje quea huiso cuiñajji sisi cuana huasijje esohui huohuiya.

Jesosaa o shajja'ajjajji huoojea canaje esohui huohuiya

(Mateo 10.5-15; Noca 9.1-6)

⁷Majoya Jesosaa o shajja'ajjajji 12 huisome iyaa canaje o que. Oya cuana quea ca'a po mee canaje eshahua cuana huoojeacuayajea'yojji, ojjaña emanojaa cuana huaquia mee'yojji, ejjaajaqui mee'yojji pea'ai. Oya cuana becaniejijji pea'ai huoojea canaje ojaya esohui shajja'ajjajji cuana pea cuiñajji cuana huasijje ojaya esohui huohuiya. ⁸Huohui canaje jama ba'a: —¡Jjeya a'a aquiana dojojji! ¡Oe acui ejjaquecuaca'aquijji dojocue, beca pojjeama! ¡Bashosoco bobi dojojji a'a dojojji! ¡Ejjeshejji, bobi pea'ai a'a dojojji! ⁹¡Ejiojji shejee oe huosho'yocue! ¡Daqui oe nei, ma miquea eyamijo ba'e nei oe dojocue, beca pojjeama! ¹⁰¡Pea cuiñajji yasijje poqui majje sa'ajjacue oe dejja miquea epeeji epojji, joya bei bei! ¡Ojaya equijo anicue ma cuiñajjijo nequi majje! ¹¹E'e pojja'a beca equijo, beca cuiñajjijo miquea esohui shajja'ajja sa po'yo ajjajo, niñeba canijo pea'ai, ¡oya cuana jeajeana'yocue! Poquije'yohua jama acue ba'a: “Eyaya miquianaya cajaa aje'yo, quea mimishi mi coma. Eyacuiñajjiya miya ba cani quea mimishi nee nee. Ohuaya miya quea nee nee po mee caje'yo” acue —Jesosa poanaje.

¹²Jamajjeya Jesosa shajja'ajjajji cuana poquinaje. Ojjaña cuiñajji cuana huasijje esohui huohui canaje. Jama poanaje ba'a: —¡Miquea mimishi cuanajo quea yeno pocue! ¡Mimishi pajea'yocue Eyacuiñajjija epeeji ep'yojji! —acanjje cuaa.

¹³Quea huiso eshahua cuana dejja cuanajo nequi huoojeacuayajea ca'yonaje. Quea huiso emanojaa cuana acuijjajja seiyiya shicui majje jjaajaqui mee ca'yonaje, huaquia mee ca'yonaje pea'ai, Jesosa shajja'ajjajji cuaa.

Enode Antipaa Huani sapa jajasejjajjea mee canaje

(Mateo 14.1-12; Noca 9.7-9)

¹⁴Jesosa Janinea meshijo anijo, Janinea meshi meseya Enode Antipa bajjaniya shajja'ajja canaje onaja ehuohui'yo ojo. Beca cuana Jesosa Huani shequi o'oyanaje poso acanaje jama ba'a: —E'e nei jiquio dejja aje oe Huani, ma ona besameejji poa. E'e pojja'a oya mano'yo majje shequi o'oyanaje. Jamajjeya ohuaya Eyacuiñajjiya jayojjaya acani, ma dejjaa ajjima acani —poanaje beca cuana.

¹⁵Pea cuana ca ca jama poanaje ba'a: —Chojja, oya etiiquiana Enia, ma yahuajo nei Eyacuiñajjija esohui huohuijji poanaje poe o'oyanaje.

Pea cuana ca ca jama poanaje ba'a: —Oya ca ca oe Eyacuiñajjija esohui huohuijji eyacua, yahuajo nei nei ba'e Eyacuiñajjija esohui huohuijji jayojja jama.

¹⁶Enode Antipa ca ca onajaya ehuohui'yo Jesosajo shajja'ajja majje quea mete nee jama poanaje ba'a: —E'e de, yahuajo ecuea esohuijo Huani sapa jajasejja ca poa. Oya shequi o'oyanaje e'e jojo nei. Jamajjeya Eyacuiñajjiya jayojjaya acani ma dejjaa ajjima acani; quea huiso huaquia mee cani —poanaje Enode.

¹⁷E'e, yahuajo emeshi mese Enode Antipaja edoe mese Penipeja ehuanase Enodiasi bajjani Huani nijje quea quene nee nee poa. Jamajjeya Enode Antipaya Huani iña mee ca poa; jeanobiajea mee ca poa. Enodiasiya aje oe oja yahue huei ca poa Enode nijje eba'ejji, ojaya esha mese nijje eba'ejji. ¹⁸Jamajjeya Huaniya yahuajo Enode Antipa jama tecueame aca poa ba'a: —¡Miyaya aje oe mique doeja, Penipeja ehuanase Enodiasi a'a huana'yojji! Jamaya quea mimishi —Huaniya aca poa.

¹⁹Jamajjeya ohua tecuea cajje quenequenea poa Enodiasi Huani nijje. Quecua sa aca poa. Jamatii quecua jjiima; ²⁰oya Enode quea mete poanaje. Oya jashahuabaquinaje Huani Eyacuiñajji esohui huohuiji nei nejjojo, ojaya epeeji nei poanaje. Jamajjeya nahue canaje Enodiasiya equecua ca poaje jjejojo. Huanija esohui shajja'ajja sa poa Enode Antipa, jamatii ojaya quea quehua. Huani equi ejjajeantibiaquijji jaa iyaa huicha'a huicha'a canaje esohui huohuiya. ²¹Jamatii quijje Enodiasiya Huani sapa jajasejja mee canaje. Jiquio jama poanaje ba'a: Enodeya o cuaya poa pojajajo ojjaña ojaya epeeji cuana iyaa canaje ojee ijja'ijjiaa, majamajaqui baa pea'ai. Ojaya echaco meesahuaji, dejja etii cuana, sohuinano huooejji poani cuana pea'ai, Janinea meshijo ba'e dejja etii cuana pea'ai quea huiso nee nee iyaa canaje. ²²Ojjaña ijja'ijjia'anijo, Enodiasija bacuase pea'ai oe nei majamaja nequinaje ojjañaja ebajji, quea bihui nee epo meeji. Enode Antipa quea bihui nee nee poa epona sho'ijo. Jamajje onijje miminaje jama ba'a: —¿Ae shai sa miya poani? ¡Huohuicue mo! Eyaya joya miya sañaya quiaje e'e jojo nei, she —acanaje Enodeya—. ²³E'e jojo nei she coya miya saje aje mi quiaje; miya huohuianaya ca mi ca quiaje, ecue meshi sejja aje mi quiaje miquea epojji —huohui neinei canaje Enodeya.

²⁴Jamajjeya epona sho'i poquinaje ojaya enaese Enodiasi huohui'ajjaa. —E'e —oja nae poanaje—, e'e, ¡Huani sapa jajasejjajea meequicue she!

²⁵Epona sho'i poe o'oyanaje Enode que. Huohui canaje jama ba'a: —Huani, ma ona besameejji poani ejeantibiajaa. ¡Ojaya esapa jajasejjajea'yo majje piatojo jjequicue jjeyahua nei! Maya eya sa poani.

²⁶Ma shajja'ajja majje emeshi mese Enode quea ajjajja nee nee poanaje. Jamatii ojaya esohui epona sho'i nijje ojjaña ojaya epeeji cuana shajja'ajja canaje. Jamajjeya ojaya esohui pajea ajja, Enodeja. ²⁷Jamajjeya ohuaya sohuinano cuana huoojea canaje: —¡Epona sho'ija esohui jayojja jama acue! ¡Huani ma ejeantibiajaa oe sapa jajasejjajeaquicue! ¡Jjequicue jjeyahua nei! —poanaje.

²⁸Jjeyahua nei sohuinano cuana poquinaje Huani que. Huani sapajajasejjajea ca'yonaje. Esapa jjequi canaje piatojo. Epona sho'i quia canaje. Majoya ohuaya Huanija esapa oja nae yasijje quia cañaqui'yonaje, epona sho'lya. ²⁹Majoya aje oe Huani shajja'ajjaji poani huohui canaje cuaa. Jamajjeya oya cuana poeyanaje o dojo'yohua, emojea'yojji. Mojea'yo majje papoqui'yonaje Jesosa huohuiya.

Jesosaa 5.000 dejja cuana bobia canaje
(Mateo 14.13-21; Noca 9.10-17; Huani 6.1-14)

³⁰Majoya quijje pishana Jesusaja huoojea'yo cuana ojjaña cuiñajji yasijje esohui huohuiya poqui huacuaya poe o'oyanaje o que. Oya cuana huohui poñaquinaje ojjaña ohua acanaje, ojjaña ojaya esohui ma ohua huohui canaje pea'ai huohui canaje Jesosa huasijje. ³¹Quea huiso nee nee dejja poe majamajanijo ijia'ijia meeme ajja. Jamajjeya Jesusaa oya cuana acanaje: —¡Cua'a, dejjama huasijje ejomishocaqui! Quea huiso nee nee ejjachichaqui nequi cuaa se ijia'ijia mee jjima acaje —Jesosaa acanaje.

³²Jamajjeya Jesosa o shajja'ajjajji nijje nequisohuaquinaje bishe ai yasijje. Besapoquinaje quima huasijje. ³³Jamatii Jesosa besapoquije ba majje quea huiso dejja cuana cuiñajji cuanajo ba'e ejiojjijje poqui canaje Jesosa baa. Poquicuajinaje ma Jesosa besapoquije yasijje. Ebionei jjaja onaya aniñaquinaje, Jesosa hui que añaquiya. ³⁴Quijje pishana Jesosa o shajja'ajjajji cuana nijje ba'eñaquinaje. Bishe aijo ani nequisohuaquinaje etaja huasijje. Quea huiso nee nee cuana ba cañaquinaje. Onajo Jesosa quea yeno jjashahuabaquinaje. E'e, oya cuana quea yeno, quea mano nee ñajjajja jaahuana jjima jayojjaya. Jamajjeya oya cuana sohuihuohui canaje quea huiso nee nee Jesusaa. ³⁵Siniajo Jesosa que poe majje o shajja'ajjajji cuaa huohui canaje jama ba'a: —Jesosa, sinia coma, de. Chama' jiquiojo bobi, equi pea'ai. ³⁶¡Dejja cuana huoojeacue cuiñajji sisi cuana huasijje oja bobi jjesheya!

³⁷—Chojja. Ca'aniahua cuana. ¡Bobiacue oe miquiaaya! —Jesosaa acanaje. —¿Yajja yajji? Ecuanaa bobi quea huiso nee nee jjeshe ajja. Quea nahue nee nee, de, 200 epojja echacojji sosejje. E'e, quea huiso pojajjo chaco majje sosejje, pahui jjeshe cajji, ca ojjaña bobiajji.

³⁸Jamajjeya Jesusaa jama acanaje ba'a: —¿Ache huiso pahui yani esejaya? ¡Pahui baquicue!

Ba majje oya cuana jama poanaje ba'a: —Jesosa, esejaya bobi oe pojji yani. Me oejje pahui, beca nahuoo sisi yani pea'ai —poanaje o shajja'ajjajji cuana.

³⁹Jesosa jama poanaje ba'a: —Ojjaña cuana jama acue ba'a: “¡Ojjaña anioquecue sipone biajje!” acue —Jesosaa acanaje—. ¡Ojee jja'anichicha meequicue! ¡Anijji becabeca anioque meeme acue!

⁴⁰Jamajjeya quea huiso sipone yanijo, ojjaña cuana anioque mee canaje sipone biajje. Jomajo iye huiso anioquenaje, 50; quea huesha pishana iye huiso anioquenaje, 100. Jamaya anioque bamebamenaje cuana ojjaña, de.

⁴¹Majoya Jesusaa me oejje huiso pahui, nahuoo sisi becanejjijji pea'ai jjeshe majje eyahuasijje jjabajehasohuaquinaje Eyacuiñajji nijje emimijji. Bobijo mimi majje pahui miji canaje. O shajja'ajjajji cuana quia mee canaje dejja cuana e'anioqueani yasijje. Nahuoo sisi pea'ai miji majje quia mee canaje ojjaña huasijje. Quia capoquijjeya quea huiso nee nee jjapanaqui poquipoquinaje bobi, de. ⁴²Jamajjeya ojjaña ijia neinei canaje. Quea jeje poanaje. ⁴³Ojjaña jeje

majje eshajja'ajjajji cuaa chicha ca'yonaje bobi ojñaña ijjisejja. Jjepai ai yasijje iya ca'yonaje. Quea huiso nee poanaje, 12 jjepai huisome quea cuata poanaje bobi e'ijjisejja. ⁴⁴E'e, Jesosaa quea huiso nee nee bobia canaje, de, 5.000 dejja.

Jesosa bae ena biajje poquinaje
(Mateo 14.22-27; Huani 6.16-21)

⁴⁵Jjeyahua nei siniajo Jesosaa o shajja'ajjajji cuana huoojea canaje. Jama acanaje ba'a: —¡Bishe ai yasijje nequisohuaquicue! ¡Bae ojje miji yasijje besapoquicue Betesaida cuiñajji yasijje! Quijje eya poquije mi que, pea cuana huoojea'yo majje —poanaje.

⁴⁶Majoya dejja cuana quea huiso cuana huoojea'yo majje Jesosa eyiyo huasijje jaasohuaquinaje oe nei oja Chii nijje mimiya. ⁴⁷Mecajje Jesosa oe nei jomajo aninaje, eyiyojo. O shajja'ajjajji cuaa ca ca bishe ai quea huesha nee yo canaje, bae yiyesama huasijje. ⁴⁸Jomajo ani Jesosaa oya cuana ba canaje, janobajjima nei yoyo'ajja ba'e. E'e, beni quea quemo nee poeyanaje. Bishe cuiajea ca'yonaje huacuaya. Enashajohua bishe janobajjima nei nane canaje, cuio canaje enaa. Mecashono quea apo nee nee poanaje. Jamatii Jesosa eyiyojo ani o que poquinaje ena biajje. ⁴⁹Jesosa ena biajje jeojejebeje ba majje o shajja'ajjajji cuana quea mete nee nee poanaje. Quea metejo taaanaje jama ba'a: —¡Coya ae shai poeje ba'a! —siasianaje—. ¡Coya eshahua, de!

⁵⁰Jamajjeya Jesosaa oya cuana huohui canaje jama ba'a: —¡A'a quea mete pojji! Eya jja iña jiquio, eshahua pojjeama. ¡Quea jaji nee pocue!

⁵¹Majoya Jesosa bishe ai yasijje aniajo, beni nequioquequi'yonaje. Jamajjeya ojñaña cuana bishe aijo aniya jjajjasoquinaje. Quea jaji nee po'yonaje: —E'e pojja'a, e'e jojo nei, de —poanaje.

⁵²E'e, Jesosaa ma dejjaja ba jjima acanaje; 5.000 dejja cuana bobia canaje me oejje pahuijo. Jamatii oya cuanaja eba pojjeama Jesosa quea ca'a nee nee, ojñaña acani. Oya cuana ca ca quea jjashahuabaqui ja'a po jjima.

Cuichi cuana hui'i'ya poa meshi yasijje Jenesane' meshi yasijje
besapoqui o'oyanaje
(Mateo 14.34-36)

⁵³Quijje pishana bae ojje miji yasijje, Jenesane' meshi yasijje besapoqui o'oyanaje Jesosa. Ba'eñaquinaje o shajja'ajjajji cuana nijje. ⁵⁴Bishejo ani nequisohuaquinaje etaja huasijje. Dejja cuaa jomajo ba'eya Jesosa ba canaje yahuajo. ⁵⁵Jamajjeya o ba o'oya majje ojñaña iyaaqui canaje Jesosa que epoecuaajjiji. Ojñaña emanojaaca cuana equipajaajjijo jaa Jesosa que ye canaje. ⁵⁶Jamajjeya Jesosa cuiñajji quea quemo huasijje, pea cuiñajji sisi cuana huasijje pea'ai, equi cuana huasijje pea'ai dobiqui yajo, dejja cuaa emanojaa cuana jjequi canaje o que, jjaajaqui mee'yohua. Huohui canaje cuaa jama ba'a: —Jesosa, ojñaña emanojaaca cuana mique daqui che napa'ajja meecue ehuaquia'yojji, ejjaajaqui'yojji —acanje.

Ojjaña Jesusaja daqui napa'ajja majje jjaajananaqui'yonaje, huaquia'yonaje pea'ai, de.

Quea jjashahuabaqui tai poanijo quea tai poani

(Mateo 15.1-9)

7 ¹ Majoya Paniseo cuana, Jodio esohui huohuijji cuana pea'ai Jenosanenajo ba'e Jesosa que poeyanaje. ² Poe majje o shajja'ajjajji cuana ba canaje ijia'ijjia'ani eme' shacua neinei jjimajo. Jamajjeya Jesosa tecuea canaje Jodio etii cuaa. Jama poanaje ba'a: —Esohui huohuijji, ¿apiojji acuae mi mi shajja'ajjajji cuana eme' shacua neinei jjimajo ijia'ijjiani? —acanjaje Jodio etii cuaa.

³ E'e, ojjaña Jodio cuaa aje oe ijia jjimahuajo eme' shacua neinei cani; quea huiso shacuame acani, ⁷ huisome, ojaya etiiquiana cuanaja esohui jama. ⁴ Equi aquiana jjeshejji yasijje bobi jjeshe majje eme' shacua neinei cani ijia jjimahuajo pea'ai Jodio cuanaja etiiquianaja esohui jayojja jama. Quea huiso etiiquianaja esohui jayojja jama acani pea'ai: plato cuana, oña cuana, caneco cuana jamaya topo neinei cani pea'ai; meshimisi ca'a quea quemo cuana, e'anioquejji cuana jamaya topo neinei cani pea'ai. ⁵ Jamajjeya Paniseo cuana, Jodio etii cuana Jesosa nijje mimijajinaje: —Jesosa, ¿apiojji acuae mi mi shajja'ajjajji poanija esejaya etiiquianaja esohui jama po ajja? ¿Apiojji acuae ijia'ijjia jjimahuajo eme' shacua neinei ajja, de? —poanaje.

⁶ Jesusaa oya cuana quea tecue saja'a canaje jama ba'a: —iMiquianaya ca mi ca oe jjadasiaquiiji nei nei! Eyacuiñajjija esohui huohuijji Isaiaja esohui miquianajo e'e jojo nei poa. E'e, yahuajo nei Eyacuiñajjiya Isaia tehue mee ca poa jama ba'a:

“Jiquio dejja cuaa eya bihuia nisho cani. Jamatii jjashajja'ajjaqui ajja.

⁷ Jamajjeya ecuea equi yasijje jjachichaquiani ejjachichajeaquiiji. Ohuaya ojaya ejjashahuabaqui'yojji huohui cani, ecuea esohui pojjeama”.

Jamaya Isaiaa yahuajo tehue ca poa miquianajo —Jesosa poanaje—. ⁸ De, ¡yajja acuae nequiana poani so'o? ¿Apiojji acuae eya Eyacuiñajjija esohui pajea'yaña etiiquianaja esohuijo? ⁹ E'e, miquianaya jama poani ba'a: ¹⁰ Yahuajo nei Eyacuiñajjiya Moisesi tehue mee ca poa oja sohui jama ba'a: “iMique chii, miquea enaese etii pea'ai jaahuanacue! Joya oja chii, oja nae pea'ai cajaa acajo ¡cajajahuejjajea ca'yahua cuaa, meiya!” Jamaya tehue mee ca'ya poa yahuajo nei. ¹¹ Miquianaaya ca ca huohui tai yaña jama ba'a: “Dejja oja chii etii nijje, oja nae etii nijje pojja'a camimiyahua jama ba'a: “Eyaya miya eba'e meesahuajji pojjeama. Chojja, eyaya ecuea aquiana Eyacuiñajji yasijje quiaña o bihuiajji”. Jamaya huohui taiyaña miquianaaya. ¹² Jamajjeya oja chii etii, oja nae etii pea'ai pajea meeyaña, miquianaaya. ¹³ Eyacuiñajjija pea esohui quea huiso nee pajea mee'yo sa'ña etiiquianaja esohui yajji nisho —Jesusaa Jodio etii acanjaje.

¹⁴ Jamajjeya Jesusaa ojjaña cuana iyaa majje huohui canaje jama ba'a: —iShajja'ajjacue mo, jjabahuejja neineiquicue oe! ¹⁵ Bobi cuanajo, ojjaña aquiana

enabajje dobiqianijo pojjeama miqianaya quea mimishi poani. Chojja. Quea jashahuabaqui taijo, esohui quea tai miquea enabajje cuayaquianijo ca ca quea mimishi poani. Eyacuiñajjiya maya ba cani quea mimishi —Jesosaa acanaje.

¹⁶—E'e, ¡miqianaaya quea shajja ja'aa ecuea esohui shajja'ajja majje jama acue! ¡Jashahuabaquicue oe!

¹⁷Majoya Jesosaa ojjaña cuana jeanana majje equi yasijje dobiquinaje o shajja'ajjajji cuana nijje. Dobiqiu majje o shajja'ajjajji cuaa huohuiajja canaje: —Jesosa, ecuanajaya ca ca esohui quea quehua miquea. ¡Che mo oe ba meesahuacue! —poanaje.

¹⁸—¿A'a ecuea esohui miqianajaya ba jjiima pea'ai? —Jesosa poanaje—. ¿A'a miquea eba pojjeama? Eme' shacua neinei jjimajo pojjeama miqianaya Eyacuiñajjiya quea mimishi ba cani. ¹⁹¡Bacue! Ojjaña bobi, pea aquiana pea'ai enabajje ijiajaja majje see ai yasijje dobiqiani. Quijje jamatii seejeaje'yo. ²⁰Joya quea tai jashahuabaquianiya ca ca esohui tai jeacuaya cani. Maaya oya quea tai po mee cani: Quea mimishi Eyacuiñajjiya oya ba cani. ²¹E'e, ejjashahuabaqui'yojji quea taijo pea eponajo ba'e sa poani, peaja yahuejo ba'e sa poani, sii cani, sijje poani, pea quecua cani pea'ai, ²²quehuajje cojjo cani, quea dejja tai poani, quea nishehui poani, ojjaña mimishi acani, ona dasiajji poani, quea mimishi pea nijje ba'yani, pea jayojja ba'e sa poani, mimijajiani pea'ai. Jama poani ba'a: “Eya oe nee quea pame nee” poani, esho'i jayojja mimi naanaani, Eyacuiñajji niñeba cani pea'ai. ²³E'e jojo nei ojjaña joya jama acani Eyacuiñajjiya ba cani quea mimishi, quea mimijequijea; bobi ijia cani eme' topo neinei jjimajo pojjeama quea mimishi poani —jamaya Jesosaa o shajja'ajjajji cuana saja'ame acanaje.

Cananea epona Jesosa que poeyanaje

(Mateo 15.21-28)

²⁴Majoya Jesosa ma equijo ani poquinaje pea meshi yasijje. Tino pejejo, Sinono pea'ai pejejo aninaje. Jjeya Jesosa mimi sa po ajja ojjaña cuana nijje. Jamajoya equi yasijje quehua dobiquinaje o shajja'ajjajji cuana nijje. Jamatii oya quehuajje ani meeme ajja; jjanequiquehuaqui meeme ajja. ²⁵⁻²⁶E'e, jjeyahua nei oe eponaa shajja'ajja canaje Jesosa jomajo ani. Jamajjeya o que poeyanaje. Oya pea, Jodio epona pojjeama, Jieno pona pea meshijo ba'e, Sinia meshijo, Penisiajo ba'e. Ojaya ebacua piona huasijje eshahua yahuajo dobiquia poa. Jamajjeya enaese Jesosa que poe majje ecui'oshajjajo nequinaje o bihuiajji, onijje emimi neineijji. Jama poanaje ba'a: —Emeshi Mese nei, ¡ecuea ebacua piona jjaajaqui mee'yocue, quea mano nee nee jaa, quea niñe nee nee jaa! —enaese poanaje.

²⁷Ma enaese Jodio pojjeamajo, huapa jayojja. Jesosaa oya saja'a canaje jama ba'a: —¿A'a cuae ecue bacuaja bobi jeajeaje iñahuehuaja e'ijjiajji? ¿A'a cuae jamaya quea pame? —Jesosa poanaje.

²⁸Epona quea shoe jama jjejojo jama poanaje ba'a: —E'e, Emeshi Mese nei. ¡Jamatii o huonejjiya bobi ijia canijo, eshaa oquequianijo ijia cani iñahuehua! —acanaje enaeseya.

²⁹Jamajjeya Jesosa quea bihui nee poanaje: —Epona, miya ca ca oe quea ja'a nee, quea pame nee ejo jjashahuabaquiani. Jamajjeya eyaya miquea esohui jayojja jama jjeya nei aje'yo. Miquea ebacua piona jjaajaqui mee'yonaje. Eyaya eshahua ojo nequi huoojeacuayajea'yonaje. ¡Quea bihui poquicue miquea equi yasijje! —Jesosa poanaje.

³⁰Jamajjeya jjeya nei ma epona poquicuaji'yonaje oja equi yasijje. Ba cañaqui'yonaje oja bacua piona quea pame nee, eshahuama'yo, ejaajji biajje quea bei ani'yo.

Jesosaa shajjaqueba jjashajjaja'aqui mee ca'yonaje mimi mee ca'yonaje pea'ai

³¹Jjeyahua nei Jesosa Tino pejejo ani poquinaje. Sinono yejjenana majje Ome Miji pea'ai Cuiñajji cuana yejjenana majje, Janinea bae yasijje poe o'oyanaje, ma Dejjaja Eyacuiñajji ba po jjimaja bae bajjani yasijje.

³²Majoya pea cuaa dejja shajjaqueba, mimi'ajja pea'ai ye canaje o que. Jama poanaje ba'a: —Jesosa, jiquio dejja shajjaqueba, mimi'ajja pea'ai. ¡Oya che napa'ajjacue emeya quea ja'a nee epojji!

³³—E'e, —Jesosa poanaje. Jamajjeya ma dejja oe nei dojo canaje huesha'ama onijje mimiya, o huaquia mee'yohua. Ojaya eme sisi shajjaquebaja eshajja huejja huasijje jeanobia canaje. Majoya jjamecuichoqui majje ana napa canaje emeya. ³⁴Eyahuasijje jjabajjesohuaquinaje Eyacuiñajji nijje emimijji. Jjajjeanajequinaje jama ba'a: —¡Quea ja'a pocue! —poanaje shajjaqueba nijje. Jesosaja mimijo: —¡Epata! —poanaje.

³⁵Jesosa mimi jeahuajo, ma dejjaa quea ja'a nee nee shajja'ajja ca'yonaje. Miminaje quea ja'a nee. ³⁶Majoya Jesosaa ojjaña cuana huohui canaje jama ba'a: —E'e, eyaya shajjaqueba jjashajjaja'aqui mee'yonaje, mimi mee'yonaje. ¡Jamatii pea cuana a'a jihuohuijji so'o! —Jesosaa jamaya ojjaña cuana huohui canaje.

Jamatii oya cuaa huohui majamaja canaje ojjaña huasijje. ³⁷Shajja'ajja majje ojjaña quea bihui nee jama poanaje ba'a: —E'e e, Jesosaa ojjaña acani quea pame nee nee. E'e e, shajjaqueba jjashajjaja'aqui mee ca'yonaje jjeya nei. Mimi'ajja pea'ai quea ja'a nee mimi mee ca'yonaje —jamaya ojjaña Jesosa bihuia canaje.

Jesosaa quea huiso cuana bobia canaje, 4.000 dejja

(Mateo 15.32-39)

8 ¹Majoya quijje pishana quea huiso nee nee cuana poeyanaje. Jesosa que jjachichaqui o'oyanaje. Onijje ani tiitii canaje esohui shajja'ajjaa. Bobima' poanaje. Jamajjeya Jesosaa o shajja'ajjajji cuana iyaa canaje. ²O que poeyajo, huohui canaje jama ba'a: —Jiquio dejja cuana enijje nequi pea beca peejjima cahuime. Ojaya bobi oe poanaje. Jamajjeya eya ojo quea yeno jjashahuabaquiani, bobimajo. ³Oja equi yasijje huoojea sa po'yo ajja, quea shoe nee nee; ejiojijje poquianijo bobi yasijje po chana'.

⁴O shajja'ajjajji cuanaa Jesosa saja'a canaje: —E'e. Jiquiojo chama' bobi, dejjama'. ¿Yajja yajji? Oya cuana quea huiso nee nee ebobiajji. ¿Achacua pahui ejjeshejji ojjaña bobiajji? —acanjaje cuaa.

⁵—¿Ache huiso pahui miquea yani? —Jesosaa huohui'ajja canaje. —Me oeje becanejjijji pea'ai, 7 pahui yani —poanjaje.

⁶Jamajjeya Jesosaa ojjaña ejja'anichichaqui'yo ani cuana jama acanjaje ba'a: —iMeshijo anioquecue! —acanjaje.

Majoya Jesosa ma 7 pahui jjeshe majje Eyacuiñajji oja Chii bihuia canaje bobijo. Majoya pahui miji canaje. O shajja'ajjajji cuana quia canaje. Majoya oya cuanaa dejja cuana huasijje quia canaje. Quia capoquije quea huiso nee nee jjapanaquipoquinaje, bobi. ⁷Ojaya oe pojji nahuo sisi yaninaje pea'ai. Oya jayojja Jesosaa nahuo sisi miji majje quia canaje o shajja'ajjajji cuana que ojjaña cuana huasijje equiajji. ⁸Jamajjeya ojjaña cuaa ijji canaje; quea jeje poanjaje. ⁹Ijji majje, mi ijjiayeyo majje bio ca'yonaje jjepai ai yasijje, o shajja'ajjajji cuaa. Mepe ca'yo majje quea huiso poanjaje, 7 jjepaime. Jamatii quea huiso nee nee dejja cuana bobia canaje, 4.000 dejja. ¹⁰Majoya Jesosaa ojjaña cuana huoojea canaje oja equi cuana huasijje. Jesosa ca ca bishe ai yasijje nequisohuaquinaje o shajja'ajjajji cuana nijje. Besapoquinaje ojje, pea meshi yasijje Majadana meshi yasijje, pea bajjani Namanota meshi yasijje, ma Ena Ta'a Huoi bajjani yasijje.

Jodio etiiya Jesosaa pana canijo huohui'ajja canaje
(Mateo 16.1-4; Noca 12.54-56)

¹¹Majoya Paniseo cuana poeyanaje Jesosa que. Onijje mimicuijjeanobiajea sa poanijo jama anisho canaje ba'a: —Esohui huohuijji Jesosa, ¿A'a miya Eyacuiñajji huojea'yo nei ojjaña jaahuanajji pojja'a? ¡Ejjaba'ajjaqui so'o! ¡Eyacuiñajjiya jayojja jama paname a'ajja' eyajo ecuanaja ebajji! —huohui nisho canaje.

Jamatii oya cuaa Jesosa Eyacuiñajji huojea'yo pojjeama poso acanjaje pea Paniseo cuana: —Chojja, Jesosa Eyacuiñajji huojea'yo pojjeama. Jamajjeya Eyacuiñajjiya jayojja jama mi pana cajo, pajea caje'yo cuaa.

¹²Paniseoja ejjashahuaba taiquijji Jesosaja eba poanjaje. Jamajjeya quea yeno poanjaje jama ba'a: —Chojja. ¿Apiojji miquianaya Eyacuiñajjiya pana cani ba majamaja sa poani? Miquianaaya Eyacuiñajjiya esohui cajaa año. Jamajjeya miquea ba jjima ache shono ojaya ehoojea'yo ojjaña jaahuanajji poeyanaje. Jamajjeya Eyacuiñajjiya eya pea epana mee'yojji pojjeama miquea ebajji eya ojaya ehoojea'yo —Jesosaa acanjaje.

¹³Paniseo cuana shajjama' poanijo, Jesosaa oya cuana jea cana'yonaje, jjabahuejjaqui ajjajojo. Besapoqui o'oyanaje ojje miji yasijje bisheje o shajja'ajjajji cuana nijje.

Paniseoja esohuitai pahui shejtee meeji jayojja

(Mateo 16.5-12)

¹⁴Majoya bae ojje miji yasijje besapoquije Jesosa shajja'ajjajji poani cuana jjashahuabaquinaje. Jama poanaje ba'a: —E'e de, ecuanaa bobi pajea'yonaje.

¹⁵Majoya Jesosaa, Paniseoja ehuhui taijo jjashahuabaquianijo oya cuana huohui canaje: —¡Quea ja'a nee jjashahuabaquicue! Paniseoja, Enodeja epeejjija esohui pahui shejtee meeji jayojjajo miya quea tai po chana'.

¹⁶Oya cuana bobijo jjashahuabaquianijo Jesosaja esohui ejjashahuabaquimeejji onajaya quea quehua poanaje. Jamajjeya ojee mimimiminaje jama ba'a: —E'e pojja'a Jesosa jama poanaje ecuanaja bobi ye jjimajo.

¹⁷Ojaya esohui Jesosaja eba poanaje. Jamajjeya oya cuana jama acanaje ba'a: —¿Apiojji acuae jja nequiana ojee mimimimiani bobijo? ¿A'a jja eya miquianajaya ba jjima quea ca'a nee nee? ¹⁸¿A'a jja nequiana ejo jjashahuabaqui jjima tii? ¿A'a jja nequiaa pajea'yonaje so'o? ¹⁹Eyaya me oejje pahui miji majje quea huiso dejja bobianaje, 5.000 dejja. Ijjia'ijjiajeyo majje acuae jjaya ¿ache jjepai huiso chicha'yonaje pahui? ¿A'a ya pajea'yonaje? —Jesosaa acanaje.

—Quea huiso nee, 12 jjepaime —poanaje.

²⁰—E'e. Oya jayojjaya me oejje beca pahui, 7 pahui, miji majje quea huiso dejja bobianaje, 4.000 dejja. ¿Majoya ojjañaá ijja'ijjiajeyo majje miquianaaya ache jjepai huiso pahui chicha'yonaje so'o?

—Quea huiso nee pea'ai, 7 jjepaime quea cuio chicha'yonaje ecuaaya —saja'ame acanaje.

²¹—E'e —Jesosa poanaje—. ¿A'a jamatii miquianajaya ba jjima eya quea ca'a nee nee mi bobiajji? ¿A'a mi jjabahuejjaqui jjima? —Jesosa poanaje.

Betesaidajo nequi Jesosaa cojjama' jjacojjapojjajqui mee ca'yonaje

²²Majoya Jesosa o shajja'ajjajji cuana nijje Betesaida huasijje ba'eñaqui o'oyanaje, Jai Jaajji cuiñajji yasijje. Jomajo pea cuanaa cojjama' ye canaje Jesosa que. Jesosa huohui neinei canaje jama ba'a: —Jesosa, jiquio dejja cojjama'. ¡Che jja oma quea cojja ja'a po mee'yocue!

²³Jesosaa cojjama' me iña majje me pejejea canaje cuiñajji esecue yasijje. Jomajo Jesosaa eme' cuicho majje cojja iñapepa canaje cuichohua. Oya napa'ajja canaje emeya pea'ai. Jama poanaje ba'a: —¿Achajja acuaeya miyaya baña so'o, cha? —Jesosa poanaje.

²⁴Bajea majje cojjama' jama poanaje ba'a: —Eyaya dejja cuana jejeoqui baña, acui jayojja de, quea jama pishana, de —acanaje.

²⁵Majoya Jesosaa ma dejja cojja napa'ajja ca o'oyanaje emeya. Jesosaa cojja napa'ajja ca o'oyajje, cojjamaa jjeyahua nei ba neinei canaje. Quea cojja ja'a nee nee po'yonaje. ²⁶Majoya Jesosaa oya huoojea canaje oja

equi yasijje. Jama poanaje ba'a: —¡Epeeji, quea jaji nee poqui'yocue miquea equi yasijje! ¡A'a jjeya cuiñajji yasijje poqui o'oyajji! ¡Eyaya miya quea cojja ja'a po mee'yonaje a'a jocuama huohuijji! —Jesosaa acanaje.

Penoja esohui quea pame Jesosajo

(Mateo 16.13-20; Noca 9.18-21)

²⁷Majoya Jesosa o shajja'ajjajji cuana nijje Pinipo meshi yasijje poqui canaje. Sesanea huasijje poquijeya o shajja'ajjajji huohui'ajja canaje Jesosaa: —¿Dejja cuana acuae jja yajja poani ejo? —Jesosaa acanaje.

²⁸—Miya Huani, ma ona besameejji poa, shequi o'oyanaje poso ca jja mi ca acani beca cuaa. Pea cuana aje jja poani miya Enia, Eyacuiñajjija esohui huohuijji yahuajo nei nequia poa. Pea poani ba'a miya pojja'a pea esohui huohuijji yahuajo nei nequia poa pojja'a. Oya cuana yahuajo nei mano'ya poa shequi o'oyanaje poso ca jja mi ca acani cuaa —poanaje o shajja'ajjajji.

²⁹—¿Miya acuae yajja poani ejo? ¿A'ya cae ña? —Jesosa poanaje.

—Miya ca ca Eyacuiñajjija huoojea'yo ojjaña jaahuanajji Quito bajjani —Simohuiya Jesosa saja'a canaje.

³⁰Jamajjeya Jesosaa oya cuana jama acanaje ba'a: —E'e, eya Eyacuiñajjija huoojea'yo ojjaña jaahuanajji. Jamatii ¡a'a jja oe jjeya huohuijji cuana! —Jesosa poanaje.

O mano'yojjijo Jesosa miminaje

(Mateo 16.21-28; Noca 9.22-27)

³¹Majoya Jesosaa o shajja'ajjajji cuana huohui coo canaje ojaya emano'yojjijo: —Eya ojjañaja Edoe Mese quijje Jenosanena huasijje poquije. Jomajo Moisesija etehue'yo huohuijji cuaa, Jodio etii cuaa pea'ai, Eyacuiñajji nijje emimijji etii cuaa pea'ai eya quea huiso cuia caje'yo. Quea nee nee poaje'yo eya. Quijje ya mo manoje'yo ohua me' caca mee cajje. Jamatii pea beca peejjima cahuime po majje mo shequi mee caje o'oya ecue Chiiya —acanaje.

³²Jamajjeya Jesosaa jama huohui neineime acajje Peno quea yeno nee poanaje. Oya oe nei iyaa canaje, Penohua. Jama poanaje ba'a: —Chojja, ecuea Emeshi Mese Jesosa, miya Eyacuiñajjija jaahuana caje'yo. Peaja aje mi oe ecuijji pojjeama, peaja equecua'yojji pojjeama jja mi, de.

³³Jamajjeya aje jja oe Jesosaa ojjaña o shajja'ajjajji cuana cojja ba neinei majje jama Peno tecueame acanaje ba'a: —Peno, ¡a'a jamaya mimijji! Miya e dasiajji nisho epo jama mimiani. Miya Edosiquiana Satanasa jama mimiani. Jjashahuabaquiiani quea tai, dejja jama; Eyacuiñajjija ejjashahuabaqui'yojji jama pojjeama —Jesosa poanaje.

³⁴Jamajjeya Jesosaa ojjaña o shajja'ajjajji, ojjaña pea cuana jomajo nequi pea'ai iyaa canaje. Jama poanaje ba'a: —¡Ojjaña joya enijje e'e jojo nei japeequi'yo sa poani Eyacuiñajjija ejjashahuabaquiiji jayojja jama ba'ecue! E jayojjaya jja enijje capoquiahua, jamatii onaa napa cajje aje jja oe quea nee poaje'yo pojja'a. ³⁵E'e,

oñaña joya Eyacuiñajji ejjashahuabaquiji jayojja jama ba'e'yo sa po ajja ba'e tiitti ajja enijje eyajo. Joya ecuea ejjashahuabaquiji jayojja jama ba'e'yo sa poani ca ca ba'e tiitijje'yo enijje eyajo. ³⁶E'e pojjja'a dejja cuaa quea huiso nee nee aquiana ojaya yajji chicha caje. Jamati oya cuana cuaqui yasijje jeajea cajo oñaña ojaya aquiana cuana edojjji pojjeama. ¿A'a oñaña ojaya aquiana cuana Eyacuiñajji yasijje quia cajo o cuaquijo ani cuayaqui mee caje'yo? ¿A'a Eyacuiñajjiya oya cuana onijje eyajo ba'e mee caje'yo ma aquiana quea huiso nee nee sosejje? Chojja. ³⁷Eyacuiñajji cajaa amajje eyajo eba'ejji pojjeama. Chojja, ejjeshejji pojjeama nequianajaya, aquiana quea huiso sosejje pojjeama, bejjo sosejje pojjeama eba'e tiitti'yojji. ³⁸E'e jojo nei jjeja oñaña cuana Eyacuiñajji nijje jjapeequi ajja, oñaña quea mimishi poani pea'ai. Ecuea esohujjo quea bicho poanijo jama acani cuaa ba'a: “Cho, eya Jesosa Quitoya epeejji pojjeama”. Jamajjeja eya oñaña Edoe Mese esohuidojojji pame cuana nijje poe o'oya majje ecue Chii jayojja quea pame nee nee oñaña huoojea'yojji poaje'yo. Jamajjeja eyaya ecue Chii eyajo ani huohujje jama ba'a: “Cho, oya cuana ecuea epeejji pojjeama. Cajaa” eyaya aje —Jesosa poanaje—. E'e, jjeja ejo quea bicho poanijo quijje eya quea bicho poaje'yo ojo, de.

9 ¹Majoya Jesosaa o shajja'ajjajji cuana jama acanaje ba'a: —E'e jojo nei beca cuaa jiquiojo nequiya jjaa mo ecojjaa ba caje oñaña huoojeajji quea ca'a nee nee. Jamaya mo ba caje mano'yo jjimahuaa. Beca cuanaja jjaja mo ba jjima poaje oñaña huoojeajji; manojje'yo —Jesosaa acanaje.

Jesosa quea cojja jiji poanaje oja Chii nijje mimianijo
(Mateo 17.1-13; Noca 9.28-36)

²Quijje pishana me oejje pea emejje oe cahuime po majje Jesosa poquinaje o shajja'ajjajji nijje, pea beca peejjima dejja nijje, Peno nijje, Satiaco, oja chahua Huani nijje pea'ai. Mahuiso dejja nijje poquinaje eyiyo huasijje quea huesha nee. Jocuama nequi oya Jesosa jjahuapaqui'yonaje. Jjahuapaqui majje quea cojja jiji nee poanaje eshequi jayojja poanaje, quea jeajahua nee nee. ³Oja daqui quea oshe nee nee poanaje, quea jeajahua nee bo oshe jayojja. Daqui tajjajji jiquio meshijo aniya daqui tajja oshe'yo ajja ojaya daqui jayojja. ⁴Jamaya ojaya epeejjiya Jesosa ba canaje. Moisesi, Enia pea'ai ma yahuajo nei ba'ya poa Jesosa nijje mimimimi nequi ba canaje pea'ai. Miminequinaje Jesosa onaja mimishijo emano'yojji jjejojo. ⁵Jamajjeja Peno jjashahuabaqui jjimajo Jesosa nijje jama poanaje: —E'e, Emeshi Mese Jesosa, jiquiojo ecuaana canequiahua, quea pame nee. Pea beca peejjima equi sisi ecuaaya cal'yahua miquea, Moisesija, Eniaja pea'ai eba'ejji.

⁶Peno quea ajjajja jjejojo jama poanaje, jjashahuaba bamequi jjima jjejojo. E'e, oñaña quea ajjajja jjejojo yajja mimime epojji. ⁷Peno mimianijo tii bo quea oshe nee nee nequioquenaje. Queya canaje huojja. Shajja'ajja canaje Eyacuiñajji jama poani ba'a: —Jiquio ecuea ecue Bacua Ejja quea jea nee nee. ¡Oya oe shajja'ajjacue!

⁸O shajja'ajja majje quea mete nee nee poanaje Peno, Satiaco, Huani pea'ai. Majoya bajea canaje Jesosa oe nei nequi; Enia, Moisesi pea'ai chama'.

⁹Eyiyojo nequi jaaoquequije'yo mimimimi jaaoque'yonaje. Jesosaa ma ojjañaja Edoe Meseya jama acanaje ba'a: —¡Ma miyaya eyiyojo banaje pea cuana a'a huohuijji jjeya! ¡Quijje eya emano'yo jaa shequi o'oyajo oe pea cuana huohuicue!

¹⁰Oya cuanaa Jesosa shajja'ajja canaje. Huohui jjima nei nei poanaje. Jamatii ojee mimiminaje jama ba'a: —¿Yajjajje shai oya Jesosa jama poanaje ba'a: “Eya emano'yo jaa shequije o'oya”? Maya ecuanaja quea quehua —poanaje o shajja'ajjajji cuana.

¹¹Jamajjeya Jesosa huohui'ajja canaje: —Jesosa, Moisesija etehue'yo huohuijji poaniya jama acani ba'a: “Enia oe ebionei meshi yasijje capoe'yahua Eyacuiñajjija huoojea'yo ojjaña jaahuanajji poe jjimahuajo”. ¿Yajjajje acuae jamaya acani oya cuaa? —poanaje Huani, Satiaco, Peno pea'ai.

¹²Jesosaa jama acanaje ba'a: —E'e jojo nei Enia jayojja jama oe dejja ebionei epoejji ojjaña cuana ejo e'e jojo nei ejjashahuabaqui meesahuajji. E'e, Eyacuiñajjija esohui huohuijji yahuajo nei ba'eya jama ejo tehue ca poa pea'ai ba'a: “Ojjañaja Edoe Mese quea nee nee po mee caje'yo cuaa. Jodio cuanaja oya ba jjima poaje. Pea poso acaje. Jamajjeya cuia caje'yo. Cajaa acaje'yo” jamaya yahuajo nei tehue ca poa ejo —Jesosa poanaje—. ¹³E'e, Enia jama ca ca oe yahuajo pishana poeyanaje. Jamatii Jodio cuanaja oya ba jjima poanaje. Jamajjeya cuia ca'yonaje. Jamaya yahuajo nei Eyacuiñajjija esohui huohuijji cuaa ojo tehue ca poa. Ma jayojja jama acanaje cuaa —jamaya Jesosaa Peno, Satiaco, Huani pea'ai acanaje eyiyojo nequi jaaoqueje'yohua.

Esho'i niñepoquima'yo po mee ca'yonaje Jesosaa

(Mateo 17.14-21; Noca 9.37-43)

¹⁴Eyiyojo nequi jaaoque'yo majje Jesosa shajja'ajjajji yasijje poe'yonaje. Ba cañaquinaje quea huiso cuana ejjachichaqui nequica. Moisesija etehue'yo huohuijji cuaa Jesosa shajja'ajjajji cuana mimicuiaje nobiajea cani. ¹⁵Ojjaña ejjachichaquinequi Jesosa ba majje quea quiijjiji jaji nee poanaje. Cuajicuajinaje Jesosa bihuiaa jama ba'a: —Jesosa, miya Eyacuiñajjija huoojea'yo ojjaña jaahuanajji.

¹⁶Majoya Jesosaa huohui'ajja canaje: —¿Ajeo acuae quiana jjamimicuiajea nobiajeaquiani? ¿Yajja poani so'o?

¹⁷Oe dejja Jesosa que poeyanaje. Huohui canaje jama ba'a: —Emeshi Mese Jesosa, eyaya ecue bacua ejja yenaje mi que. Oya quea mano nee nee, quea niñe jjejojo mimi ajja pea'ai. ¹⁸Eshahuaa ojo nequiya oya naba huapa mee cani, jjaami yayequi mee cani pea'ai. Niñepoqui jaabichajeaquiani meshi yasijje ese' ijjiyai cani pea'ai. Eyaya mi shajja'ajjajji cuana huasijje yenaje mi chamajo. Jamatii niñe poquipajea ajja —ejeajji poanaje.

¹⁹Jesosaa ojjaña cuana jama acanaje ba'a: —¡De! ¿Ache shono acuae jja nequiana ejo jjashahuabaquije e'e jojo nei? ¡Quea sapa ca'a mi coma! ¿Ache cahui huiso minijje nequi majje miyaya eya baje'yo Eyacuiñajjija huoojea'yo ojjaña jaahuanajji quea ca'a nee nee? ¡Esho'i e que jjequicue! —Jesosa poanaje.

²⁰Jamajjeya esho'i jjequi canaje Jesosa que. Jesosa ba majje eshahuaa esho'i janobajjima nei cacacaca mee canaje. Meshi yasijje jea majje oya jecapoquipoquinaje. Naba huapanaje. ²¹Jesosaa ejeajji huohui'ajja canaje: —¿Ache shequiaya huisome jama poanaje oya?

²²—Jesosa, oya esho'yahua jama po —poanaje ejeajji—. Eshahuaa oya dahuajea majamaja'ajja canaje cuaqui yasijje, ena huasijje hui'li mee'ajja ca'yonaje cuanaya, o mano mee'yojji nisho. Jamatii ꞑecuanajo jashahuabaquicue quea pame; ecuana jaahuanacue! ¿A'a miyaya ecue bacua jjaajaqui meeje'yo pojja'a?

²³Jesosaa ejeajji saja'a canaje: —A'a huohuijji jama ba'a: “¿A'a pojja'a miyaya oya jjaajaqui meeje'yo?” E'e jojo nei jashahuabaquicue jama ba'a: “E'e jojo nei Jesosa quea ca'a nee nee; ojjaña acani. Ohuaya ecue bacua ejja jjaajaqui meeje'yo pea'ai”. Jamaya jashahuabaquianijo e'e jojo nei eyaya miquea ejjashahuabaqui'yojji jayojja jama aje'yo. Miquea ebacua ejja jjaajaqui meeje'yo pea'ai —Jesosa poanaje.

²⁴Jamajjeya jjeyahua nei ejeajji jama poanaje ba'a: —Esohui huohuijji Jesosa, eya mijo e'e jojo nei jashahuabaquiani miya ejjaajaquimee'yojji. ¡Miyaya eya jjabahuejja neineiꞑi meesahuacue!

²⁵Ojjaña cuana o que jjachicha cuajicuajiquiani ba majje Jesosaa o niñepoquimeejji poani huoojeacuayajea canaje: —¡Eshahua, o queba po meeji poani, mimi'ajja po mee'yojji poani pea'ai, cuayaqui'yocue oja yamijo nequi! ¡A'a dobiꞑi o'oyajji! —Jesosa poanaje.

²⁶Jesosaa huoojeajea cajeahua, eshahua siasia nananaje; esho'i jjequi'ihui mee majje cuayaqui'yonaje. Esho'i emano'yo jayojja jaa ba majje ojjaña jama poanaje ba'a: —Oya mano'yonaje, poꞑijeyonaje, de.

²⁷Jesosaa me' iña cajje esho'i nequisohua'yonaje. Nequisohua majje quea aja nee po'yonaje.

²⁸Quijje ojjaña cuana poꞑi majje Jesosa equi yasijje dobiꞑinaje o shajja'ajajji cuana nijje. Oeya Jesosa huohui'ajja canaje: —Jesosa, ¿yajjajo acuae ecuaaya eshahua mi huoojeacuayajea'ajjaña?

²⁹—E'e —Jesosa poanaje—, jiquio eshahua quea huoojeacuayajea camaja. Eyacuiñajji nijje mimi huicha'a huicha'a majje ojo jashahuabaquiani ijja'ijja jima po majje pea'ai ca ca oe huoojeacuayajea meeje'yo miyaya —Jesosa poanaje.

—Quijje eya manaje'yo —Jesosa poanaje

(Mateo 17.22-23; Noca 9.43-45)

³⁰Oya cuana ma meshijo ani ojee poꞑinaje ojjaña Janinea meshi yasijje. Poꞑijeya Jesosaa o shajja'ajajji ca ca oe sohuihuohui capoquinaje. Pea cuana sohuihuohui pajea canaje. ³¹Jamajjeya Jesosaa o shajja'ajajji cuana huohui canaje jama ba'a: —E'e, quijje eya iña meesahuaje onaja equecua'yojji. Quecua caje'yo cuaa. Jamatii beca cahuime po majje mo shequi mee caje'yo Eyacuiñajjiya.

³²O shajja'ajja majje quea yeno nee nee poanaje. Jamatii oya cuana quea mete poanaje ehuohui'ajjajji: —¿Yajjajo shai Jesosa mano'yome ca oya Eyacuiñajjija huoojea'yo ojjaña jaahuanajji? —oya cuana poanaje.

¿A'ya ona huoojeajji jayojja nequije eyajo?

(Mateo 18.1-5; Noca 9.46-48)

³³Majoya oya cuana Capenaoma huasijje poe'yonaje. Equi yasijje dobiqiu'yo majje Jesosaa o shajja'ajjajji huohui'ajja canaje jama ba'a: —Esey a ejiojjijje poje'yo ¿ajeo acuae nequiana jjamimicuiajea nobiajeaquijebenaje so'o?

³⁴Jamatii oya cuanaja Jesosa saja'a jjima. Quea bicho. Oya cuana poje jjamimicuiajea nobiajeaquijebenaje jama ba'a: —Jesosa quijje ona huoojea'yoggi poaje, eseya o jayojjaya poaje onijje ona huoojea'yoggi. ¿A'ya o pejejo nequije, joya oja quea jea nee neeya?

³⁵Jamajjeya Jesosaa anioque majje o shajja'ajjajji 12 huisome iyaa canaje o que. Jama acanaje ba'a: —¡Bacue! Miya e jayojja ona huoojea'yoggi po sa poanijo jama jjashahuabaquicue ba'a: “Ojjaña ecuea quea boti nee. Cajaahuana'yahua”. Jamaya poaje Eyacuiñajjiya miya ba caje quea pame nee ona huoojea'yoggi epojji.

³⁶Majoya Jesosaa oe esho'i nei iyaa majje ojjaña cojja nei nequia canaje. ³⁷Bishami majje jama poanaje ba'a: —¡Bacue! Ojjaña joya enijje jjapeequianiya jiquio esho'i quea jea ajji poaniya, eya pea'ai quea jea acani. Oya jayojja ojjaña cuaa ecuea epeejji quea jea acani, ohuaya eya pea'ai quea jea acani. Jamajje ecue Chii, e huoojea'yoggi quea jea acani pea'ai.

¿A'ya Jesosaja epeejji poani?

(Mateo 10.42; Noca 9.49-50)

³⁸Jamajjeya Huaniya Jesosa huohui canaje jama ba'a: —Esohui huohuijji Jesosa, ecuaaya pea dejja banaje eshahua cuana huoojeacuayajea cani. Ma dejja poanaje jama ba'a: “Eyaya eshahua huoojeacuayajeaña Jesosa nijjeya, ojaya epeejji poaniya”. Ma dejja ese nijje poqui ajjajo, oya tecueanaje jama ba'a: “¿Apiojji? Chojja, miya ecuana nijje poqui ajja; ¡a'a eshahua huoojeacuayajeajji!” ecuaaya oya anaje —Huani poanaje.

³⁹Jamajjeya Jesosa jama poanaje ba'a: —¡A'a oya tecueajji! Ohuaya enijjeya acani ma dejjaa ajjima acani. Jamajjeya, ohuaya eya niñeba jjima acaje. ⁴⁰Ojjaña joya ese niñeba ajja esejaya epeejji nei poani. ⁴¹E'e jojo nei ojjaña joya e shajja'ajjajji poani ba'e meesahua cani, ena quia cani pojja'a eya ojaya quea boti neejo, Eyacuiñajjiya quijje oya sosequia caje'yo oya quea pame nee poanijo —Jesosaa o shajja'ajjajji cuana huohui canaje—. ⁴²Ecuea epeejji eyacua esho'i nei jama. Joya o mimishi po meeji poani ca ca Eyacuiñajjiya quea nee nee po mee caje'yo, de, quea nee tii tii. ¡Jamajjeya quea mimishi epo mee ca cuahuajje oe mano'yocue! E'e, onaya mei enaajo yiipeca mee majje ¡bae quea doe yasijje

jjajaea'oqueajea meequi'yocue! ⁴³¡Jamajjeya a'a quea mimishi po meeji cuana! Jamajjeya miya emejo quea mimishi po sa po majje ¡eme' ejajasejjajea jayojja jama acue mimishi'ama epojji! Eme' chamajo eyahuasijje poquiyajo Eyacuiñajji nijje eba'e tiitii'yojji quea pame nee nee poaje'yo. Miquea beca eme' yanijo pojja'a quea mimishi tii poani ca ca cuaqui yasijje poquije'yo. ⁴⁴Quea tai nee nee, quea nee nee poaje'yo. Jomajo cuaqui jiji tiitiije'yo; quijjo'yo ajja tii tii, de. Jamajjeya ¡mimishi pajea'yocue! ⁴⁵Oya jayojjaya miya ejiojjiya quea mimishi po mee canijo, ¡ejiojji ejajasejjajea jayojja jama acue! Ejiojji chamajo eyahuasijje poquiyajo Eyacuiñajji nijje eba'e tiitii'yojji quea pame nee nee poaje'yo. Miquea beca ejiojji yanijo pojja'a quea mimishi tii poani ca ca cuaqui yasijje poquiyajo quea tai nee nee, quea nee nee poaje'yo. ⁴⁶Cuaqui jiji tiitiije'yo; quijjo'yo ajja tii tii. Jama tii tii poaje'yo. ⁴⁷Cuanaya ecojjajo jjabaqui majje miya quea mimishi poani pojja'a. ¡Jamajjeya ecojja ecajjajea jayojja jama acue! Cojjama', mimishi'ama miya eyahuasijje poquiyajo Eyacuiñajji nijje eba'e tiitii'yojji quea pame nee nee poaje'yo. Cojjajji quea mimishi tii poani miya cuaqui yasijje poquije'yo ca ca quea tai nee nee, quea nee nee poaje'yo tii tii. ¡Jamajjeya mimishi pajea'yocue! ⁴⁸Cuaqui quijjo'yo ajja tii tii, de —Jesosa poanaje.

⁴⁹—Ojjaña ecuea epeeji poanija eba'ejji quea camaja poaje onaa tecuea cajje. Jamaya ecuea epeeji quea pame, quea ca'a pocue jama ba'a: ⁵⁰Jiquio ecua mei seseya, sane quea pame nee'ya bobi shicuijajo ihui'yo ajja jayojja jama ecuea epeeji quea pame nee ba'e'yanijo, pea cuana o jayojja jama ba'eje quea pame nee pea'ai. Jamatii sane sese'ama poajo, ¿a'a quea sese po meeje o'oya? Chojja, sese'amajo jeajea'aña seya. ¡Jamajjeya mei sese quea pame jama pocue, sane jama! ¡Pea cuana quea pame nee ba'e meesahuacue, ecue sohui jama! ¡Pea cuana nijje quea pame nee jjapeequicue! ¡Quea bei pocue pea'ai! —jamaya Jesosaa o shajja'ajjajji cuana huohui canaje.

Jesosaa esohui huohui canaje ehueijji

(Mateo 19.1-12; Noca 16.18)

10 ¹Majoya esohui huohui majje Jesosa Capenaomajo ani po'oquequinaje Jodea meshi yasijje, Jodana cuei ojje miji yasijje. Jomajo quea huiso nee nee o que jjachichaqui o'oyanaje. Jesosaa ojjaña cuana sohuihuohui canaje, ohuaya ojjaña meshi yasijje esohui huohui majamaja canaje jayojjaya. ²Paniseo cuana ca ca o que poeyanaje jjadasiaquiya nisho. Jjashahuabaquinaje jama ba'a: —E'e pojja'a Jesosa Moisesija etehue'yo jayojja jama pojjeama mimije. Jamajjeya ecuaaya oya tecueaje —poanaje.

Poe majje Jesosa huohui'ajja canaje cuaa jama ba'a: —Esohui huohuijji, ¿a'a cuae ehuanase huei cajji? ¿Yajjajo acuae ehuanase huei cajji so'o? ¿Achajja tehuemeya acuae oe Jodioja etiiquianaa aca poa?

³Saja'a canaje Jesosaa: —¿Yajja acuae Moisesija esohui etehue'yo poani so'o?

4—Moisesiya jama tehueme aca poa ba'a: “Huei'yo majje yahueya ehueijeajji papeni etehue'yo caquia cahua oja huanase que. Majoya cahuojea cahua” —poanaje Paniseo cuana.

5—E'e —Jesosa poanaje—, etiiquiiana quea mimishi nee neeya jjejojya Moisesiya huei mee'ajja canaje. Quijje nei Moisesiya jamaya tehue ca poa; jamatii Eyacuiñajjiya jama pojjeama pana coo ca poa. ⁶Yahuajo nei nei Eyacuiñajjiya pana coo ca poa yahue, epona pea'ai. ⁷Huohui ca poa ohuaya: “Jamajjeya yahue cajjaba'eshiñaquiahua ojaya ehuanase nijje eba'ejji”. ⁸Oya cuana beca; jamatii oe nei jayojja Eyacuiñajjiya oya ba cani; becanejjijji pea'ai pojjeama; oe nei jayojjaya. Cuanaya Eyacuiñajjiya oe jayojja aca poa. ⁹Jamajjeya a'a oe jea meejji! ¡A'a hueijji nequiaa! ¡Jama tii tii oe nei oe acue! Jamaya Moisesiya yahuajo nei tehue ca poa pea'ai —Jesosaa acanaje.

¹⁰Majoya o shajja'ajjajji cuanaa Jesosa nijje equi yasijje dobiqúi majje ojaya esohuio huohui'ajja canaje. ¹¹Jamajjeya Jesosaa oya cuana jama acanaje ba'a: —Eyaya miya huohuaña e'e jojo nei ehuanase pea dejjaja sii jjima huei ca ajja. Dejja ehuanase hueijji epo pea epona ehua'yojji quea mimishi nee, epona siijji epo jama. Eyacuiñajjiya oya ba cani quea mimishi, pea cojjojji. ¹²Oya jayojja epona ojaya yahue ¡a'a huei meejji! Yahue huei'yo majje pea dejjajo ejjahueaquijji quea mimishi nee poani, yahue siijji epo jama. Eyacuiñajjiya oya ba cani quea mimishi, pea cojjojji —Jesosaa acanaje.

Esho'iquianajo Eyacuiñajji nijje miminaje Jesosa
(Mateo 19.13-15; Noca 18.15-17)

¹³Majoya Jesosa que esho'i nei cuana jjequi canaje cuaa. Huohui canaje: —Jesosa, ¡jiquio esho'i nei sapa napa'ajja majje Eyacuiñajji nijje mimicue ojaya ejaahuanajji! —poanaje.

Jesosa shajja'ajjajji cuaa ca ca oya cuana tecuea canaje: —¡A'a jja oe Jesosa que jjequi majajji esho'iquiana! ¡Eshohui oe cahuohui cahua! —acanaje.

¹⁴Ma ba majje Jesosa quea yeno nee poanaje. Etii cuana tecuea canaje jama ba'a: —¡Esho'iquiana e que capoe'yahua! ¡A'a quea huesha nequi meejji! E'e, ojjaña esho'iquiana Eyacuiñajji nijje jjapeequi sa poani. Jamaya ecuea epeeji esho'i jayojja eyaya jaahuana sa aña pea'ai. Jamajjeya e que poquije'yo; eya eyajo ojjaña huoojea'yojji poaje. ¹⁵Jamajjeya e'e jojo nei esho'i nei jayojja mi po'yajo ca ca enijje eba'e'yojji pojjeama quijje eya ojjaña huoojea'yojji poaje —Jesosa poanaje.

¹⁶Majoya esho'i nei cuana bishami majje, sapa biajje eme' huana majje Jesosa Eyacuiñajji nijje miminaje jiquio esho'iquiana jaahuanajji.

Edeja sho'i pishana quea aquiانا huišo

(Mateo 19.16-30; Noca 18.18-30)

¹⁷Majoya Jesosa o shajja'ajjajji cuana nijje poqui o'oyanaje Jodea meshi yasijje. Oe dejja o que cuajicuajjebenaje. Ecuio'oshajjajo nequi oya Jesosa nijje jama poanaje ba'a: —Esohui huohuijji, miya ca ca oe quea pame nee nee. Eya huohucue ¿achajja a mo eya poquije'yo eyahuasijje eba'e tiitii'yojji Eyacuiñajji nijje? ¿Ae quea pame amajje eyahuasijje poqui ca'yojji? —poanaje.

¹⁸O jjabahuejjaquijji Jesosaa huohui canaje: —E'e, miyaya eya anaje jama ba'a: “Miya ca ca oe quea pame nee”. Eyacuiñajji ca oe nei quea pame nee. Pea chama' o jayojja quea pame nee nee. ¡Jamajjeya eya shajja'ajja neineicue! ¹⁹¡Eyacuiñajji nijje ba'e tiitii'yo sa po majje ojaya etehue'yo jayojjaya jama oe ba'ecue tii tii! Ojaya esohui ma Moisesiya tehue ca poa miquea eba jama ba'a:

“¡A'a pea quecuajji!

¡A'a pea siijji!

¡A'a sii pojji!

¡A'a sijje pojji!

¡A'a onaya dasiajji!

¡Mique chii, miquea enaese pea'ai oe shajja'ajjacue!”

—Jesosa poanaje.

²⁰—E'e, eyaya jamaya aña, jama tii tii esho'yahuaa. ¿Pea acuae yajja po caji eyajo eba'e tiitii'yojji? —jiquio dejjaa Jesosa huohui'ajja canaje.

²¹Jesosaa oya ba neinei canaje, oya quea boti nee nee poanaje. Jamajjeya jama acanaje ba'a: —E'e, epeejji, miya quea pame nee nee Eyacuiñajji jayojja po sa po majje ¡poquicue; miquea aquiانا cuana quiaquicue ejjeshejji sosejje! ¡Majoya ejjeshejji quia'yocue aema' cuana huasijje! ¡Majoya poecue enijje epo'yojji! Jamajjeya eyajo Eyacuiñajjiya miya aquiانا quea pame nee nee quea huišo nee quia caje'yo quijje.

²²Jesosaja esohui shajja'ajja majje ma dejja esho'i pishana quea yeno poanaje; ojaya aquiانا quea huišo nee nee yani jojya quia sa po'yo ajja. Jamajjeya poqui'yonaje quea aquiانا yeno jjejojo.

²³Jamajjeya Jesosaa ojjaña bajea majje o shajja'ajjajji cuana huohui canaje jama ba'a: —E'e, quea mimishiya jjejojya aquiانا quea huišo, meshi quea quemo pojja'a nahue canijo beca cuana beshahua nei e que poqui ajja quijje, eya eyajo ojjaña huoojea'yojji poaje'yo.

²⁴O shajja'ajja majje jjashahuaba neineiquinaje oya cuana. Ojee miminaje.

Jamajjeya Jesosaa jama acanaje ba'a: —Ecuea epeejji cuana, eyaya e'e jojo nei huohuiaña jama pea'ai ba'a: ²⁵Ahuoja quii huejjajje ino jeanobiaña jama ¿a'a mapichi jeanobia caji ahuoja quii huejjajje? Cho.

Quea camaja coma. Jiquio ecua mapichi ahuoja quii huejjajje jeanobia caji jojjemo dejja quea aquiana huiso nee nee dobiqúi'yome eyahuasijje.

²⁶—¡De! Jamajjeya ¿a'ya shai eyahuasijje dobiqúi mee caje'yo Eyacuiñajjiya? —oya cuana ojee mimimiminaje.

²⁷Cojja ba neinei canaje Jiosaa. Huohui ca o'oyanaje: —Dejjaa jama amee ajja tii. Eyacuiñajjiya oe nei ojjaña acani. (Eyahuasijje dobi meequí caní joya quea aquiana huiso nee pea'ai) —Jiosaa acanaje.

²⁸Jamajjeya Peno jjashahuabaquinaje ma dejja quea aquiana huiso nee nee jeana'yo sa po ajjajo. Huohui'ajja canaje: —Jiosaa, ecuaaya ojjaña aquiana jeana'yonaje minijje epoquí'yojji. Jamajjeya ¿a' cuee ecuaa eyahuasijje poquíe'yo? ¿Ae acuae ecuaa quiaje so'o, de? —acana Penohua.

²⁹—E'e jojo nei beca cuaa ecuea esohui jama asa poanijo aquiana cuana jiña caní. Ojaya equí, oja huapa pojjeama, oja chíi, oja nae pojja'a, oja bacua cuana pojja'a jiña caní enijje jjapee neineiquí'yohua, ecuea esohui quea pame nee quea huesha huohuíya pea'ai. ³⁰Jamajjeya e'e jojo nei Eyacuiñajjiya oya cuana quea huiso nee nee o jayojja quia caje'yo equí, huapa pojjeama jayojja, echii mese jayojja cuana, enaese jayojja cuana, ebacua cuana jayojja jama pea'ai. Mimishi cuaa ca ca oya cuana napa caje pea'ai. Jamatíi quíjje oya cuana quea bhui nee nee ba'e tíitíi mee caje'yo pea'ai eyajo onijje. ³¹Jamatíi beca cuana jjeya ona huoojeajji poaní eyajo ona huoojea'yojji pojjeama poaje'yo. Joya jjeya ona huoojeajji pojjeama ca ca eyajo ona huoojeajji nei nei poaje'yo e jayojja —Jiosaa Peno acanaje.

—Quijje eya manojé'yo —Jiosaa po o'oyanaje
(Mateo 20.17-19; Noca 18.31-34)

³²Majoya Jenosanena huasijje poquí o'oyanaje. Jiosaa ehui dojji poquinaje. O shajja'ajjajji cuana, pea cuana o quishishijji poquiani pea'ai quea mete jjashahuabaquinaje jama ba'a: —Jenosanena huasijje poquíyajo, ¿yajja Jiosaa acaje Jodio etíi cuaa? ¡Quecua ca chana', de!

Jamajjeya Jiosaa o shajja'ajjajji cuana dojo canaje ejiojji sahua huasijje esohui huohuíjji. Jama poanaje ba'a: ³³—¡Shajja'ajja neineicue mo! Eya jiquio ojjañaja Edoe Mese. Eseyá Jenosanena huasijje poquíe. Jomajo mo Jodio etíi cuana iña meesahuaje equécua mee'yojji. E'e, Moisésija etehue'yo huohuíjji, Eyacuiñajji níjje emimíjji etíi cuana pea'aiya eya iña mee caje. Taaa neineije cuana: “¡Oya quecuajeacue!” poaje. Jodio pojjeama cuana huasijje mo huoojea caje equécua mee'yojji. ³⁴Ejo soa neineije cuana; cuia caje'yo mo cuaa huaca jee ejeapashajjajja; acuí ecueata'apeejo me cacajea majje mo ba'ehuanasohuajja caje'yo cuaa emano'yojji. Jamatíi mo beca cahuime po majje Eyacuiñajjiya shequí mee caje'yo —Jiosaa huohui canaje.

**Semeneoja bacua ejja Jesosa nije miminaje o pejejo
enequi mee'yojji eyajo
(Mateo 20.20-28)**

³⁵ Majoya Semeneoja bacua ejja Jacobo, Huani pea'ai Jesosa que poeyanaje. Jama poanaje ba'a: —Esohui huohuijji Jesosa, ¡che ecuanaja esohui mi nije jama acue ecuanajo! —poanaje.

³⁶ Jesosa onijje jama poanaje ba'a: —Ecuea epeeji cuana, ¿ae sa poani miquianaya?

³⁷ —Jesosa, ecuana mi pejejo canequi'yahua quijje miya ojjaña huoojea'yojji quea ca'a nee nee poaje. Oe shani mijijje, pea ebianeí mijijje canequi'yahua minijje ona huoojea'yojji epojji. ¡Jamaya oe acue! —poanaje Jacobo.

³⁸ —Chojja, miquianajaya ba jjima eya quea nee nee po mee caje'yo cuaa. ¿A'a miquiana e jayojja quea nee nee po majje quea ca'a poaje'yo? Eya quecua caje'yo pea'ai cuaa. Enijje jjapee neinei-quianajo miquianaya quecua caje'yo pea'ai pojja'a cuaa. ¿A'a jamatii miquianaya quea ca'a poaje'yo? —Jesosa poanaje.

³⁹ —E'e —saja'a canaje Jacobo, Huani pea'aiya—. Quea ca'a poaje mi jayojja, jamatii quea nee nee po mee caje'yo, jamatii quecua caje'yo cuaa.

—E'e —Jesosa poanaje—, jamajjeya e'e jojo nei miquiana e jayojja quea nee nee po mee caje'yo cuaa; e jayojja quea ca'a nee nee poaje'yo onaa mano mee ca'yajje. ⁴⁰ Jamatii e ebianeí mijijje, e shani mijijje pea'ai eyajo eyaya miquianaya enequi mee'yojji pojjeama, enijje ona huoojea'yojji poaje. Chojja, ecue Chii eyajo aniya yahujajo nei pea cuana babaca ca poa. Ohuaye nei nequia mee caje'yo e ebianeí mijijje, e shani mijijje pea'ai eyajo quijje, eya ojjaña huoojea'yojji poaje —Jesosa poanaje.

⁴¹ Jesosa pejejo nequi sa pea'ai poanajo onijje ona huoojea'yojji epojji, Jacobo, Huani nije pea'ai quea quene poanaje pea shajja'ajjajji cuana, ome mijijje pea'ai. ⁴² Jamajoya aje oe Jesusaa oya cuana iyaa canaje. Huohui canaje: —¡A'a onijje quea quene pojji! Miquianajaya eba dejja cuana, Eyacuiñajjija epeeji pojjeama. Onajaya emeshi mese cuana, ona huoojeajji cuana pea'aiya pea cuana huoojea neinei cani; quea tecue nee nee poani, quea mase. ⁴³ ¡A'a jamaya pojji miquianaya, ecuea epeeji cuana! ¡E jayojjaya po sa poanajo pea cuana ba'e meesahuacue! ¡Jaahuanacue pea'ai! ⁴⁴ Joya ona huoojea'yojji po sa poani ca ca echacojji sosema' jayojja capoahua. ⁴⁵ E'e, ¡e jayojja jama pocue! Eya ojjañaja Emeshi Mese nei. Jamatii eya ca ca iña ojjañaja Edoe Mese eyajo ani poeyanaje ojjaña ba'e meesahuua; ojjañaja eya eba'e meesahuajji pojjeama. Ojjañaja mimishi sosequia'yojji mo manojeyo, ojjaña cuaqui yasijje epoqui'yo poaje jjejojya —Jesosa poanaje.

Batimeo, Timoteoja bacua quea cojja ja'a po mee ca'yonaje
(*Mateo 20.29-34; Noca 18.35-43*)

⁴⁶Jenosanena huasijje poquije Jesosa o shajja'ajjajji cuana nijje dobiquinananaje Jenico huasijje. Majoya quijje pishana poqui o'oyanaje ejiojjijje. Quea huiso nee nee poquinaje onijje cuana. Batimeohua, Timoteoja bacua ejjaa ejiojji sahuajje e'anioqueaniya shajja'ajja canaje Jesosa poeje. Oya cojjama'. ⁴⁷Jamajjeya taaa neineinaje jama ba'a: —Jesosa, miya emeshi mese Dabija osecua, jejo jjashahuabaquicue quea yeno! —taaanaje.

⁴⁸—¡A'a oe taaa majajji! ¡Esohui oe ca'acue! —acanjaje cuaa.

Jamatii taaa neineinaje cojjama': —Jesosa, miya Eyacuiñajjija esohui jayojja jama poeyanaje, emeshi mese Dabija osecua. ¡Ejo jjashahuabaquicue!

⁴⁹Jamajjeya o shajja'ajja majje Jesosa nequiñaquinaje. Cojjama' iyaa mee canaje: —¡Oya cojjama' iyaacue! —poanaje.

Jamajjeya cojjama' iyaa canaje cuaa: —¡Cojjama', poecuajicue oe! Jesosaa miya iyaa cani. ¡Quea bihui nee oe pocue! —poanaje.

⁵⁰Jamajjeya Batimeo nequisohua majje daqui nei jea canananaje, Jesosa que poquicuajinaje. ⁵¹Poeyajo Jesosaa oya huohui'ajja canaje: —¿A'ya so'o, Batimeo? ¿Ae sa poani miya?

—Esohui huohuijji, ¡miyaya iña jjacojjabapojjaqui mee'yocue, ecuea ecojja quea ja'a epo'yojji! —poanaje Batimeo.

⁵²—E'e, Batimeo —Jesosa poanaje—, miyaya e'e jojo nei ejo jjashahuabaquinaje eyaya miya jjacojjaja'aqui meeje'yo. Jamajjeya ¡quea bihui nee pocue! Jjeyahua nei Eyacuiñajjija miya quea cojja ja'a po mee caje'yo —Jesosa poanaje.

Jjeya nei oya jjacojjabapojjaqui'yonaje. Jesosajo quea bihui nee nee poanaje jjacojjaja'aqui mee ca'yajje. Jamajjeya Jesosa nijje poqui'yonaje, Batimeo.

Jesosa Jenosanena huasijje poquinaje
(*Mateo 21.1-11; Huani 12.12-19*)

11 ¹Majoya Jesosa Jenosanena huasijje poquije pea cuiñajjijo nequiñaquinaje Mepajejo, ma Betania pejjejo, acui yiyejo, Onimo eyiyo pejjejo. Nequiñaqui majje o shajja'ajjajji becanejjijji pea'ai huoojea canaje Jesosaa jama ba'a: ²—¡Poquicue miya Mepaje yasijje! ¡Dobiqui majje miyaya mapichi sisija bacua esho'i ai ejeyo nequia nequi bañaquicue! Dejjaja o daasa biajje yahuajo e'anijji ajjima poa. ¡Ba majje pichocue; yecue e que! ³Onaa: “¿Apiojji miyaya mapichi sisija bacua pichoaña so'o?” acajje: “Ecuanaja Emeshi Mese sa poani. Ohuaya huacuaya huoojea caje o'oya jiquiacua” saja'ame acue. Jamajje: “E'e, ocuae dojo'ajja joya mapichija bacua” acaje dejjaa Mepajejo ba'eya —Jesosa poanaje.

⁴Jamajjeya oya cuana Jesosa shajja'ajjajji poquinaje Mepaje yasijje. Mapichi sisija bacua ejeyo nequia nequi ba cañaquinaje equi secue

pejjejo. Ohuaya picho canaje. ⁵Pea cuana jomajo nequi jama poanaje ba'a: —¿Ae poani miya? ¿Apiojji mapichija bacua pichoaña so'o?

⁶Jamajje Jesosa shajja'ajjajji cuaa saja'a canaje: —Ecuea Emeshi Mese sa poani.

—E'e, ocuae dojo'ajja joya mapichija bacua —acanaje Mepajejo ba'e dejjaa.

⁷Jamajjeya mapichi sisija bacua dojo canaje Jesosa que. Onajaya daqui ao cuana mapichi sisija edaasa biajje iya canaje Jesosa anisohuaquijji. Jesosa anisohuaquinaje ma mapichi esho'i ajja daasa biajje. Anioquenaje. Ejiojjiije poquinaje. ⁸Ojjaña cuana ejjachichacui nequica cuaa ojaya daqui ao cuana ejiojjiije jeapihui canaje Jesosa jjayejjequijji. Pea cuaa acui iña jajasejja canaje. Huana yiyoyiyo canaje ejiojjiije pea'ai quea huiso nee neeya. Jamaya yahuajo Jodio cuaa emeshi mese ja'ajjequi canaje, cuiñajji yasijje poeyajo. ⁹Ojjaña ehui dojojji poquiani, Jesosa quiquishijji pea'ai taa capoquinaje quea bhui nee nee: —¡Mi poeyajo ecuana quea bhui nee! Quea pame nee nee miya, Jesosa. ¡Eyacuiñajji eyajo aniya miya cajaanhuana cahua! ¹⁰E'e Jesosa, emeshi mese Dabi yahuajo ba'e miquea etiquiana. Miya ojjaña Emeshi Mese nei poeyanaje. ¡Eyacuiñajji mi jaahuanajji cabihua cahua ojjaña! —taaame poa quea bhui nee nee jjejojo.

¹¹Majoya Jesosa Jenosanena huasijje dobiquinaje ojjaña cuana nijje. Eyacuiñajji equi yasijje poquinaje. Dobiqumajje ohuaya baja canaje ojjaña. Majoya siniajo oya Betania huasijje poquinaje cahuiya; ome miji pea beca, 12 huisome o shajja'ajjajji poani nijje poquinaje.

Acui etona jjajja jayojja iquena bajjani sajjai mee ca'yonaje Jesosaa
(Mateo 21.18-19)

¹²Mecajjeahua oya cuana Betaniajo ani Jenosanena huasijje poe o'oyaje quea shoe poanaje Jesosa. ¹³Ba canaje ejiojji sahuajo nequi acui etona jjajja jayojja. Acuijjajja ba'ajjaqui canaje. Chama' poanaje ejjajja. Eña oo pana nequi'yo, acuijjajja she pojjeama jiquio ba'ijo. ¹⁴Jamajjeya Jesosaa huohui canaje: —¡Jamajje jamatii jjajjama' tii capo'yahua acui! Jamajjeya onajaya ejjajja e'ijjajji pojjeama tii.

Jesosaja emimi shajja'ajja canaje pea'ai. Jesosaa jama acanaje ojjaña jjabahuejjaqui meejji jama ba'a: Jiquio acui jjajjama' joya Jesosaa tecuea canaje jayojja jama Eyacuiñajji Jodio cuana tecuea caje'yo jjashajja'ajjaqui ajja joya.

Aquiana quiajji poani Eyacuiñajji equijo nequi cuana
huojeacuayajea canaje Jesosaa
(Mateo 21.12-17; Noca 19.45-48; Huani 2.13-22)

¹⁵Majoya Jenosanena huasijje poe o'oya majje Jesosa ojaya epeeji cuana nijje Eyacuiñajji equi yasijje poqui o'oyanaje. Dobiquinaje. Ba cañaquinaje quea huiso enequi, Eyacuiñajji nijje mimiani pojjeama. Chojja. Aquiana quia cani cuaa. Jamajjeya Jesosaa aquiana quiajji poani Eyacuiñajji

equijo nequi cuana huoojeacuayajea canaje; aquiána jjeshe poequi pea'ai huoojeacuayajea canaje. Aquiána cuana huoojeajea canaje; bejjo, pea bejjo soseje quia cani cuanaja bejjo nequijji cuana jeapajjajea canaje; huia' quiajji pea'ajja huia' nequijji cuana jeabichajea canaje. ¹⁶Ojjaña joya aquiána abojji huohui canaje: —¡A'a jja oe aquiána yedobiajji jiquiacua! Eyacuiñajjija equi pejjejo ojjaña jjachichaquiáni esohui shajja'ajjaa —tecueame acanaje.

¹⁷Jomajo Jesosaa jama acanaje pea'ai ba'a: —¡A'a Eyacuiñajjija equijo aquiána quiajji! Eyacuiñajjija esohui jama poani ba'a: “Ecuea equi ojjaña cuana ojjaña meshijo ba'e Eyacuiñajji nijje emimijji equi”. Miquianaaya ca ca siipojji nequijji jayojja amee aña Eyacuiñajjija equi.

¹⁸Ma shajja'ajja majje Eyacuiñajji nijje emimijji etii cuana, Moisesija etehue'yo huohuijji poani pea'ai Jesosa nijje quea quene poanaje; oya Eyacuiñajjija huoojea'yo pojjeama posojo o quecua sa acanaje. Jamatii Jesosa iña jjima poa, quea meteya jjejojo. Quea huiso cuana Jesosaja esohuijo quea bhui nee nee poanaje. Jamajjeya Jesosa ojjañaja quea nahue nee nee poanaje equecua'yojji.

¹⁹Quijje siniajo Jesosa o shajja'ajjajji cuana nijje Jenosanenajo ani poqui o'oyanaje Betania huasijje cahuiya.

Acui etona jjajja jayojja esajjai'yo ba canaje (Mateo 21.20-22)

²⁰Mecajjeahua nei Jenosanena huasijje poe o'oyanaje. Jesosa shajja'ajjajji poani cuaa ba canaje acui esajjai'yo, ma Jesosaa tecuea canaje acui. ²¹Ba majje Penohua niñeba ca'yonaje. Jama poanaje ba'a: —¡Esohui huohuijji Jesosa, bacue! ¡Miya tecueaje jjeya nei sajja'yonaje acui!

²²—E'e —Jesosa poanaje—. ¡Miya Eyacuiñajjijo quea ja'a nee jjashahuabaquicue! A'a jjashahuabaquijji jama ba'a: “E'e pojja'a Eyacuiñajjija eya shajja'ajja jjima”. ²³⁻²⁴Chojja, jjashahuabaquicue jama ba'a: “Eyacuiñajjiya e'e jojo nei nei ecuea ehuhui onijje jama acaje'yo”. Jamaya miya jjashahuabaquiajo Eyacuiñajjiya miya saja'a caje'yo. E'e, Eyacuiñajjiya miya e jayojja jama ameesahua caje'yo pea'ai ma dejjaa ajjima acani —Jesosa poanaje—. ²⁵Cuanaya miya Eyacuiñajji nijje mimianijo jiquiajja jjashahuabaquime pocue ba'a: “Onaya enijje mimijajinaje quea tai. Jamatii eya ojaya mimishijo quene'ama” jamaya pocue —Jesosa poanaje—. Jamaya jjashahuabaquianijo Eyacuiñajji miquea mimishijo quene'ama poaje pea'ai. ²⁶Pea nijje quea quene tii tii poanijo ca ca Eyacuiñajjija esaja Chijja miquea mimishi ecuijea'yojji pojjeama —Jesosa poanaje.

Eyacuiñajji Jesosa huoojea'yojji poa (Mateo 21.23-27; Noca 20.1-8)

²⁷Majoya oya cuana Jenosanena huasijje poe o'oya majje Eyacuiñajjija equi yasijje dobhiqui o'oyanaje. Jesosaa esohui huohui canijo Jodio etii cuana, Eyacuiñajji nijje emimijji etii cuana, Moisesija etehue'yo huohuijji cuana pea'ai o que poeyanaje. ²⁸Jesosa ojaya ba jjimajo

huohui'ajja canaje: —¿Aya miya huoojea canaje jiquiacua? ¿Apiojji acuaya esohui huohuiaña so'o? ¿Apiojji acuaya aquiana quiajji poani huoojeacuayajeanaje oma mecajje? —onijje mimijajinaje.

²⁹Jesosaa oya cuana acanaje: —E'e, eyaya miya ebionei huohui'ajjaje. ³⁰¿Aya Huani huoojea canaje enajje ona besa meeya? ¿A'a Eyacuiñajjiya? ¿A'a dejja cuaa pojja'a? ¡Huohuicue mo! Eyaya majoya huohuije e huoojea'yojji epo.

³¹⁻³²Shajja'ajja majje Jodio cuana ojee mimimiminaje: —¿Yajja saja'ame yajji esejaya? Quea mete ojjaña dejja cuanajo. Ojjaña ba cani Huani Eyacuiñajjiya huoojea canaje esohui huohuiya. Jamajjeya: “Dejja cuaa Huani huoojea canaje” eseya aje se cuia ca chana'. “Eyacuiñajjiya Huani huoojea canaje” eseya aje se oe jama acaje ba'a: “Jamajjeya ¿apiojji miyaya Huani shajja'ajja jjima ña?” Jesosaa acaje —jamaya Jodio cuana miminaje.

³³Jamajjeya jjashahuabaqui majje Jesosa huohui canaje Jodio cuaa: —Cua'a, de. Ecuanaja ba jjima Huani huoojea'yojji epo —anisho canaje.

—Jamajjeya ecuea miya ehuohuijji pojjeama e huoojea'yojji epo
—Jesosaa acanaje ma Jodio etii cuana.

Esohui ejjashahuabaquijji echacojji taijo

(Mateo 21.33-46; Noca 20.9-19)

12 ¹Jesosaa ma Jodio etii cuana jama acanaje pea'ai ba'a: —¡Jiquio shajja'ajjacue esohui ejjashahuabaquijji! Jama poanaje ba'a: Oe dejjaa emeshi meseya que quea quemo nee neejo bana canaje jjonojjajja oo pana, uva. Que peeyi canaje meija peeyi. Majoya que yiyasamajo mei cueehue iñaca canaje jjonojjajja na quishipashajji. Majoya mei iyasohua ao'ao majje peehuana canaje. Iya canaje que jaahuanajji, quea huesha nee ojaya ebajji. Pea echacojji cuana iyaa canaje. Huohui canaje equé meseya: “¡Ecuea que jaahuanacue! Jaahuana sosejje quiaje'yo oya jjonojjajja quea huiso nee” poanaje. Majoya equé mese quea huesha poquinaje. ²Quijje jjonojjajja jahuajo, equé meseya o chacojji huoojea canaje que jaahuanajji que jjonojjajja jjequiya. Que jaahuanajji bañaquei majje huohui canaje jama ba'a: “¡Che mo jjonojjajja joya equé meseja pa cadojo'yahua, de!” poanaje.

³—Que jaahuanajji cuaa quea mimishi jjejojo, jjonojjajja, uva quia'yo jjima acanaje, joya equé meseja iyatepe mee. Jamajjeya o chacosahuajji poani iña canaje, cuia canaje. Huoojea ca'yonaje jamatii, emejjee tii. ⁴Equé meseya pea huoojea ca o'oyanaje o chacosahuajji. Jamatii yahuajo jama acanaje que jaahuanajji cuaa. Sapa cuiahuejjajja'ajja canaje, quea mimishi acanaje pea'ai. ⁵Quijje equé meseya pea huoojea, pea huoojea a'ajja canaje. Jamatii que jaahuanajjiya jjonojjajja quia sa po'yo ajjaa jjejojo oya cuana iña canaje, cuiajea canaje, pea quecua canaje, pea sapa jajahuejjajja canaje meiya. ⁶Quijje yejje nei oja bacua ejja oe nei huoojea canaje que jaahuanajji baa: “¡E'e, oya cuanaa ecue bacua ejja shajja'ajja caje!” poanaje equé mese.

7—Cho, oja bacua ejja poeje ba majje jama poanaje ba'a: “Joya equé meseja bacua ejja poeje. Jjonojjajja yiye quijje ojaya poaje, ejejji mano'yajo. ¡Cua'a, ejjaquecuajeaqui oe! Jamajjeya que esejaya poaje'yo, de” poanaje que jaahuanajji cuana.

8—Jamajjeya aje oe ebacua ejja ña canaje, quecuajea'yo majje jeajeaqui canaje quea huesha nee ma que jaahuanajji mimishi cuaa; equé mese boti'ama acanaje cuaa. Mahuiso esohui —Jesosa poanaje—. 9Jamajjeya joya equé meseya poe o'oya majje ¿yajja acaje'yo acuae jiquio que jaahuanajji quea mimishi cuana? Oya quea quene nee poaje'yo. Ma que jaahuanajji cuana quecuajea caje'yo, de. Que quia caje'yo pea cuana —Jesosaa acanaje.

10—E'e —Jesosa poanaje pea'ai—, ¿a'a miquea eba Eyacuiñajjija esohui etehue'yo yahuajo nei? Jama ejo poa ba'a:

“Oe equi yamajjana equi iyajji cajaa aca poa cuaa. Jamatii Eyacuiñajjija ma eyamajjana equi yamajjana quea ca'a nee nequi mee ca poa.

11 Jamajjeya ojjaña ojaya epeejji cuanaa Eyacuiñajji bihuia cani”. Jamaya yahuajo nei aca poa ejo; eya ma eyamajjana equi iyajji jayojja jama quea ca'a nee nee nequi —Jesosaa acanaje.

12 Jesosaja esohui shajja'ajja majje Jodio cuana quea quene nee poanaje: —¡De! Ecuanao oya mimiani, equi yamajjanajo pojjeama. Eseyá que jaahuanajji quea mimishi jama pea'ai ohuaya acani —poanaje Jodio cuana.

Jamajjeya Jesosa ña sa acanaje ejeanobiajeajji. Jamatii ña jjima; quea mete poanaje. Ojjaña dejja echicha'yo nequica'yo cuaa Jesosa Eyacuiñajjija esohui huohuijji nei nei ba cani. Ojjaña cuanaja quea nahue nee nee Jesosa e'ñajji. Jamajjeya Jodio etii cuanaja Jesosa ña jjima, poquinaje.

Bejjo oe pojji quia cajji ba'e sosejje emeshi mese yasijje
(Mateo 2.15-22; Noca 20.20-26)

13 E'e, Jesosa mimije shajja'ajja majje Jodio edejja tii cuana quea quene nee poanaje. Jamajjeya Paniseo cuana, pea cuana Enodeja ehuohui'yo quea boti nee poanaje pea'ai huoojea canaje Jesosa que. Jama huohuime acanaje ba'a: —¡Poquicue Jesosa dasiaa! ¡Esohui quea camaja nee huohui'ajjaquicue, ojaya yajja saja'ame ya'yojji! Jamajje Moisesija etehue'yo jayojja jama mi saja'a cajo jeanobiajeaje'yo ecuaaya —poanaje Jodio etii cuana.

14 Jamajjeya Paniseo cuana poquinaje Enodeja epeejji cuana nijje Jesosa baa. Ba majje huohui'ajja nisho canaje jama ba'a: —Esohui huohuijji, miyaya e'e jojo nei huohuiaña Eyacuiñajjija ejjashahuabaquijji. Miya edejja tii cuanao jjashahuabaqui ajja, emeshi mese cuanao pea'ai mete'ama. Jamajjeya quea ja'a nee huohuiaña. Jamajje mo che huohuicue: ¿A'a bejjo quia cajji Shomano meshi mese Sesa bajjani yasijje? ¿A'a cuaeya seya sosequiaje so'o Sesaja meshijo ba'e sosejje; equiajji pojjeama pojja'a esejaya? —acanaje cuaa.

¹⁵Ma Jodio cuanaja ejjashahuabaquijji quea ja'a pojjeama Jesosaja eba poanaje. Jamajjeya: —¡Miquiana ca mi ca oe e dasiajji nisho cuana, epeeji nisho quea tai nee nee! ¿Apiojji eya dasia sa aña? ¡Jamatii oe bejjo esodojjo jjequicue ecuea ebajji! —Jesosa poanaje.

¹⁶Jjequi canaje cuaa. Esodojjo ba majje Jesosaa huohui'ajja canaje: —¿Ae ecajja'yo jiquio? ¿Ae bajjani etehue'yo?

—Emeshi mese ecajja'yo, Sesa —poanaje—. Ojaya bajjani etehue'yo yani pea'ai.

¹⁷—E'e —poanaje Jesosa—. ¡Jamajjeya Sesaja bejjo quiaquicue ohua sa cajo! ¡Eyacuiñajji a'a pajea'yojji; oya bihuiacue, shajja'ajjacue pea'ai!

Jesosaa shajja'ajja majje ojjaña cuana quea mete nee poanaje: —Quea jashahuabaqui ja'a nee nee oya Jesosa. Jjadasia meequi ajja —poanaje.

Jamajjeya Jodio etii cuana poquinaje, Jesosa jea cana'yonaje.

¿A'a e'e jojo nei mano'yo majje eshe o'oya quijje poaje'yo?

(Mateo 22.23-33; Noca 20.27-40)

¹⁸Ma pojajajo tii beca Sanoseo cuana poeyanaje Jesosa baa. Sanoseo cuana aje oe jama poani ba'a: —Mano'yo majje jama tii tii eshequi o'oyajji pojjeama quijje.

Jesosaa ca ca jama po ajja. Jamajjeya Jesosa dasia sa acanajejo jama anisho canaje ba'a: ¹⁹—Esohui huohuijji, Moisesiya jama tehue ca poa yahuajo nei nei ba'a: “Dejja ejjahuanaqui bacuama' mano'yajo, oja chahuua ehuanase equijjojea ani cahuana ca'yahua oja o'ija bacua jea jayojja jama epojji”. ¿A'a e'e? ²⁰Jamajjeya jama poso ba'a: Quea huiso edoe mese, me oeje pea beca, nequinaje. Edoe mese ebionei jjahuanaquinaje eponajo. Mano'yonaje bacuama' tii. ²¹Oja chahuua ehuanase equijjojea ani huana ca'yonaje, bacuama' tii ani. Oya jayojja mano'yonaje bacuama' tii. Jamajjeya peaa echahua meseya huana ca o'oyanaje. Mano'yonaje bacuama' pea'ai. ²²Jamaya ojjaña edoe mese cuana manojeyo'yonaje bacuama' tii. Quijje ehuanase pea'ai mano'yonaje. ²³Jamajjeya eshe o'oya po majje eyajo, ¿ajea ehuanase epona poaje, ache edoe meseja? Ojjaña echahua mese jjahuea'ajja'yo epo —Sanoseo cuaa acanaje Jesosa dasiajji nisho.

²⁴Jesosaa jama acanaje ba'a: —Chojja. Jamaya pojjeama. Miquea ba jjima Eyacuiñajji esohui; oya quea ca'a nee nee miquea ba jjima pea'ai. ²⁵E'e, shequi o'oya majje jjahuanaqui'yo ajja. Esohuidojojji eyajo ani jama poaje. ²⁶E'e, yahuajo nei nei Eyacuiñajjiya Moisesi tehue mee ca poa miquea ebajji e'e jojo nei emano'yo cuana eshe nequije o'oya eyajo. E'e, Moisesi acui quepe jijiqui pejejo nequi, Eyacuiñajjiya oya huohui ca poa jama ba'a: “Eya ca ca iña Amajama jaahuanajji, Isaaca, Jacobo pea'ai jaahuanajji”. Jamaya yahuajo nei nei Eyacuiñajjiya aca poa. ²⁷¿A'a Eyacuiñajjiya emano'yo cuana meshijo emojea'yojaa jaahuana cani? Cho. Ojaya epeeji cuana eshe nequi, mano'yo majje poqui'yo cuana pea'ai jaahuana cani Eyacuiñajjiya, eshe

o'oya epo'yo edojjoshahua jiquio ese mimianinaje. Jamajjeya e'e jojo nei emano'yo cuana shequije o'oya, de. Miquianaya ca mi ca oe quea quehua jjashahuabaquiani —Jesosa Sanoseo cuana acanaje.

¡Eyacuiñajji quea jea nee acue mi pejjejo nequi cuana pea'ai!

(Mateo 22.34-40; Noca 10.25-28)

²⁸ Moisesija etehue'yo huohuijji jomajo nequi Jesosa shajja'ajja canaje quea jjashahuabaqui ja'a nee; Sanoseo cuana jjadasia meequi ajja. Jamajjeya Jesosa huohui'ajja canaje jama ba'a: —Esohui huohuijji, yahuajo Moisesiya tehue ca poa Eyacuiñajjija esohui. ¿Ache esohui quea pame nee nee e'ajji?

²⁹ Jesosa oya acanaje: —E'e, jiquio esohui quea pame nee jayojja jama acue ba'a:

“¡Isaeni cuana shajja'ajjacue! Eyacuiñajji ca ca oe Emeshi Mese nei. Oya oe nei enequi tii. Pea chama' Eyacuiñajji. ³⁰ Jamajjeya ¡Eyacuiñajji miquianajaya Emeshi Mese quea jea nee nee acue! ¡E'e, miquea huapa pojjeama cuana quea jea nee acue! ¡Quea jea nee neeya oe acue Eyacuiñajji! ¡Jamajje ojo jjashahuaba tiitiqicue! ¡Oya shajja'ajja tiitiicue! ¡Ojaya epeeji quea ja'a nee nee acue pea'ai!”

³¹ Jiquio esohui quea pame nee. Pea oya jayojja quea pame nee jama ba'a:

“¡Miquea huapa pojjeama jama quea jea neeya oe acue! ¡Ojjaña pea cuana quea jea nee nee acue pea'ai!”

Jamaya quea pame nee nee e'ajji —Jesosa poanaje—. Pea chama' esohui jiquio jayojja quea pame nee.

³² Jesosaja esohui shajja'ajja majjeya Moisesija etehue'yo huohuijji onijje jama poanaje ba'a: —Esohui huohuijji Jesosa, miquea esohui e'e jojo nei. E'e jojo nei Eyacuiñajji Emeshi Mese nei. Oya oe nei enequi tii, pea chama' Eyacuiñajji. ³³ Jamajjeya Eyacuiñajji Emeshi Mese nei quea jea nee nee ca'a cahua, ojo cajjashahuaba tiitiqiahua, cashajja'ajja tiitii cahua, ojaya epeeji quea ja'a nee nee capoahua pea'ai ojjaña. Oya jayojja pea cuana quea jea nee nee ca'a cahua. Jamaya poanijo quea pame nee nee poani. Jodio etiiquiana cuana jayojja jama po majje ca ca quea pame pishana poani. E'e, etiiquiana cuaa ca ca huo cuana, pea aqui ana pea'ai mei e'lya'yo biajje dahua caninaje Eyacuiñajji quea bei po meeji mimishijo —poanaje Moisesija etehue'yo huohuijji.

³⁴ Ojaya esohui quea ja'a nee shajja'ajja majje Jesosa oya huohui canaje jama ba'a: —E'e, miya beshahua nei Eyacuiñajji sa neinei poani miquea Emeshi Mese nei epojji —acanaje.

Jesosa quea jjashahuabaqui ja'a nee neejo jjadasia meequi ajja ba majje ojjaña Jodio etii cuana quea mete poanaje. Esohui quea camaja, yajja sohui esaja'ame yajjijojo huohui'ajja pajea canaje o dasiajji nisho.

Jesosa Eyacuiñajjija huoojea'yo ojjaña jaahuanajji Quito

(Mateo 22.41-46; Noca 20.41-44)

³⁵Jamajjeya ojjaña cuana ejjachichaqui nequi huohui'ajja canaje Jesosaa: —¿Yajja poani miquianaya Eyacuiñajjija huoojea'yo ojjaña jaahuanajji Quitojo? ¿Ache etiquianaja osecua oya, ajea bacua? ¿Yajjajje acuae Moisesija etehue'yo huohuijji cuaa huohui cani? Jama ba'a: “Quito emeshi mese Dabija osecua, ma yahuajo ba'ya poaja” acani cuaa —Jesosa poanaje—. ³⁶Yahuajo nei Edojjoshahua Pameya emeshi mese Dabi tehue mee ca poa jama ba'a:

“Eyacuiñajjiya ecuea Emeshi Mese Quito jama aca poa: —¡Enijje anioquecua ebiane mi mijije, ojjaña cuana huoojea'yojji! Eyaya mi quecuajji nisho epo cuana jeabichajea jeyojeyo'yo”.

Jamaya huohui ca poa yahuajo Dabiya ejo. ³⁷E'e, Dabiya Eyacuiñajjija huoojea'yo Quito aca poa: “Ecuea Emeshi Mese nei”. Jamajjeya Quito Dabiya Emeshi Mese nei poani. Jamatii oya Dabiya osecua pea'ai —Jesosaa acanaje.

Ojjaña cuaa ejjachichaqui nequiya Jesosaja esohui shajja'ajja canaje. Quea bihui nee poanaje.

—¡A'a Jodioja esohui huohuijji jama ba'ejji! —Jesosa poanaje

(Mateo 23.1-36; Noca 11.37-54, 20.45-47)

³⁸Majoya Jesosaa ojjaña cuana huohui canaje jama ba'a: —¡Jodio esohui huohuijji cuana jayojja jama a'a ba'ejji! Oya cuanaa daqui quea pame nee nee, quea ao nee huosho cani onajaya ebajji. Ejiojjijje poquiani ojjaña aquiana quia cani yasijje anicuaa; pea cuaa jama bihuia cani ba'a: “¡Esohui huohuijji, miya quea pame nee nee!” Jamaya aje oe ojaya quea boti nee, jiquio Jodio etii cuanaja, esohui huohuijji quea pame nee poso jjabaquiani —Jesosa poanaje—. ³⁹Jodioja equi ejjachichaquijji ebionei anioque sa poani, Eyacuiñajjija esohui huohuijji pejejo, ojjaña nijje emimijji. “E'e, oya cuana Eyacuiñajjija esohui huohuijji nei jayojja quea pame nee” epo meeji acani. Ojee ijja'ijjianajo emeshi mese pejejo anioqueani, ebionei e'ijja'ijji. ⁴⁰Jamatii oya cuana aje oe siipojji; e'ahuemanoja equi cuana sii cani. Majoya Eyacuiñajji nijje mimi nishoani quea huiso nee. Jamajjeya Eyacuiñajjiya oya cuana cajaa acaje'yo. Quijje quea nee nee po mee caje'yo, quea nee tii tii poaje'yo. Pea cuana ca ca quea nee po mee caje'yo. Jamajjeya ja'a oya cuana jayojja jama ajji! —Jesosaa ojjaña cuana huohui canaje.

E'ahuemanohua ejjeshejji quia canaje

(Noca 21.1-4)

⁴¹Majoya Jesosa Eyacuiñajjija equijo ejjeshejji iyajji pejejo anioquenaje. Ba canaje dejjaa quea huiso poe majje ejjeshejji iyanobia cani ma acui ecaca huasijje Eyacuiñajji yasijje equia'yojji. Joya quea

aquiána huiso neeya iyanobia canaje quea huiso nee ejjeshejji. ⁴²Majoya e'ahuemano aema' poeyanaje. Ojaya ca ca esodojjo beca iyanobia canaje, sosema' pishana. ⁴³Jamatii oya ba majje Jesosaa o shajja'ajjajji cuana iyaa canaje. Jama poanaje ba'a: —¡Bacue! E'e jojo nei jiquio e'ahuemanohua quea huiso nee nee jayojja quia ca'yonaje. Pea cuaa oe pojji jayojja quia ca'yonaje. Jamaya Eyacuiñajjiya oya ba cani. ⁴⁴E'e, pea cuana quea aquiána huiso nee nee. Oe pojji ojaya aquiána cuana quia canaje. E'ahuemano ca ca aema' nei nei. Ohuaya ojjaña ojaya ejjeshejji quia canaje; bobi jjeshejji yajji nisho quia canaje pea'ai —Jesosa poanaje.

Eyacuiñajjiya mei equi cajjajeajea caje'yo cuaa
(Mateo 24.1-2; Noca 21.5-6)

13 ¹Majoya Jesosa Eyacuiñajjiya equijo ani poquinaje. Poquianijo, o shajja'ajjajji cuaa oya huohui canaje jama ba'a: —¡Bacue Eyacuiñajjiya equi! Quea quemó, quea pame mei cuana —poanaje.
²—E'e, ¿a'a jiquio equi quea pame nee baña? E'e jojo nei quijje mei cuana cajjajeajea caje'yo cuaa. Chama'yo tii acaje'yo —Jesosa poanaje.

Jiquio ojjaña aquiána oe poaje'yo
(Mateo 24.3-28; Noca 21.7-19)

³Majoya Jesosa poquinaje quea huesha pishana, enata'a ojje miji yasijje. Eyiyo Onimo acui yiye yasijje jaasohuaquinaje. Anioquenaje. Jamajje o shajja'ajjajji cuaa, Penohua, Anesiya, Huaniya, Jacobohua pea'ai oya huohui'ajja canaje jama ba'a: ⁴—Jesosa, ¿ache shono acuae mei cuana cajjajeajea caje'yo cuaa so'o? ¿A'ya ba majje acuae ecuana jjabahuejjaquije so'o ojjaña jiquio meshi chama'yo tii epojjijo?

⁵Jesosaa saja'a canaje: —¡Jjashahuaba neineiquicue onajaya miya edasiajji pojjeama! ⁶Quea huiso sijjepojji cuana poeje, ecuea ehoojea'yo pojjeama: “Eyacuiñajjiya eya huoojea canaje, eya ca ca iña ojjaña jaahuanajji” jamaya sijje poaje. Quea huiso dasia caje'yo. ⁷“Ojjaña jjaquecuaquiani, ojjaña meshi yasijje pea'ai” huohui caje peaaya pea'ai. ¡Jamatii a'a quea mete pojji! Jamaya poaje. Jamatii apoa pojjeama, oe po ajja jjima poaje so'o —Jesosa poanaje—. ⁸E'e, jjaquecuaqui caje'yo cuana ojjaña meshi yasijje, ojjaña cuiñajji yasijje pea'ai. Quea huiso emanomeejjiya mano mee caje'yo; bobi yasijje po majje manojje'yo quea huiso; meshi huehuahuehuaje ojjaña meshi yasijje pea'ai —Jesosa poanaje—. E'e, jiquio ecua epona bacua neeani jama ebionei japashineijje neeani; quijje quea nee nee. Jamaya poaje e poe o'oya jjimahuajo. Quea nee pishana po majje quea nee nee poaje ojjaña cuana —Jesosa poanaje.

⁹—Majoya esohui huohuijji nisho cuaa miquianaya iña majje jeanobiajea caje'yo. Cuiasejjajea caje equi ojee ejjachichaquijjijo pea'ai. Enijje jjapeequianijo, pea cuaa miquianaya iña majje emeshi mese cuana huasijje dojo caje, ona

huoajeajji cuana huasijje pea'ai. Jamaya poajo, ¡ecuea esohui huohuicue ojaya eshajja'ajjajji, emeshi mese cuanaja eshajja'ajjajji! ¹⁰E'e jojo nei e poe o'oya jjimahuajo, ojjaña meshi cuana huasijje ecuea esohui quea pame nee cahuhuiqui cahua, ojjañaja eshajja'ajjajji. Majoya e poe o'oyajo, ojjaña oe poaje —Jesosa poanaje. ¹¹Jamajjeya miqúanaya iña cajo emeshi mese yasijje edojjji, ja'a quea mete pojji! A'a jjashahuabaquijji jama ba'a: “¿Ae shai eyaya emeshi mese huohuije?” Edojjoshahua Pameya miqúanaya sohuihuohui meesahua caje. Jamajjeya Edojjoshahua Pame mijo yaniya ohuaya esohui huohui caje ecuea ejjashahuabaquijji. ¹²Majoya pea cuana boti'ama acaje'yo cuanaja. Jamajjeya e'o'i meseya oja chahua iña meesahua caje onaja equecua'yojji; ejeajjiya oja bacua iña meesahua caje onajaya equecua'yojji pea'ai. Esho'iquiana shajjama' po majje oja chii, ojaya enaese pea'ai iña meesahua caje onajaya equecua'yojji pea'ai. ¹³Enijje jjapeequianijo miqúanaya boti'ama nei acaje ojjaña meshijo ba'eca cuaa. Jamatii e poe o'oya jjimahuajo, enijje jjapeequipajea'yo ajja tii ca ca Eyacuiñajji nijje ba'e tiitii meeje'yo, enijje pea'ai —Jesosa poanaje.

Aquiana quea tai nee ojjaña quea mete nee nee epo meeji

(Mateo 24.15-28; Noca 21.20-24, 17.22-24)

¹⁴—Eyacuiñajjiya esohui huohuijjiya yahuajo nei nei jama aca poa ba'a: “Quijje Eyacuiñajjiya equijo nequije aquiana quea tai nee nee, ojjaña quea mete nee nee epo meeji”.

Jamajjeya ma ba majje ma pojjajo tii ojjaña Jodio meshijo ba'eca capoquicuajiahua eyiyo cuana huasijje. (¡Jiquio esohuijo jjashahuabaquicue quea ja'a epojji!) ¹⁵Joya equi huisa biajje chacochoani ja'a equi yasijje dobiqúinanajji aquiana cuana biohua edojjji! ¹⁶Joya quejo chacochoqui pea'ai ja'a equi yasijje poqúinanajji daqui moojo! Eyiyo huasijje poquicuaji ajjajo mano'yo chana'. ¹⁷Epona cuana o'eji, bacua sho'ijji pea'ai quea yeno poaje; quea camaja equehua poquicuajji poaje. ¹⁸Jamajjeya Eyacuiñajji nijje mimicue jama ba'a: “Eyacuiñajji, ¡eenajo pojjeama capoahua ecuanaja epoquijji eyiyo cuana huasijje!” acue —Jesosa poanaje—. ¹⁹E'e, ma pojja cuanajo ojjaña quea mete nee nee, quea yeno nee nee poaje. Jamaya pojjeama yahuajo, meshi pana majje, jjeya nei pea'ai, quijje pea'ai; quea mete pishana, quea yeno pishana. Ma pojja quea camaja cuanajo ca ca quea yeno nee poaje ojjaña cuana —Jesosa poanaje—. ²⁰Eyacuiñajjiya oe pojji cahuijo quea camaja po mee caje'yo; quea cahui huiso epo'yo jojjemo, ojjaña cuana mano'yome. Ojaya epeejji jaahuana canijo, ojaya quea nahue nee emano jeyojeyo'yojji, Eyacuiñajjiya oe pojji cahuijo quea camaja amee caje'yo, quea cahui huiso pojjeama —Jesosa poanaje.

²¹—Ma pojja cuanajo a'a shajja'ajjajji ona siajje poajo jama ba'a: “¡Bacue oe, Eyacuiñajjiya huoojea'yo Quito jiquiacua poe'yonaje!” Jama poso, ja'a shajja'ajjajji! “¡Bacue oe, Quito jocuama pa poeyanaje!” jama onaa acajje ja'a shajja'ajjajji; a'a poquijji! ²²E'e, Eyacuiñajjiya huoojea'yo ojjaña jaahuanajji

e jayojja nisho, Eyacuiñajjija esohui huohuijji nisho pea'ai poeje quea huiso nee nee. Oya cuanaa ma pea dejjaa ajjima acani acaje'yo Eyacuiñajjija epeeji cuana dasia'yoyji nisho. Dasia caje'yo quea huiso nee; ecuea epeeji nei pea'ai beshahua nei eya pajea mee caje'yo o jayojja epojji; cho, jjadasia meequi ajja. ²³Ecuea epeeji cuana, eyaya miya huohuinaje, quijje oya poeje ejjadasiaquijji. Jamajjeya ¡a'a oya cuana shajja'ajjajji! —Jesosa poanaje.

Jesosa ojjañaja Edoe Mese poeje o'oya
(Mateo 24.29-31; Noca 21.25-28)

²⁴—E'e—Jesosa poanaje—, quijje quea camaja nee nee po majje majoya eshequi quea apo poaje'yo. Ba'i jiji'yo ajja poaje'yo. ²⁵Majameta cuana jjacajjaqui'yo majje jijioqueje'yo ojjaña pea'ai. Majameta nequijji cuana huehuahuehuaje'yo janobajjima nei pea'ai; yahuajo jayojja pojjeama poaje. ²⁶Majoya ojjaña aya ba caje eyajo. Ba majje huohui caje jama ba'a: “¡Bacue! E'e jojo nei Jesosa ojjañaja Edoe Mese poeje'yo bo cuana biajje. Oya oe nei quea ca'a nee nee, quea jeajahua nee nee pea'ai” acaje cuaa —Jesosa poanaje—. ²⁷Majoya eyaya esohuidojojji cuana huoojeaje'yo biacua, macua huasijje pea'ai ojjaña meshi yasijje pea'ai ecuea epeeji cuana jjequiya —Jesosa poanaje.

Esohui acuijo, iquena bajjanijo, huohui canaje Jesosaa
(Mateo 24.32-35; Noca 21.29-33)

²⁸Jesosaa huohui canaje pea jama ba'a: —E'e, eyaya miquianaya esohui ejjashahuabaquimeejji huohuije iquena acuijo. Eseja meshijo acui iña'yani ba majje eseya poani: “E'e nei, nayaja po'yonaje. Jjeya eshequiaja popaje'yonaje”.

²⁹—Ma jayojja jama eshequi, ba'i quea misi, majameta eyajo jijijijioqueani ba majje jjashahuabaquicue jama ba'a: “E'e, jjeya nei apoa poaje. Jjeyahua nei esejaya Emeshi Mese nei Jesosa Quito poeje o'oya”.

³⁰—E'e jojo nei ojjaña ma pojja cuanajo ba'eca cuana mano jeyojeyo'yo jjimahuajo ojjaña apoa poaje'yo; eya ojjañaja Emeshi Mese nequije'yo.

³¹E'e, aquiana eyajo nequi chama' poaje'yo; ojjaña meshi chama'yo tii poaje'yo pea'ai. Jamatii ecuea esohui oe epo'yoyji pojjeama; e'e jojo nei eyaya jamaya aj'e'yo tii tii —Jesosa poanaje—. ³²¿Ache shono shai jamaya poaje, ojjaña apoa poaje'yo? Dejja cuanaja ba jjima; esohuidojojji cuanaja ba jjima pea'ai; ecuea ehuhuijji pojjeama. Ecue Chiija eba ojaye nei. Ohuaye nei huohui caje'yo ojjaña apoa epo'yoyji —Jesosa poanaje.

³³—Jamajjeya ¡jjashahuabaqui tiitii anicue! Ache pojajajo eya ojjañaja Emeshi Mese nei poeje o'oya miquea eba pojjeama. ³⁴Jiquio jama poaje ba'a: E'equi mese poqui jjimahuajo echacojji cuana iyaa canaje. Huoojea canaje jama ba'a: “¡Ecuea equi cuiñacue, miquianaaya! ¡Ecuea ehuhui mi yasijje jama chacocue pea'ai! Quijje eya poeje o'oya” e'equi mese poanaje —Jesosa poanaje—.

³⁵Jamajjeya ¡jja'ishoa'ajjaqui ani tiitii! Eya miquianajaya e'equi mese

jayojja; ache nei eshequi nequijo poeje o'oya miquianajaya ebajo ese. ¡Sinecua, mecashono, mecajjeahua cuana jja'ishoa'ajjaqui anicue! ³⁶Apoa pojjeama, ecahuijaa ba majje tecueña je poe majje —Jesosa poanaje—. ³⁷Jamaya eyaya ojjaña ecuea epeeji cuana huohuiaña pea'ai: ¡Apoa epo anicue quiana! —jamaya Jesosaa sohuihuohui canaje Jenosanenajo, Onimo yiyejo.

Jodio etii cuana jjashahuaba taiquinaje Jesosa quecua'yojji
(Mateo 26.1-5; Noca 22.1-2; Huani 11.45-53)

14 ¹E'e, ojjaña Jodio cuana ojee jjachichaqui o'oyanaje Jenosanena huasijje ojee ijia'ijjiaa, quea bihui nee epojji, yahuajo nei esohuidojojjiya Ejito meshijo Jodioja bacua cuana cuia'yo jjima aca poa niñeba'yojji. Beca cahuime ojee ijia jjimahuajo, noe, pahui eshejeemeejjima' ijia jjimahuajo, Eyacuiñajji nijje emimijji etii cuana, Moisesija etehue'yo huohuijji cuana pea'ai jjashahuabaquinaje Jesosa quecua'yojji. ²Ojee mimimiminaje jama ba'a: —¡Jesosa quehua nei je inacue, ojjaña Jodio cuana jjachichaqui jjimahuajo! ¡Oya inacue jjeyahua nei, de! Quije pishana ojjaña ojee ijia'ijjianijo, ecuanajaya Jesosa e'ñajji pojjeama. Chojja, ojjaña Jodio cuana quea quene nee nee ecuaña nijje po chana! —poanaje Jodio edejja tii cuana.

Eponaa Jesosa sapa sha canaje shiyeshiyeya
(Mateo 26.6-13; Huani 12.1-8)

³Jesosa Betaniajo ani poquinaje Simonija equi yasijje. Poquinaje ijia'ijjiaa. Yahuajo nei Simoni quea mano nee nee batata epo'yo quea tai poa, ma dejja cuaa jjajea meequi'yo jjima acani. Jesosaa oya yahuajo jjajeaqui mee ca'yonaje batata epo'yo. Simonija equijo ojee ijia'ijjianijo, oe epona Jesosa que poeyanaje. Tahuoo quea nahue nee nee shiyeshiye ye canaje. Tahuoo naba capa majje Jesosa huojja sha canaje shiyeshiyeya, nardo bajjaniya. ⁴Ma ba majje beca cuana quea quene poanaje; epona tecuea canaje jama ba'a: —¿Apiojji acuae miyaya jiquio shiyeshiyeya Jesosa sapa quehua shaña so'o? ⁵¡Quea nahue nee nee eshojeajejji, oe shequiaya echacome jama sosejjeme, de! ¿Sha jjima yajji po so ca mi ca oe shiyeshiye dojo meenaje esodojjo quea huiso sosejje? E'e, aema' cuana huasijje esodojjo equiajji po so —epona acanaje cuaa.

⁶Jesosaa ca ca oya shajja'ajja majje jama acanaje ba'a: —¿Apiojji acuaeya epona tecueña so'o? ¡A'a oya tecueajji! E'e, eya ohuaya huojja sha canaje. Jamaya quea pame nee. ⁷E'e, aema' cuana minijje po tiitijje'yo. ¡Oya cuana jaahuana'yocue quijje pea'ai! Eya ca ca enequi tiitijji pojjeama minijje. ⁸Epona e huojja sha jjimahuajo jjashahuabaquinaje jama ba'a: “E'e e, Jesosa manojje'yo. Mano jjimahuajo, eyaya oya huojja shaña shiyeshiyeya; onaja mojea jjimahua shaña poanaje epona” —Jesosaa acanaje.

⁹—Jamajjea quijje ojjaña meshijo ecuea esohui huohui majje jiquio eponajo huohui capoquipoquije pea'ai jama ba'a: “Oe eponaa Jesosa

huojja sha canaje shiyeshiyeya, quea jea nee neejojo”. Jiquio eponajo huohui tiitii caje, e'e jojo nei —jamaya Jesusaa acanaje.

Jodasaa onaya iña meesahua canaje Jesosa

(Mateo 26.14-16; Noca 22.3-6)

¹⁰Yaninaje quea huiso Jesosa shajja'ajjajji cuana, 12. Oe nei Jodasa Isicanote bajjani poquinaje Eyacuiñajji nijje emimijji etii cuana huasijje. Jama poanaje ba'a: —Eyaya miya Jesosa iña meesahuaje. ¿Ache sose huiso acuae mo ya oe sosequiaje so'o Jesosa iña meesahua sosejje? —poanaje Jodasa.

¹¹Oya cuanaa Jodasa saja'a canaje quea bihui nee jama ba'a: —E'e, Jesosa iña meesahua sosejje miya sosequiaje'yo quea huiso —poanaje Jodio etii.

Jamajjeya Jodasa jashahuaba neinei qui aninaje: —¿Achajja iña meeme aje so'o? Caba'ajjaquisahua —poanaje.

Jesosaa o shajja'ajjajji cuana bobi ijia mee canaje

(Mateo 26.17-29; Noca 22.7-23; Huani 13.21-30; 1 Conitio 11.23-26)

¹²Jodio cuana quea bihui ojee ijia'ijjianinaje yohua shejo ba'a esohuidojojjiya yahuajo nei etiiquianaja bacua cuana cuia'yo jjima ñajjajja na' esecuejo e'ñapepa ba majje. Jamajjeya ebionei epojjajo e'ijia'ijjajji, pahui quea ca'a ijia canijo, ñajjajja cuia cajji, Jesosa que poe majje o shajja'ajjajji cuaa huohui'ajja canaje jama ba'a: —Jesosa, ¿ache equijo acuae seya pahui eshejje meejjijo hua jjima ijiaje so'o? ¡Ecuana huoojeacue aquiana iyajee, mi ishoajji!

¹³Jamajjeya Jesusaa beca shajja'ajjajji huoojea canaje: —¡Poquicue Jenosanena huasijje! ¡Jomajo ecuea epeeji baquicue ena abo cani! ¡Onijje poquicue! ¹⁴Oya equi yasijje dobiquiyajo, ma equi mese nijje mimicue jama ba'a: “Ecuana sohui huohuijji jama poanaje ba'a: “Miquea equijo eyaya e shajja'ajjajji cuana nijjeya pahui ca'a ijiaje esohuidojojjiya etiiquianaja bacua ejja cuana cuia'yo jjima poa shejo. ¿Ache equi quecuayijji ijiaje so'o?” jamaya acue —Jesusaa acanaje—. ¹⁵Majoya equi meseya miya dojo caje eyahuasijje equi quecuayijji ai yasijje. Jomajo ojjaña aquiana apoa, ehuana bamebame'yo. ¡Jomajo bobi iyacue esejaya ojee e'ijjajji! —Jesosa poanaje.

¹⁶O shajja'ajjajji beca poquinaje Jenosanena huasijje. Jomajo Jesusaja esohui jayojja jama ojjaña ba cañaquinaje. Bobi iyajee canaje pahui ca'a ijiajji.

¹⁷Majoya sinecua neijo Jesosa o shajja'ajjajji cuana nijje, 12 huisome nijje ma equi yasijje poquinaje. Dobiqui majje jaosohuaquinaje equi quecuayijji ai yasijje, equi jamacoo huasijje. Majoya ojjaña cuana anioquenaje bobi ijiajji pejeje ijia'ijjia. ¹⁸Ojee ijia'ijjia anijo Jesosa jama poanaje ba'a: —E'e jojo nei jiquiojo aniya oe epeeji nisho enijje ijia'ijjia ani. Ohuaya onaya cuana eya iña meesahua caje'yo equecua'yojji.

¹⁹Ma shajja'ajja majje ojjaña cuana quea yeno nee nee poanaje. Pea mimiajo, pea poanaje jama ba'a: —Ecuea Emeshi Mese, eya ca ca o jayojja pojjeama, e'e jojo nei —jamaya ojjaña miminaje.

²⁰Majoya Jesosa onijje jama poanaje ba'a: —E'e, miqianaya e shajja'ajjajjiya 12 huisome enijje yani; oe aje epeeji nisho, de. E'e, maaya pahui shapeshipeshiani enijje; ohuaya eya onaya cuana iña meesahua caje'yo onajaya equecua'yojji. ²¹E'e, yahuajo nei Eyacuiñajjiya esohui tehuejji cuaa esohui tehue ca poa jama ba'a:

“Quijje oe dejjaa Eyacuiñajjiya huoojea'yo ojjaña jaahuanajji onaya cuana iña meesahua caje'yo equecua'yojji”.

Ma etehue'yo jama capoahua. Jamatii ma dejja, e iña meesahuajji epo quijje quea yeno nee poaje'yo. Jjashahuabaquije jama ba'a: “¿Apiojji shai eya ecue naeya mejo ca poa? Eya ca ca nequi sa po ajja. Ecuea ejjashahuaba taiquijjiyo mano'yo sa poani” oya poaje. Quijje oya quea nee nee po tiitiije'yo —Jesosa poanaje.

²²Majoya ojee ijia'ijjia anijo tii Jesosaa pahui ca'a jjeshe canaje. Eyacuiñajji bihuia majje, pahui mijisisi majje quia canaje o shajja'ajjajji cuana. Jama poanaje ba'a: —¡Ijjiacue! Jiquio ecuea eyami —poanaje.

²³Pahui ijia majje caneco jjeshe canaje Jesosaa. Eyacuiñajji bihuia majje quia canaje ojjaña o shajja'ajjajji cuana. ²⁴—¡Ishicue! Jiquio ecuea ena'. Ecuea ena' cuayaquijajo, eya manoj'e'yo. Jamajoya eyaya ojjañaja mimishi cuana cuijeaje'yo enijje jjapeequijajo, Eyacuiñajjiya esohui eyacua jayojja jama aje'yo. ²⁵Jjeya eyaya jiquio jjonojjajja na, uva na, e'ishi o'oyajji pojjeama miqiana nijje; eya manoj'e'yo. Quijje nei poe o'oya majje eyaya jiquio ishije o'oya miqiana nijje. E'e, eya poe o'oyajo, ecue Chiiya eya ojjaña huoojea'yojji pomee caje'yo, ojjaña shajja'ajja caje —jamaya Jesosaa acanaje.

Penohua Jesosa ba jjima nisho acaje'yo pa
(Mateo 26.30-35; Noca 22.31-34; Huani 13.36-38)

²⁶Majoya ojee sohuicuaya majje poquinaje eyiyo huasijje, Onimo jjajja meshi yasijje.

²⁷Ejiojijje poquije Jesosaa o shajja'ajjajji cuana acanaje jama ba'a: —Jiquio mecajje ojjaña miqianaya enijje jjapeequipajeaje'yo. E'e, yahuajo Eyacuiñajjiya esohui tehuejji cuaa ejo tehue ca poa jayojja jama poaje jama ba'a:

“Quijje eyaya ñajjajja cuiñajji jaahuana neinei ajja. Jamajjeya onaaya oya cuia caje'yo. Ñajjajja cuiñajji chamajo, ñajjajja cuana jjajeaajajeaquinanaje'yo”.

Jamaya yahuajo nei nei tehue ca poa ejo —Jesosaa acanaje—. E'e, eya ñajjajja cuiñajji jayojja jama poaje. Eya mano'yo majje ecuea epeeji cuana ñajjajja cuana jayojja jama poaje; jjajeaajajeaquinanaje'yo.

²⁸—Jamatii Eyacuiñajjiya eya shequi mee ca o'oyajje eya poquije Janinea meshi yasijje. Jomajo aje mi poeyajo ishoañaquije —Jesosa poanaje.

²⁹Penohua Jesosa jama acanaje ba'a: —E'e pojja'a pea cuana minijje jjapee tiitiiqui'yo ajja. Eya ca ca pea jayojja jama pojjeama. Eya jjapee tiitiiquije'yo minijje —poanaje Peno.

³⁰Jesosaa Peno jama acanaje ba'a: —Eyaya miya e'e jojo nei huohuiaña, Peno, jiquio mecajje tii cachina yahue beca taaame po jjimahuajo, pea beca peejjima huohui'ajjame acajje, miya ejo po huicha'a huicha'aje jama ba'a: “Chojja de, ecuea Jesosa ba jjima nei nei” miyaya saja'ame aje quea meteya jjejojo —Jesosaa acanaje.

³¹Jamatii Penohua Jesosa acanaje: —Chojja, Jesosa. E'e pojja'a eya minijje jjapeequianijo, pea cuaa eya cuiajea caje'yo. ¡Jamatii ecuea ca mi ca epajea'yojji pojjeama!

Oya jayojja pea cuaa acanaje pea'ai: —E'e, Jesosa, ecuanajaya ca mi ca epajea'yojji pojjeama tii, jamatii onaa cuiajea caje'yo pojja'a.

Quea yeno nee nee Jesosa oja Chii nijje miminaje Jetesemani quejo
(Mateo 26.36-46; Noca 22.39-46)

³²Majoya Jesosa o shajja'ajjajji cuana nijje Jetesemani que yasijje poquinaje. Jesosa onijje miminaje jama ba'a: —¡Anioquecue jiquiojo tii! Jocuama eya poquije ecue Chii nijje mimiya.

³³Jamajjeya Jesosaa Peno, Huani, Satiaco pea'ai dojo canaje jocuama. Oya Jesosa jjashahuabaquinaje quea yeno nee nee. ³⁴Jamajjeya ojaya epeeji nijje jama poanaje ba'a: —Quea yeno nee nee iña; manoje'yo iña, de. ¡Anioquecue enijje; a'a cahuijji! —Jesosa poanaje.

³⁵Majoya Jesosa cuama pishana poqui majje ecui'oshajjajo nequinaje. Oja Chii nijje miminaje quea yeno nee jama ba'a: ³⁶—Ecue Chii, miquea ejjashahuabaqui'yojji jayojja jama eyaya aje'yo. Miyaya eya huoojeanaje ojjañaja mimishijo mano'yohua. Quea camaja nee nee ejo. ¿A'a ya iña miyaya che onaaya quecua mee'yo jjima aje'yo? ¿A'a ya iña che iña mee'yo jjima aje'yo? ¡Jamatii miquea ejjashahuabaqui'yojji jayojjaya jama acue! ¡Ecuea ejjashahuabaqui'yojji jayojja jama a'a ajji! —Jesosa jamaya miminaje oja Chii nijje.

³⁷Majoya oya poqui o'oyanaje o shajja'ajjajji cuana huasijje. Ba cañaqui'yonaje ecahuijaa. Tecue'lama Peno nijje jama poanaje ba'a: —¿A'a mi cahuijaa? ¿A'a mi enijje cahui jjima che nequi jjima?

³⁸Majoya Jesosaa ojjaña cuana acanaje: —¡A'a cahuijji! ¡Eyacuiñajji nijje mimi majamajacue! Jamajoya pea cuaa miya quea mimishi epo mee'yojji pojjeama. E'e, miquianaya enijje jjapeequi sa poani e'e jojo nei. Jamatii miya ca'a'ama; quea mimishi poaje o'oya pojja'a —Jesosa poanaje.

³⁹Majoya Jesosa poqui o'oyanaje jocuama pishana oja Chii nijje mimi o'oyaa. Yahuajo jayojja mimi o'oyame poanaje.

⁴⁰Oja Chii nijje mimi o'oya majje Jesosa poqui o'oyanaje o shajja'ajjajji cuana huasijje. Ba caña o'oyanaje quea cojja jee mano poanajejojo cahui o'oyanaje. Jesosa ba majje oya cuana quea bicho poanaje onijje emimijji. ⁴¹Jamajjeya oya cuana jea canana o'oyanaje, Jesosaa. Cuama pishana poqui o'oyanaje. Oja Chii nijje mimi o'oyanaje. Mimi o'oya

majje poe o'oyanaje o shajja'ajjajji cuana que. Ishe'acanjaje: —¿A'a miqianaya cahuijaa tii? ¿A'a mi jomishocajaa? Apoa aje, de. Jjeyahua nei eya, ojjañaja Edoe Mese, mimishi cua iña meesahua caje'yo cuaa. ⁴²¡Nequisohuacue! ¡Cua'a, jjeya nei ecuea epeeji nisho poeje! ¡Joya aje Jodasa poeje ba'a! —Jesosa poanjaje.

Jesosa iña canaje cuaa

(Mateo 26.47-56; Noca 22.47-53; Huani 18.2-11)

⁴³Jesosa mimianijo tii, Jodasa o que poeyanaje. Oya aje oe Jesosaja epeeji pea'ai poanjaje; pea 11 nijje nequinaje tii. Quea huiso nee nee deja nijje Jodasa poeyanaje; yohuajji poeyanaje acuijji, baajji, mejeji pea'ai poeyanaje. Jodio etii cuaa, Jodioja esohui huohuijjiya, Eyacuiñajji nijje emimijji etiiya pea'ai ojjaña huoojea canaje Jesosa iña. ⁴⁴Jodasaa, Jesosa e'iña meejjiya, yahuajo jama huohuime acanjaje ba'a: —¡Bacue oe! Eyaya oe deja ba majje cuiapashi nishoje. ¡Majoya oe miqianaaya iñacue; dojo'yocue! —Jodasaa yahuajo acanjaje deja cuana.

⁴⁵Jamajjeya Jodasa Jesosa que jjanequichipiquinaje: —Jesosa, ¡a'a mi ecuea Emeshi Mese nei jiquio! —amajje cuiapashi nisho canaje.

⁴⁶Ma ba majje pea deja cuaa Jesosa que poe majje iña canaje edojjji. ⁴⁷Jesosa iña cajo oja epeejiya onijje nequiya, Penohua, baa iña canaje. Onaja sapa jajapojoejajji nisho shajja jajasejjajaje ca'yonaje, Eyacuiñajji nijje emimijji etiiya echacojji poanija eshajja.

⁴⁸Jesosaa ojjaña deja ejjachichaqui'yo nequi huohui canaje: —¿Apiojji miya poeyanaje baajji, acuijji, mejeji e iña? ¿A'a cuae jja iña siipojji so'o? ⁴⁹Ojjaña pojjajo eya ojjaña cuana nijje nequinaje esohui huohuijji Eyacuiñajjija equijo. Jamatii eya miqianajaya iña jjima poanjaje. ¿Apiojji mecaje poeyanaje e iña? Jamatii jamaya nequiana poani. Miqianaaya ca mi ca oe Eyacuiñajjija esohui huohuijjiya etehue'yo yahuajo nei nei mijo jayojja jama quea tai aña.

⁵⁰Majoya o shajja'ajjajji cuana mete majje cuajicuajinananejje; Jesosa jea canananaje.

⁵¹Eya ca ca iña Macoso bajjani. Jesosa ocuenaje o pajea sa po'yo ajjaa jjejojo. Eya daquima' poanjaje; oe daqui ao ejjacueabeboquijji poanjaje. Majoya deja mase cuaa eya iña'ajja canaje. ⁵²Ohua iña cajje eyaya daqui ao jeajeanananejje, cuajicuajipoquinaje daquima' quea mete jjejojo.

Jodio etiiya Jesosa niñeba canaje

(Mateo 26.57-68; Noca 22.54-55, 63-71; Huani 18.12-14, 19-24)

⁵³Jamajjeya joya Jesosa iñajji cuaa oya dojo canaje Eyacuiñajji nijje emimijji etiiya equi yasijje, Caipaja equi yasijje. Jocuama ojjaña Jodio cuana jjachichaquinaje, Jodio etii cuana, Moisesija etehue'yo huohuijji poani pea'ai. ⁵⁴Penohua ca ca equijje aca poquinaje Jesosa. Caipaja equi

yasijje nequiñaquinaje. Dobiquinaje epeeyi dojjo huasijje. Jomajo Peno equi cuiñajji nijje cuaqui pejjejo jjayoqui nequinaje yajja Jesosa acaje cuaa ebajji.

⁵⁵Eyacuiñajji nijje emimijji etii, ojjaña Jodio etii cuana, Jodio esohui huohuijji poani pea'aiya ojee mimiminaje Jesusajo, ojjaña ejjachichaqui nequiya, o quecuajea'yo sa acani. Jamajjeya sa'ajja canaje dejja cuana Jesosa huohuijji nisho epo; Shomano meshi mese Pinato bajjani yasijje dojo majje Jesosa huohuijji nisho. Jamatii Jesosa huohuijji epo chama' poanaje. ⁵⁶Quea huiso dejjaa siajje acanaje. Jamatii oe siajjepojjija esohui pea siajjepojjija esohui jama pojjeama Jesosa mano mee'yojji. Chama' beca oya jayojja mimime epojji. ⁵⁷Quijje yejje nei beca cuana poe majje Jesosa niñeba canaje jama ba'a: ⁵⁸—Eyaya oya shajja'ajjanaje. Jama poanaje Jesosa ba'a: “Jiquio Eyacuiñajjija equi jeabichajea cajo, eyaya pea equi iyaje'yo pea beca peejjima cahuime. Jiquio equi dejjaja iya poanaje; pea ca ca dejjaa pojjeama iya caje'yo” Jesosa poanaje —acanaje beca cuaa.

⁵⁹Jamatii oya cuanaja esohui pea jayojja jama pojjeama poanaje.

⁶⁰Majoya Eyacuiñajji nijje emimijji etii ojjaña cojja nei nequisohua majje Jesosa huohui'ajja canaje: —¿A'a pa miya jama poanaje ba'a? ¿Jesosa, a'a cuae miyaya saja'aje'yo so'o?

⁶¹Jamatii Jesosa mimishi'ama jjejojo mimipanajaji jjima poanaje. Jamajjeya Eyacuiñajji nijje emimijji etiiya oya huohui neinei canaje: —Jesosa, ¿a'a cuae mi Eyacuiñajjija Bacua Ejja nei, oja huoojea'yo ojjaña jaahuanajji? ¿Huohucue mo!

⁶²Jamajjeya Jesusaa acanaje: —E'e, joya ecua miyaya ña jayojjaya eya, Eyacuiñajjija huoojea'yo ojjaña jaahuanajji. Cuanaya eyaya miya e'e nei huohuiaña: Quijje miyaya eya baje ecue Chii nijje ebianeijje ani. Oya quea ca'a nee nee enequi tii. Eya miqianaaya baje bo biajje poeje o'oya —Jesosa poanaje.

⁶³Ma shajjajja majje Jodioja Eyacuiñajji nijje emimijji etii quea quene nee nee poanaje. Quea quene nee po majje ma dejja tiiya ojaya daqui, oja huosho ba'e isajea canaje. Jodio dejja jamaya oja daqui isajea cani quea quene po majje. Ojjaña cuana huohui canaje: —¿De! ¿A'a pea dejja iyaajji Jesosa huohuijji! Jamatii. ⁶⁴Oya Jesosa miminaje jama ba'a: “Eya Eyacuiñajjija Bacua Ejja”. Chojja. Siajjepojji. ¿A'a cuae nequiaa shajja'ajjanaje oja sohui? ¿Jamajje yajja acuae seya aje so'o, Jesosa, de? —acanaje Jodio etiiya.

—¿Oya oe manojja mee'yocue; quea tai ca esohui acani! —acanaje Jodio edejja tii cuaa, Jesosa Eyacuiñajjija Bacua Ejja pojjeama posojo.

⁶⁵Majoya aje oe Jodio etiiya Jesosa cojja cuichojea ca poa. Cojja dodo majje ejjachichaquinequiya cuia canaje pea'ai emeya. Cuia majje huohui'ajja canaje: —¿Miya Eyacuiñajjija huoojea nei jjabaqui majje jja ca oe huohui pocue! ¿Aya acue mi cuia cani so'o? ¿Jashahuaba'ajjaqui! —acanaje equi cuiñajji cuaa.

Penohua siajje acanaje Jesosa oja ba jjima nisho

(Mateo 26.69-75; Noca 22.56-62; Huani 18.15-18, 25-27)

⁶⁶Ojjaña cuaa Jesosa napa caqui Penohua ba canaje esecuejo nequiya. Oe epona echacojji ahuema' ani poeyanaje. ⁶⁷Peno cuaqui pejjejo jjayoqui nequi ba canaje. Ba neinei majje huohui canaje jama ba'a: —E'e jojo nei miya Jesosa nijje aninaje, ma Nasanenajo ba'e nijje —poanaje epona.

⁶⁸—¡Chojja, ecuea oya ba jjima! ¿Ajeo acuae mi mimiani? —Peno siajje poanaje.

Majoya Peno epeeyijo nequi cuayaqui'yonaje, quea mete jjejojo. Jjeyahua nei cachina yahua taaanaje. ⁶⁹Peno esecuejo enequi'yojo, epona sho'iya echacojjiya oya ba ca o'oyanaje. Ojjaña cuana huohui canaje: —Oya ca ca oma Jesosa nijje aninaje e'e jojo nei —acanaje.

⁷⁰—Chojja, ecuea oya ba jjima nei nei. Eya ojaya epeeji pojjeama —nisho po o'oyanaje quea mete jjejojo.

Quijje pishana beca cuana Peno que ojee nequi jjanequichipiqui majje jama poanaje ba'a: —E'e jojo nei miya Jesusaja epeeji pea'ai; pea cuana nijje nequinaje. Jamaya miquea emimi, Janinea meshijo ba'e jayojja jama miya mimiani, de —poanaje.

⁷¹Ojaya esohui shajja'ajja majje Peno quea mete nee poanaje; onijje mimipanajajinaje: —¡Siajje miya poani! Jiquio dejja ecuea ba jjima. Eya e'e jojo nei pojjeama poani jojjemo, Eyacuiñajjiya eya mano mee ca'yome —Peno poanaje. Jamatii oya siajje poanaje.

⁷²Peno jamaya poajo chachina yahue taaa o'oyanaje. Cachina taaajo Peno jjashahuabaqui'yonaje ma Jesusaa yahuajo huohui canaje jama ba'a: —Peno, cachina yahue beca taaame poajo miyaya eya ba jjima nisho aje; pea beca peejjima huohuime aje'yo —yahuajo jamaya Jesusaa Peno acanaje. Ma shahuaba'yo majje Peno quea yeno nee nee poanaje. Pa neinei poqui'yonaje.

Emeshi mese Pinato huasijje Jesosa dojo canaje

(Mateo 27.1-2, 11-14; Noca 23.1-2; Huani 18.28-32)

15 ¹Majoya mecajjeahua nei Eyacuiñajji nijje emimijji etii cuana, Jodioja edejja tii cuana, Moisesija etehue'yo huohuijji poani, pea Jodio etii ejjachichaqui nequi cuana pea'ai, ⁷¹huisome jjachichaquinaje. Ojee jjachichaqui majje miminaje Jesosa quecua'yojji: —¿Achajja amajje acuae seya Jesosa quecua meeje'yo so'o? —acanaje oya cuaa.

Jamajjeya Jesosa me jeyo majje dojo canaje Shomano meshi mese Pinato bajjani yasijje. ²Jesosa ba majje Pinatohua huohui'ajja canaje jama ba'a: —¿A'ya cuae mi so'o? ¿A'a miya Jodioja Emeshi Mese nei poaje'yo?

—E'e, joya ecua miyaya año jamaya epo'yojji eya —Jesusaa saja'a canaje.

³Eyacuiñajji nijje emimijji etii cuaa quea huiso siajje acanaje Pinato Jesusajo. Jamatii Jesusaa saja'a jjima acanaje. ⁴Jamajjeya Pinatohua oya

huohui'ajja canaje: —¿Yajjajje acuae mi mi jjasaja'aquiani so'o? ¿A'a jje shajja'ajja jjima ojaya esohui mijo? Quea huiso nee miya niñeba cani Jodio etii cuaa.

⁵Jesosa mimishi'ama. Jamajjeya sijjepojji cuana o niñebajji saja'a jjima acanaje. Jjasaja'aqui ajja nei nei ba majje Pinatohua niñeba ca'yonaje: —¿Yajjajje acuae Jesosa mi jjasaja'aquiani so'o, de? —poanaje Pinato.

⁶Majoya Pinatohua niñeba ca'yonaje jama ba'a: —Jjeya nei Jodio cuana ojee ijia'ijjiani esohuidojojjiya yahuajo nei ojaya etiiquianaja bacua cuana cuia'yo jjima shejo. Ojjaña shequiaja jiquio shejo eyaya oe Jodio dejja ejeanobiajaa huoojeacuayaje'yo, ma Jodio cuaa sa cani, Jodio quea bihui epojji. Jamajjeya jiquio shejo e'e pojja'a eyaya Jesosa pichojea meeje'yo, jjeyahua nei. ⁷Pea yani, Mashama' bajjani, Shomano meshi mese quecua panajji epo. Oya dejja tai, ejeanobiajaa ona quecua'yojji cuana nijje. E'e pojja'a eyaya Mashama' huoojeacuayajea meeje'yo —jamaya Pinato jjashahuabaquinaje.

⁸Jjeyahua nei Jodio dejja cuana Pinato que poeyanaje. Huohui canaje jama ba'a: —Emeshi mese Pinato, jjeyahua nei huoojeacuayaje'yocue oe Jodio dejja, ecuana quea bihui nee epojji! —poanaje.

⁹Pinato jama poanaje ba'a: —E'e, jjeyahua nei eyaya pichojeaje'yo oe Jodio dejja. ¿Ache acuae jja oe pichojeaje'yo so'o? E'e pojja'a eyaya Jodio cuanaja Emeshi Mese nei Jesosa bajjani pichojeaje'yo. ¿A'a e'e? —poanaje Pinato.

¹⁰Pinatoja eba poanaje Jodio etii quea quene nee poani pea cuaa Jesosa nijje jjapeequi majje Jodio etiiquianaja esohui pajea cani. Jamajjeya Jesosa iña mee canaje equecuajaje'yojji, Jodio etiiquiaa. Jamajjeya Pinatohua Jesosa pichojea mee sa acanaje. ¹¹Jamatii Eyacuiñajji nijje emimijji etiiya ojjaña Jodio ejjachichaqui nequi taaa mee canaje: —¡Mashama' oe huoojeacuayaje'yocue! ¡Jesosa a'a pichojeaje'yojji! —taaame poanaje.

¹²—Jamajjeya ¿yajja acuae oe eyaya Jesosa Quito aje so'o, Jodio cuanaja Emeshi Mese nei ca pa coma? —Pinatohua huohui'ajja canaje.

¹³Jama taaame poanaje ba'a: —¡Oya me cacajea meecue oe, acui ecueata'apeejo! ¡Acui cueata'apeejo ba'ehuanasohuajea meecue oe emano'yojji! —taa neineinaje cuana.

¹⁴—¿Yajjajo acuae oya quecuaje'yo so'o? Oya mimishi'ama. ¿Apiojji acuaeya jjaya quecua'yo sa aña Jesosa? —Pinatohua huohui'ajja canaje.

Jamatii taaa majamaja canaje Jodio cuana: —¡Jesosa oe me cacajea meecue oe; acui ecueata'apeejo ba'ehuanasohuajea meecue Jesosa, de! —jama taaameya poa Jodio etii cuana.

¹⁵Jamajjeya Pinatohua ohua sa cajo Mashama' huoojeacuayajea mee ca'yonaje. Jesosa ca ca huoojea canaje cuiasejjajea majje me cacajea emano'yojji.

Sohuinano cuana soa neineinaje Jesosajo

(Mateo 27.27-31; Huani 19.2-3)

¹⁶Jamajoya emeshi meseja sohuinano cuaa Jesosa dojo canaje emeshi mese chacochacoañani equi dojoyo huasijje. Ojjaña sohuinano Jesosa que jjachichaquinaje. ¹⁷Jesosaja daqui oshe huijijajea mee majje daqui huo'o nei huosho mee canaje emeshi mese nisho epojji. Acuisha sipi majje sapahuahuo iya canaje, emeshi mese jayojja nisho epojji. ¹⁸Majoya ecui'oshajjajo nequinaje ojjaña, Jesosa bihuiajji nisho. Jama bihuia nishome acanaje ba'a: —¡Miya Jodioja emeshi mese quea ca'a nee! ¡Ba'e tiitii'yocue! —sajea nisho canaje cuaa Jesosa. ¹⁹Majoya oya sapa cuiape'ejea canaje acuiya. Cuia huicha'a huicha'a canaje. Jesosa cuichojea huicha'a huicha'a canaje oja yami yasijje. Ecui'oshajjajo nequiya bihuia nisho canaje cuaa. ²⁰Ojo soa neinei'yo majje daqui huo'o nei huijijajeajea canaje; ojaya daqui quia ca o'oyanaje. Majoya Jesosa quea huesha dojo canaje me cacajea, ba'ehuanasohuajea pea'ai, sohuinano cuaa.

Jesosa acui ecueata'apeejo ba'ehuanasohuajea canaje

(Mateo 27.32-38; Noca 23.26-43; Huani 19.17-27)

²¹Jenosanenajo aniya sohuinanohua Jesosa dojo caje, ba cajjequinaje pea dejja Simoni bajjani, Simoni Sinene meshijo ba'e poe'yo; oya Anejanoja ejeajji, oja chahua Shopoja ejeajji. Jamajjeya sohuinano cuaa Simoni acui ecueata'apee quea biquie dojo mee canaje Jesosa ba'ehuanasohuajeajji. ²²Jamaya oya poquinaje eyiyo bajjani Jonijota eyiyo huasijje, Ese Ejjaja esohuijo Esapa Jjii anijji bajjani yasijje. ²³Esapa Jjii anijji eyiyo huasijje jaasohuaquinaje cuana. Bañaqui majje Jesosa ishi mee'ajja canaje cuaa acuijajja na quea sese, pasejo 'ia jayojja. Ishi mee'ajja canaje quecua ca'yajje nee'ama epojji. Sio majje ishi jjima acanaje Jesosaa. ²⁴Majoya me cacajea ca'yonaje; ba'ehuanasohuajea ca'yonaje daquima'. Ba'ehuanasohuajeajo majje oja daqui cuana chicha ca'yonaje sohuinano cuaa. Iyachicha'yo majje, onaaya hue'e nisho majje daqui majjo ca'yonaje ojaya pojji epo'yojji.

²⁵Eshequi poe pishanajo, onaaya Jesosa acui ecueata'apeejo ba'ehuanasohuajea canaje. ²⁶Etehue'yo o ba'e sapa biajje oja bajjani caca canaje, Jesosa bajjani, oya apiojji me cacajea ca'yonaje huohui epo'yojji. Etehue'yo jama poa ba'a:

OYA JESOSA JODIOJA EMESHI MESE EPO'YOJJI

²⁷Jesosa ba'e pejejo beca siipojji pea acui ecueata'apee cuanajo ba'e huanasohuajea pea'ai ca'yonaje, Jesosaja ebianeijji mijijje, pea shani mijijje. ²⁸E'e, Eyacuiñajjija esohui huohuijijija etehue'yo yahuajo nei nei jayojja jama, jamaya acanaje ba'a: “Ojjaña cuana jjashahuabaquije jamaya: —Oya dejja mimishi nijje nequinaje”. Yahuajo nei nei jamaya poa.

²⁹Pea dejja cuana ejiojjijje poquianiya Jesosa ba majje esapa jeacajjajja canaje, soa huisahuisa nequinaje. Jama mimijajime poanaje ba'a: —¿A'a cuae oe miyaya Eyacuiñajjija mei equi ñajeabichaje'yo majje pea equi

iyaje o'oya so'o, pea beca peejjima cahuime? ¡Ba'ajja socue! ³⁰Ache ba'ajja; miya Eyacuiñajjija Bacua Ejja nei jjabaqui majje ca oe ¡acui ecueata'apeejo ba'e nequioque'ajja'yo socue, emano'yoyji pojjeama! —poanaje cuana.

³¹Moisesija etehue'yo huohuijji, Eyacuiñajji nijje emimijji etii pea'ai ojo soa neineinaje. Ojee mimimiminaje jama ba'a: —¿A'a Jesosa ojjaña jaahuanajji epo'yoyji? Chojja, ona nahuejji pojjeama. Oya ca ca oma nequioque'yo ajja, de —poanaje.

³²Jesosa niñeba canaje pea'ai: —¿A'a cuae jja oe miya Jodioja Emeshi Mese nei poaje'yo? ¡Jjaba'ajjaqui socue! Miya Eyacuiñajjija huoojea'yo ojjaña jaahuanajji jjabaqui majje ¡acui ecueata'apeejo ba'e ca oe nequioque'ajja'yo socue jjeyahua nei, ecuanaja ebajji! Ba majje ecuaaya: “Miya e'e jojo nei Eyacuiñajjija Bacua Ejja poanaje” aje'yo.

Siipoyji cuaa ma o pejejo eba'ehuanasohuajea ba'eya pea'ai Jesosa jamaya niñebame acanaje quea huiso nee.

Jesosa mano'yonaje

(Mateo 27.45-56; Noca 23.44-49; Huani 19.28-30)

³³Majoya eshequi biacoyjajja nequijo shequima' jayojja poanaje; quea misi nee poanaje ojjaña meshi yasijje. Quijje sinecua eshequi jjajeapaaqui'yo majje jiji o'oyanaje. ³⁴Sinecua, quea misi poajo, Jesosa quea yeno neineijo taaa neineinaje: —¿Eli, eli, lama sabactani? —taame poanaje—; ecue Chii, ecue Chii, ¿yajjajo acuae mo ya jeana'yonaje so'o? —Jesosa poanaje Jodioja esohuijo.

³⁵Shajja'ajja majje joya quea chipi nee nee nequi jama poanaje ba'a: —¡Bacue oe! ¡Ohuaya etiiquiana Enia iyaa cani pojja'a, ma yahuajo nei ba'ya poa Enia iyaa cani chi, de! —jama posoya acanaje cuaa.

³⁶Jamajjeya oe dejja poquicuajinaje acuijjajja na sese jjequiya. Jjequi majje shajashaja iyanobia canaje ena ejjequi yasijje. Majoya bequiobo sajo quecuahuosho majje Jesusaja enaba huasijje huoo canaje, ojaya e'ishijji nisho: —¡Ishoa socue! ¡Enia pojja'a poeje o nahueya, o jjequioquea'yohua! —poanaje.

³⁷Jamatii, taaa neinei o'oya majje Jesosa mano'yonaje. Chama'yo tii poanaje. ³⁸Jesosa mano'yajo tii, Eyacuiñajjija equijo daqui quea moo eba'ehuana ba'e Eyacuiñajjiya eyajje jjaisajea meequi ca'yonaje; biacuajje ebionei jjaisajeaqui meecoo canaje.

³⁹Ojjaña ba majje, Jesosa taaa neinei majje, mano'yonaje ba majje pea'ai sohuinano huoojeajji poani, ma Jesosa nahuejji poani quea mete nee poanaje: —¡E'e jojo nei de, oya Jesosa Eyacuiñajjija Bacua Ejja poanaje! —sohuinano poanaje.

⁴⁰⁻⁴¹Quea huesha nequiya epona cuaa pea'ai Jesosa eba'ehuanasohuajea ba'e ba cani. Oya cuana yahuajo Jesosa nijje Janinea meshijo ania poa. Onijje Jenosanena huasijje poeyanaje,

oja bobi cuacua meesahuaa. Oya cuana ma bajjani ba'a: Mania Madanena; Satiaco, oja chahua Jose pea'aija enaese Mania bajjani; Semeneoja ehuanase Sanome bajjani pea'ai; pea epona cuana quea huiso pea'aiya ba canaje.

Jesosa mei jjani yasijje huananobia ca'yonaje
(Mateo 27.57-61; Noca 23.50-56; Huani 19.38-42)

⁴²Majoya sinenaje. Mecahuajje epojja ejomishocajji, quea bihui nee ojee e'ijjia'ijjiajji pea'ai. Jamajjeya acui ecueata'apeejo eba'ehuanasohua ba'e meemee ajja.

⁴³Jamajjeya sinecua nei dejja Jose bajjani poeyanaje, pea Jose, Amatea meshijo ba'e. Oya Jodio etii ejjachichaqui nequi cuana nijje nequi. Oya ojjañaña quea boti nee. Ohuaya Eyacuiñañajji ojjaña huoojea'yojji poaje ishoa'ajja cani. Oya Jesosaja epeeji pea'ai yahuajo. Jamajjeya oya mete'ama po majje Pinato huasijje poquinaje Jesosajo huohuiya. Poe'yo majje ohuaya Pinato huohui caña'yonaje: —Emeshi mese Pinato, Jesosa mano'yonaje. Eyaya oya jjequioqueaje'yo jjani yasijje ehuananobiaqui'yojji —poanaje Jose.

⁴⁴Joseja esohui shajja'ajja majje Pinato jama poanaje ba'a: —¡De! ¿A'a oya Jesosa manocujji'yonaje?

Jamajjeya Pinatohua sohuinano huoojeajji poani, ma Jesosa me cacajeajji epo iyaa canaje. O poeyajo huohui'ajja canaje jama ba'a: —¿A'a e'e jojo nei Jesosa manocujji'yonaje? —poanaje.

⁴⁵—E'e, oya mano'yonaje —poanaje.

Jamajjeya Pinatohua Jose huoojea canaje jama ba'a: —E'e, ¡Jesosa dojocue! ¡Mei jjani yasijje huananobiaquicue!

⁴⁶Jamajjeya daqui oshe quea ao nee jjeshe majje Jose poquinaje Jesosa acui ecueata'apeejo emano'yo ba'e yasijje. Jesosa emano'yo ba'e jjequioquea ca'yonaje. Daqui oshe eyacua neijo bebo canaje. Dojo canaje mei jjani yasijje, ma oja jjeya nei tio huasijje. Huananobia ca'yonaje. Majoya mei quea quemo nee jeacajjajjajea canaje mei jjani naba capa'yojji. Jesosa mei jjani dojjojo jaa capa'yo majje poquinaje Jose pea cuana nijje. ⁴⁷Mania Madanena, Joseja enaese Mania bajjani pea'ai mei jjani yasijje poeyanaje pea'ai. Jomajo Jesosa jjani yasijje ehuananobiajaa ba canaje, epona cuaa.

Jesosa shequi o'oyanaje
(Mateo 28.1-10; Noca 24.1-12; Huani 20.1-10)

16 ¹Jodioja epojja ejomishocajji jjayejjequijajo, sinecua Mania Madanena, Jacoboja enaese Mania bajjaniya, Sanomeya pea'ai shiyeshiye iña jjeshe canaje Jesosa shicuijji nisho. ²Jamajjeya mecajjeahua nei jjaja'a'ajjaqui jjimahuajo ebionei epojjajo, nomico pojjajo, oya cuana poquinaje jjani yasijje. ³Bañaqui jjimahuajo mimimiminaje jama ba'a: —¿Aya shai mei quea quemo jeacajjajjajea caje'yo ese dobiqijji? Quea quemo nee mei.

⁴Epona cuana jjani yasijje poe majje ba cañaquinaje jjani huejja ecapajea'yo nequi. ⁵Jamajjeya jjani ai yasijje dobiquinaje. Dobiqúi majje epona cuaa esho'i ai ba canaje. Oja daqui quea oshe nee nee, quea ao nee. Jesosaja equipajaajji biajje ani ba canaje esohuidojojji ebianeí mijijje ani. Jjeya ca ca Jesosa chama'. Ba majje epona cuana quea mete poanaje.

⁶Jamaya oya epona cuana nijje poanaje ba'a: —¡A'a quea mete pojji! Miya ecuea eba. E'e, miyaya Jesosa ma Nasanenajo ba'ya poa sa'ajja'yo poequi, ma acui ecueata'apeejo mano'yonaje. Chama' oya jjeya jiquiojo. Shequi o'oyanaje ca jja coma. ¡E'e, quia'o jiquio ba'ajjahua'yo socue! Jiquiojo jaanaje. ⁷Jamajjeya jjeyahua nei poquicuajicue oja epeejji huohuiya! ¡Jama huohuime acue ba'a: “Jesosa pa shequi'yonaje” acue! “Oya jjeya nei Janinea meshi yasijje poquije miqúiana poqui jjimahuajo” o shajja'ajjajji cuana huohuicúicue. ¡Peno oe huohuinaquicue Jesosaja esohui ma ohuaya huohui canaje oe a'a pajea'yojji! ¡Oya oe jocuama baquicue! —esohuidojojjiya epona cuana acanaje.

⁸Jamajjeya epona cuana jjani esecue yasijje cuayaqui'yo majje poquicuajicuajinaje. Quea mete neejo oya cuana piopionaje. Pea nijje mimi jjima Jesosajo. Cuajicuajinaje Jesosa shajja'ajjajji cuana esohuidojojjiya esohui huohuiya.

⁹E'e, ebionei epojjajo, nomico pojjajo, Jesosa shequi o'oya majje, jjanequi'a'qui'yo majje pea'ai, Mania Madanenea ebionei oya ba ca'yonaje. Oya Maniaja yahuajo eshahua quea huiso dobiquiyajo, Jesosaa eshahua cuana huoojeacuayajea ca'yonaje me oejje pea beca huisome. ¹⁰Majoya Jesosa ba majje Maniaa o shajja'ajjajji cuana huasijje poquicuajinaje huohuiya. Jesosa emano'yo tii jaa posojo, oya cuana pa neinei aninaje quea yeno. ¹¹Jamajjeya Maniyaa oya cuana huohui cañaquinaje Jesosa eshe o'oya: —Eyaya oya banaje e'e jojo nei —acanaje Maniaa.

Jamatii Maniaja esohui shajja'ajja majje oya cuana jama poanaje ba'a: —E'e pojjaja. Chojja, siajje miya poani, Mania —acanaje cuaa, Jesosa shequi o'oya ajja poso acanaje.

¹²Majoya Jesosaja epeejji becanejjijji pea'ai ejiojjijje poquijejo, Jesosa pea jayojjaya jjanequi'a'quinaje onijje. Jesosa ba jjima poanaje cuanaja. ¹³Quijje yejje nei oya e'e jojo nei Jesosa ba majje oya cuana poquinaje pea eshajja'ajjajji cuana huohuiya. Jamatii ojjaña jama poanaje ba'a: —E'e pojjaja, de. Chojja de, oya mano'yo tii —ojjaña cuana poanaje, Jesosa shequi o'oya ajja poso acanaje.

Jesosa ba canaje o shajja'ajjajji cuaa

(Mateo 28.16-20; Noca 24.36-49; Huani 20.19-23; Hecho 1.6-8)

¹⁴Quijje Jesosa shajja'ajjajji cuana 11 huisome oe equijo ojee ijja'ijjia anijo Jesosa onijje jjanequi'a'qui'yonaje. Oya cuana tecuea canaje jama ba'a: —¿Apiojji acuae quiana quea sapa ca'a poani? ¿Apiojji shajja'ajja jjima onajaya ehuohui'yo eya eshe o'oya ba majje? ¡Bacue eya e'e jojo nei eshequi'yo, jjabahuejjaquicue! —Jesosaa acanaje.

¹⁵Majoya Jesusaa oya cuana jama acanaje ba'a: —¡Poquicue ojjaña cuana huasijje, ma ojjaña meshijo ba'e yasijje! ¡Ecuea esohui quea pame nee eba'e tiitii'yojjijo ba meequicue! ¡Enijje jjapeequi meequicue! ¡Enijje jjapeequiyajo enajo besa meecue! ¹⁶Ojjaña joya enijje jjapeequiani Eyacuiñajjiya ba'e tiitii mee caje'yo. Enijje jjapeequiyajo, ¡ojjañaja ebajji onaaya oya cuana besa meequicue! Ojjaña joya enijje jjapeequi'yo ajja ca ca Eyacuiñajjiya quea nee nee po mee caje'yo, quea mimishi poanajejojo. Jamajjeya Eyacuiñajjiya oya cuanaja mimishi cuanajo quea yeno po mee caje'yo.

¹⁷—Ecuea epeeji cuana eyaya ameeje'yo ma dejjaa ajjima acani. Oya cuana eyaya quea ca'a nee po meeje'yo, eshahua cuana dejjajo nequi huoojeacuayajea meeje'yo. Pea esohui ojaya cuanaja ba jjima mimi meeje pea'ai. ¹⁸Peyo se najji ba jjima iña majje mano'yo jjima po meeje'yo eyaya. Ena pase nei nei pase'ama poso ishijea majje, mano'yo jjima po meeje eyaya. Ecuea epeeji neiya emano biajje eme huana majje jiquio quea aja poaje; eyaya jjaajaqui meeje'yo, huaquia meeje'yo pea'ai —Jesusaa o shajja'ajjajji cuana huohui canaje.

Jesosa jjequisohua ca'yonaje eyahuasijje

(Noca 24.50-53)

¹⁹Majoya Emeshi Mese nei Jesosa pea cuana nijje mimiajo, oja Chiiya, Eyacuiñajjiya jjequisohua ca'yonaje eyahuasijje. Jomajo oya Jesosa anioquenaje oja Chii ebianeí mijijje onijje ojjaña huoojea'yojji epojji. ²⁰Majoya o shajja'ajjajji cuaa Jesusaja esohui huohuiqui canaje ojjaña cuana huasijje. Ojaya esohui jayojja jama Emeshi Mese nei Jesusaa oya cuana ameesahua canaje ma dejjaa ajjima acani ojjañaja ebajji ojaya esohui cuana e'e nei nei. Jamaya ojjaña ba mee canaje Jesusaa oya cuana huoojea canaje ojaya esohui huohuiya.

Jesosaa eya Macoso bajjani jiquio esohui tehue mee canaje. Mahuiso. Apoa.